

LUK

Jiysis Krays Minim Tep Luk Tikak Minim Nind Niņep

Baybol buk day “Luk” apun biy, bi Jiwda mer bap tikak. Yimb nuk ak Luk. Nuk dokta ak pen; Pol yip tanġiy, Jiysis nup tikey yomb giy, yerer gindand apiy kumiy tikjak Nop ker amnak ak, kesim dey niņrep gak rek, biynimb nuk Jiwda mer Jiysis nup gosimb niņyak gok kuyip tikak.

Nuk Jiysis Yisrel biynimb kuyip nep mer, Jiwda mer gok kuyip kunep Gor ker dinging awak minim ak anġrep gak (Luk 2:32, 3:6, 24:47).

Bi kun ak nep Baybol buk day “Apasol” apun ak kunep tikak.

Minim Ar Keykey Mindip Rek:

Minim nind anġak ak mindip, chapta 1:1-4.

Jon bi niņg pikñemb ak yip Jiysis yip kuyip tikiyak minim ak mindip, chapta 1:5-2:52.

Jon bi niņg pikñemb ak woņg kiñiņ gi gak minim ak mindip, chapta 3:1-20.

Jon Jiysis nup niņg pikñak ak sek, Seytan Jiysis nup tom gak minim ak sek mindip, chapta 3:21-4:13.

Jiysis miñmon Galiyliy woņg kiñiņ gi gak minim ak mindip, chapta 4:14-9:50.

Jiysis Galiyliy nimb woņg gindand Jerusalem amnak minim ak mindip, chapta 9:51-19:27.

Jiysis niņ nuk ak maņ giy wiyk nokom bap mindakniņ, Jerusalem sek, yep maņ kun okok sek

angñirangek minim ak mindip, chapta 19:28-23:56.

Jiysis kumiy tikjakek biynimb kunaynep nup misen niñyak ak sek, arachak Nop ker amnak minim ak sek mindip, chapta 24:1-53.

Luk Biyomb Tiyopiylas Nup Minj Tikak

¹⁻² Biyomb Tiyopiylas. Krays nup namb chinup biy tikey yomb giy, gak gak rek, bi gunap windin niñiy angñeyak, bi gunap niñiy, kesim nokom kun ak nep ar keykey tikyak.

³ Pen biyomb niñan: Jiysis nind gek owak rek, yand per kiñiñ piyowniñ tep gipiyn ak mey, kunep tikniñ gispiyn.

⁴ Kun giy tiken mey, minim nip anggey niñban ak, niñind yimb nep apay anggiy niñningamban.

Jon Bi Ñiñg Pikñemb Ak Tikniñgamb Angak

⁵ Nind Herot Jiwdiya propens kond mindyিংip ñin ak, binak Sekaraya, Gor nup simbongep wong ak gi mindyিংip. Bi layn nuk yip wong jimñiy giyিংipay gok kuyip, Abayja Layn anggiyিংipay. Pen bi Sekaraya kun ak biynuk yimb ak Eliysabet. Nup kunep bi Gor nup tap simbongep Eron kiñiñ ak tik dand amiy tikyak.

⁶ Kiykber Gor minim ar ak mangiysek kisen giy minder; Gor niñek minim bap ma mindek.

⁷ Pen Sekaraya biynuk Eliysabet ñapan wom ak mey; ñapan bap tikiy mer, pisnep yimb tokiy ayrik.

⁸⁻⁹ Ñin bap Sekaraya binuk yip wong jimñiy giyিংipay gok, ap Gor nup simbongep wong ak tip giniñg anggak, “Wong giniñgambun kun ak, bi

chin an rek biyomb anḡayon chinup gunap kond mindeningamb anḡiy,” sandiw rek ak giy mey, Sekaraya nuk wiyn giy, kuyip kond mindyningip. Tap kuyrep apyningip gok Gor anḡniḡep korip miḡan ak amiḡ, danḡiyningip.

¹⁰ Pen ñin bap, tap kuyrep danḡiyep won ak apek, biynimb kuḡaynep ap mis biyan nan-giy lotiw mindyakniḡ, Sekaraya nuk tap kuyrep wak kun ak danḡiyning, korip ñiluk miḡan ak amning sandak.

¹¹ Amjakakniḡ, enjol bap ap tap kuyrep wip danḡiy ayingipay ñin yipund kind okok ken misen gak.

¹²⁻¹³ Sekaraya niḡiy jiwdiy pirikek, enjol ak nup anḡak, “Ma piriknimin! Gor nup minim anḡniḡban ak niḡimb. Biynak Eliysabet ñi bap tikningamb. Tikek yimb nup Jon anḡnimin.

¹⁴⁻¹⁵ Nuk Gor nup wonḡ gek; Gor nup tep giy, nip key tep giy, biynimb gok kuyip tep giy giningamb. Nonim nup tikek, Gor Kawnan ak yip nep mindeningamb ak mey; ñing wayn akan, ñing kilis gunap ma ñiḡnimuḡ.

¹⁶ Kisen Yisrel biynimb Gor nup kirpay gok kuḡaynep anḡrep gek, Gor nup Biyomb chin anḡiy diniḡgambay.

¹⁷ Pen ñi nand kun ak, Gor Yilayja nup kilis ñiyningip rek ñakniḡ, nop sikop kuyip diy, ñapan nuk sikop kuyip diy di jimñiy ayningamb. Biynimb Gor nup alemb alemb ñimbay gok anḡ tep gek; biynimb nup gosimb niḡiy suḡ-tep mindpay gok yip mind tep giyning, Biyomb anup kond mindyakniḡ winingamb anḡak.”

18 Enjol ak kun angek, Sekaraya angak, “Chir tokiy yimb aypur ak, yergiy ñapan tikningambur? Kun ak yergey niñiy, niñind yimb apan angningayn angak.”

19 Angek, enjol ak Sekaraya nup angak, “Yand Gebriyel, Gor windin yirik ar ak minden yip yokek, minim tep kun ak dand opiyn.

20 Pen niñind anqip angyi ma niñban rek, jonimb nip ak miker gek, minim angying ma mindeningamban. Yikop nep mind mind, ñi ak tikiy nep, tip ak minim angningamban angak.”

21 Pen biynimb mis biyan mindeyak gok, Sekaraya Gor angninep korip ñiluk miñgan ak am tapin yimb mindek niñiy, gos kuñay yimb nep niñyak.

22 Kisen nuk mis apiy, yip kun kun gip angyi, ñin anep yomek; korip miñgan biyan am mindiy, tap bap key niñiy wip angyi niñyak.

23 Pen Sekaraya Gor angninep korip wonq ak gi mindek, ñin nuk ak day jiwakniñ, bi gunap ap tip nup ak diyakniñ, nuk andkind korip amnak.

24-25 Mind dand amiy, biynuk Eliysabet ñapan kongiy mindiy angak, “Biyn ñapan wom minden yip nambiñ gak ak pen, miñiy Biyomb ak yip simb niñiy kond mindek, ñapan kongiy mindpiyn ak; yip tep gip rek, nambiñ ma giningamb angak.” Kun angyi, takin onep mamind ak, kapkap korip miñgan okok nep mindyinqip.

Jiysis Nup Tikningamb Angak

26 Takin kangol ak, Gor enjol Gebriyel nup angyokek, pañ Mariya nup niñning miñmon sikoy Nasaret amnak.

27 Pañ kun ak, binak Josep nup diningamb angyiy minim angyak. Bi Josep kun ak, kiyn Depiyt tikek, tik dand amiy tikyak.

28 Enjol Gebriyel pañ Mariya mindek ak am-jakiy angak, “Mariya mindpan? Gor nip direp gip. Nuk yip mindpiyr angak.”

29 Kun angek, Mariya minim kun ak niñiy, yip yenen kun asap angyiy gos kuñay niñek,

30 enjol ak nup angak, “Ma pirikninin! Gor nip direp yimb gip.

31 Nand ñapan koñgiy mindiy, ñi bap tikningamban. Tikiy yimb nup Jiysis angninin.

32 Pen nuk biyomb yimb mindek, Gor Ñinuk angningambay. Gor gek, nusind yes Depiyt, kiyn yomb mindyngip rek mindiy,

33 nimbip Jekop tikek tikey mindpim gok mañgysek, perper yimb kond mindeningamb angak.”

34 Enjol ak kun angek, Mariya angak, “Yand bi bap yip ma mindpur ak, yergiy ñapan kun ak tikningayn?”

35 Angek, enjol ak nup angak, “Gor Kawnan ak nep gek, ñapan suñ-tep yimb ak tikningamban ak mey, nup Gor Ñinuk angningambay.

36 “Niñan! Namind Eliysabet nup biyn ñapan wom angyingipay ak pen; miñiy tokiy yimb ay, ñapan koñgiy mindip. Takin omiñal omiñal mindiy, ñi bap tikningamb.

37 Gor tap ma ginimuñ rek bap ma mindip; tap okok mañgysek ginimuñ rek anep mindip angak.”

³⁸ Kun angek, Mariya angak, “Yand Gor nup wong giñemb pañ bap ak, aspan rek nep yip ginimuj angak.” Kun angakniñ, enjol ak nup kirgiy amnak.

Mariya Am Numind Eliysabet Nup Niñak

³⁹⁻⁴⁰ Pen Mariya kasek amniyn angyi, Jiwdiya propens yirik okok kinjen par ak am am, Sekaraya korip ak amjakak. Amjakiy, numind Eliysabet nup angak, “Nand mindpan?”

⁴¹ Angek, numind Eliysabet ñapan mindek ak kawin ayak. Pen Gor Kawnan ak Eliysabet nup gek,

⁴² menj miñgan dand araniy Mariya nup angak, “Gor biyn gunap kuyip kond mindip ak pen; nip key yimb direp gip. Ñapan koñgiy mindpan kayan ak kunep kond mindip.

⁴³ Yergiy rek minden, Gor yip direp giying, Biyomb chin nonim ak yip ker apek niñsipiyn?

⁴⁴ Nand ap yip ‘Mindpan?’ angey, ñapan koñgiy mindpiyn ak, tep gakniñ kawin ayip.

⁴⁵ Pen Gor nip anqip rek giniñgamb angyi niñban ak, tep yimb gipan angak.”

Mariya Kamep Rek Angying, Gor Nup Yimb Ak Dand Aranak

⁴⁶ Eliysabet kun angek, Mariya Gor nup gosimb niying, tep gakniñ angak:

⁴⁷⁻⁴⁸ “Yand pisnep kumemb rek mindenik, Gor yip simb niñiy tungasik dak ak, nup niñen yip tep gip. Yand yikop pañ nup wong giñimbiyn ak pen; yip sakiy ma gip. Kun gip ak, miñiy tikiy, biynimb gok mañgiysek,

Gor biyn kun ak nup direp yimb gak anjningambay.

49 “Gor Biyomb tap okok mangiysek gip ak, yip direp yimb gip. Nuk bi suņ-tep kun ak key yimb mindip.

50 Biynimb minim nup niņiy ñawil diy, kisen giningambay gok, kuyip simb niņiy dingingamb. Ñapan kiy tikeningambay tikey amningamb gok, kunep giningamb.

51 Nuk bi ñin paryomb yimb. Biynimb chin key biynimb yomb mindpun apay gok kuyip, yuk yokip.

52 “Kun ak, biynimb yimb mindip gok keykey amey, biynimb yimb ma mindip gok tip kuyip ak dipay.

53 Pen biynimb yiwan gip gok kuyip niņiy, tap ñimb; biynimb tap kuņay mindip gok niņiy, yikop angyokek ambay.

54 “Apis basind yes chin gok kuyip minim angak ak sakiy ma giy, chinup Yisrel biynimb per simb niņiy kond mindrep gip.

55 “Basind Ebrahim sek, basind chin gunap sek ñapan tikeningambay tikey amningamb gok, kuyip kond mindeningayn angyi angak rek chinup gip angak.”

56 Mariya minim kun ak angyi, numind Eliysabet yip takin omiņal nokom mindiy, andkind korip nuk amnak.

Eliysabet Ñinuk Jon Bi Ñiņg Pikñemb Anup Tikak

57 Mind dand amiy, Eliysabet ñi won ak tikak.

⁵⁸ Gor nup kond mindek, tokiy yimb ay ñapan tikak kun ak; biynimb nuk gok niñiy, nuk yip miñmiñ yimb giyak.

⁵⁹ Pen ñi ak tikiy ñin onep ar ak mindiy, ñin jiy ak kumbak nup ak tikiy angyak, “Ñi kun biy, nop Sekaraya yimb ak tiñiy yinj gep angyak.”

⁶⁰ Angey, nonim angak, “Mer. Yimb nup Jon angep angak.”

⁶¹ Angek, biynimb nuk gok angyak, “Binuk gok, Jon yimb bap ma mindip angyak.”

⁶² Kun angyi, nop Sekaraya nup ñin anep yomiy angnineyak,

⁶³ nuk ñin anep yomiy angak, “Yip tap pisband bap sek, kil tikep tap par bap sek dowim angak.” Angek, dand apey, ar kun ak yimb tikiy, enjol ak nind angak rek, “Yimb nup ak Jon angak.” Kun giy tikek niñiy, kiyk gos kuñay yimb niñyak.

⁶⁴ Pen Sekaraya jonimb miker gak kun ak awan amnakniñ, day minim angyiñg, Gor nup yimb ak dand aranak.

⁶⁵ Biynimb mindeyak gok, gak kun ak niñiy, minim kun ak ying dand miñmon Jiwdiya yirik okok mangyisek yimb amniyak.

⁶⁶ Biynimb gok minim kun ak niñiy angyak, “Gor gek ñapan kun giy tikip ak, kisen yergiy rek mindeniñgamb angyak.”

Sekaraya Gor Nup Kamep Rek Angak

⁶⁷ Jon nop Sekaraya, Gor Kawnan ak bak ayek, Gor nup minim tep gunap kamep rek angyi angak:

⁶⁸ “Chin Yisrel biynimb, Bapiy Gor nup yimb ak dand aranjun.

“Chinup pisnep kirgiyn aᅅgiy gos ak ma niᅅimb; simb niᅅiy diniᅅgamb.

69-70 “Kun ak bi minim nup aᅅgep gok wosrey aᅅgyak rek, Biyomb bap yokek apiy, chinup kond mindek, kim amniᅅgambun.

“Biyomb kun ak, basind Depiyt Gor nup woᅅg giᅅiyiᅅgip bi ak ᅅapan tikek; kiy pen tik dand amiy apiy giy, nup tikniᅅg gispay.

71 “Gor aᅅgak, ‘Yand mindpiyn rek, nimbip miluk niᅅiy, timey giniᅅgiy rek ma ayniᅅgamb aᅅgak.’

72 “Nuk chinup simb niᅅiy direp gip kun ak, basind sikop kuyip sakiy ma giy, giniᅅgayn aᅅgiy aᅅgayak rek nep gip.

73 “Nuk basind Ebraham nup minim aᅅgay aᅅgak, 74-75 ‘Nimbip kond minden biynimb miluk niᅅbay gok, nimbip timey giniᅅgiy rek ma ayniᅅgamb. Ma pirikniᅅgambim; gos yip ak niᅅiy, woᅅg yip ak giy, biynimb tep yand gok nep mindiy, mind tep giniᅅgambim aᅅgak.’

76 “Pen ᅅi yand. Nand woᅅg giniᅅgamban rek niᅅiy, aᅅgniᅅgambay, Gor Biyomb yimb ak, bi minim aᅅgep nuk aᅅgniᅅgambay. Yenen, nand nind amiy, biynimb gok kuyip aᅅgrep gey, Biyomb anup kond mindyakniᅅ, nuk winiᅅgamb.

77 Nand kuyip aᅅgrep gey, Biyomb ak apiy, tap siy tap timey gipay gach ak wiykyokiy, kuyip diniᅅgamb.

78-79 “Gor bi tep biynimb simb niᅅimb ak, melik tep semb biyoᅅ nimb ak chinup yokeniᅅgamb mey; kisyimnamb okok

tanġiy, gi dam pikiy, kumemb rek ayip ak kirgiy, kinjeŋ tep ar ak tanġeniŋgambun aŋgak.”

⁸⁰ Pen Sekaraya ñinuk Jon, miñmon nep namb okok mind mind, pisnep yomb gi day tikiy apek, Yisrel biynimb nup niŋyak.

2

Jiysis Nup Tikak (*Mat 1:18-25*)

¹ Pen Jon nup tikiyak ñin namb kun ak, gapman biyomb Siysa Ogastas, low ay aŋgak, “Biyimb yand kond mind asikpiyn rek, maŋgiysek yimb diniŋgiy aŋgak.”

² Nind kiñiŋ giy, yimb dinimimb aŋgiy diyak ñin kun ak, gapman biyomb Sayriyniyas, Siyriya biynimb kuyip kond mindek.

³ Pen biynimb miñmon paryomb okok nimb ap yikop mindeyak gok yimb diniŋ, andkind miñmon kiyk key okok amniyak.

⁴ Kun gey niŋiy, Josep nup Depiyt kiñiŋ ak tik dand amiy tikiyak rek; Mariya nup poŋind, miñmon sikoy Nasaret Galiyliy propens ak kirgiy, Jiwdiya propens amiy, kiŋiŋ Depiyt nup tikey mindyiŋgip miñmon sikoy Betliyhem amnak.

⁵ Pen biyn nup minim aŋgyak kun ak, ñapan koŋgiy sek mindakniŋ, poŋind yimb diniŋ amnak.

⁶⁻⁷ Amjakiy niŋak; maniy tawiy kinyiŋgipay korip ak pisnep timbik dak ak mey, kaw mokiŋgipay korip ak mindiy, Mariya ñapan nind

won ak tikak. Tikiy chech kom kom giy, di kaw tap kaskas ayey ñimbyiᅇgipay kes miᅇgan ak ayak.

Enjol Ak Kanj Siypsiyp Mokep Bi Gok Kuyip Anᅇᅇak

⁸ Pen Mariya Jiysis nup tikak ñin kun ak, bi kanj siypsiyp mokep gok, gunap kisyimken ak kond mindeyak miᅇmon kun okok.

⁹ Gor enjol bap melik sek yokek, melik kun ak ap kuyip pikniᅇek niᅇiy, pirikyak.

¹⁰ Pirikey, enjol ak kuyip anᅇak, “Ma piriknimimb! Yand nimbip biynimb okok maᅇgiyseᅇ, minim tep miᅇmiᅇ gep ak dand opiyn.

¹¹ Miᅇiy biyn bap, Biyomb chin per kond mindpun ak tikip; Depiyt mindyiᅇgip miᅇmon ak. Kisen nuk Biyomb mindiy, tap siy tap timey giyim gach ak wiykyokiy, nimbip di Gor yip jimᅇiy ayniᅇgamb.

¹² Nup am piyow niᅇiy niᅇniᅇgambim: nonim nup chech kom kom giy, di kaw tap kaskas ayey ñimbay kes miᅇgan ak ayek mindeniᅇgamb anᅇak.”

¹³ Kun anᅇakniᅇ, enjol kuᅇay yimb nep semb biyoniᅇ nimb apiy, Gor nup yimb ak dand aranyiᅇg anᅇyak,

¹⁴ “Gor yimb nup ak dand yiy ar biyoniᅇ aranemb anᅇyak.”

Bi Kanj Siypsiyp Mokyak Gok Am Jiysis Nup Niᅇyak

¹⁵ Enjol gok andkind semb biyoniᅇ amniyakniᅇ, bi kanj siypsiyp mokep gok minim anᅇniᅇ anᅇniᅇ

giy angyak, “Gor angyamb, chinup minim kun giy apay ak, kasek Betliyhem amiy ninun angyak.”

¹⁶ Angyi, amiy niyyak: Josep yip, Mariya yip ñapan angyak kun ak, chech kom kom giy, kaw tap kaskas ayey ñimbay kes mingan ak ayer mindek.

¹⁷ Ninjiy angyak, “Enjol gok, kisen ñapan kun ak nimbip kond mindeningamb apay ak, mey biy-ey! angyak.”

¹⁸ Bi kanj siypsiyp mokep gok minim kun ak angey, biynimb gok ninjiy, gos kunay yimb niyyak.

¹⁹ Pen Mariya nup tap key yimb ak gak rek, tep gek gos ninying nep mindyingip.

²⁰ Bi kanj siypsiyp mokep gok, Gor enjol nuk gok angyak rek nep gek, windin key ninjiy, yimb nup ak dand aranying, andkind korip amniyak.

Jiysis Nup Tikiy Yimb Ayak

²¹ Mariya ñi ak tikiy ñin onep ar ak mindiy, minek jiy ak kumbak tikiy yimb ayning, enjol ak nind nonim nup, yimb ak kun giy aynimin angak rek, yimb nup ak Jiysis angyak.

Bi Simiyon Yip Biyn Ana Yip Jiysis Nup Niñrik

²²⁻²³ Pen Mosis Gor low minim ak tikiy, ñi nind tikningambay gok, Gor nup angningambay angak ak mey, Mariya ñapan ak tikiy, Jiwda biynimb giyingipay rek, Gor angninep korip ak asikiy mindek sun ayakniñ, Josep yip, Gor ñapan nup ak angning, dand Jerusalem amiy, Gor angninep korip amnirik.

²⁴ Pen low minim bap tikiy, “Biyn ñapan tikningiy gok sun ayek, yakir maling akan, kochir

omiṅal dand Gor aṅgniṅep korip mis ar ak amiy, pik Gor nup simboṅṅ ñiy mey, suṅ ayip aṅgiy, Gor aṅgniṅep korip miṅgan ak amniṅgambay aṅyak.” Gos kun ak kunep niṅiy mey, yakir omiṅal sek dand amnirik.

25-26 Pen Jerusalem amiy, yakir omiṅal ak Gor nup simboṅṅ ñiy, korip miṅgan amiy niṅrik: bi mind tep yimb giy, Gor nup nep aṅgniṅyṅgip bap mindek. Yimb nuk ak Simiyon. Nuk Gor Kawnan ak yip mindyṅgip ak mey; nup nind aṅgak, “Biyomb Gor yokek Yisrel biynimb kuyip diy kond mindeniṅgamb ak apek niṅiy, kisen kumniṅgamban aṅgek,” niṅmindyṅgip.

27 Pen ñin kun ak, Gor Kawnan ak Simiyon nup gos ñek, Gor nup aṅgniṅep korip ak amiy niṅak; Josep ber, Jiysis nup dand apiy, Mosis aṅgak rek giniṅ ap minderik.

28 Kuyip niṅiy, Jiysis nup di kaygiy, Gor nup yimb ak dand aranyiṅ aṅgak:

29-30 “Biyomb. Ñapan biy yomb giy, chinup di nip yip jimñiy ayniṅgamb ak, tep yokey misen niṅsipiyn. Kun ak yip aṅgnak rek yepyey, tep gakniṅ kumnim.

31-32 “Ñapan kun biy, biynimb nand Yisrel kuyip nep daṅ aṅgiy ma yokpan; biynimb yikop okok kuyip kunep daṅ aṅgiy yokpan.

“Pen melik tep nand ak kuyip niṅakniṅ, chinup Yisrel biynimb yimb ak dand araniṅgambay aṅgak.”

33 Simiyon Jiysis nup kaygiy, minim kun ak aṅgakniṅ, Josep ber gos kuṅay niṅrik.

³⁴ Pen nuk kuyip bilesiym giying, Jiysis nonim Mariya nup angak, “Ñi nand kun biy mindakniñ, Yisrel biynimb kuñaynep namb ak anjilakiy, kinjen tep diy amningambay gok, Gor ker amningambay; kinjen timey diy amningambay gok, apyap pikningambay. Niñyan angiy, nup yokak ak pen, nup ma diy angjiwningambay.

³⁵ Kun giy mey, yerer giy gos niñiy mindpay rek, biynimb niñningambay. Pen mindmangiy nip ak kalaw yimb giningamb angak.”

³⁶ Pen ñin kun ak, biyn Gor minim angep bap kunep ap mindek. Yimb nuk ak Ana. Nop yimb ak Pañiwel. Biynimb Esa angyingipay kiñiñ ak tik dand apiy mey, Ana nup tikyak. Pen Ana simiy nuk ñin jiwiy omiñal nokom, andikiy onep anjip piskind ak yinak. Nind bi diy, nuñgumiy yip minder simiy yin ayak ar ak.

³⁷ Pen nuñgumiy kumakniñ, Gor nup gos anep ayek, ñin gunap tap ñimbiy mer, Gor angniñep korip ak amiy, pumbnamb kisyimken angniñ mindyingip.

³⁸ Pen nuk Jiysis nup di mindeyak mañ siñak apiy, Gor nup tep angiy, biynimb Gor chinup diy kond mindeningamb angiy niñyak gok kuyip angak, “Ñapan biy yomb giy, chinup di Nop yip jimñiy ayingamb angak.”

Jiysis Nup Dand Andkind Nasaret Amnirik

³⁹ Josep ber Gor low minim angiy tikyak rek giy, tip ak andkind Galiyliy propens amiy, miñmon kiyk Nasaret amnirik.

⁴⁰ Am mindiy Jiysis yomb giy, Gor nup kond mindakniñ, gos tep yimb niñiy, mind tep gak.

Jiysis Gor Anjnip Korip Amnak

⁴¹ Nop nonim ber simiy ak simiy ak, enjol ak Yijip biynimb kuyip pikaying, chinup Jiwda biynimb gok kirkak ñin yomb Pasopa ak miñiy angyi, am Jerusalem nan-giyinipay.

⁴² Kun giy mey, Jiysis simiy nuk yin wimingan ak ayek, nop nonim yip Jerusalem am mindey,

⁴³⁻⁴⁴ ñin yomb kiyk kun ak apiy pandikakniñ, korip amjipun angyi, andkind kinjeñnamb ak apiy niñrik: Jiysis yip ma apeyak. Nuk Jerusalem nep mindek ak pen, kiyk ma niñiy angrik, nuk biynimb gunap yip asaw angyi niñrik. Pen kinjeñnamb ak kiniy, nup ma nep niñiy,

⁴⁵⁻⁴⁸ numiy numam sikop yip mindip akan angyi, piyow andkind Jerusalem amiy niñrik: nuk am Gor nup anjnip korip ak mindiy, biyomb low tiysa gok yip minim anj mindek. Biynimb ap niñmindeyak gok, Jiysis angak rek niñiy, ñi gos kind angyi niñiy, minim anj tep yimb gip ak angyi, wal angyak. Pen nop nonim ber nup kunep niñiy, ñi ak gos nuk ak key niñiy kun gamb, nup ñin omiñal nokom ma niñbur angyi, wal angrik. Nonim pen, Jiysis nup angak, “Nap chirup yenen kun gey, mindmangiy kalaw gakniñ, nip piyow niñraspur?”

⁴⁹ Angek, Jiysis angak, “Yenen yip piyow tangying aspiyr? Bapiy yand korip mindeningayn ak ma niñbiyr?”

⁵⁰ Jiysis kun angak ak pen, minim asap ak angyi ma tik niñrik.

⁵¹ Pen ñin kun ak, Jiysis nup poñind andkind miñmon kiyk Nasaret amerik, nuk kun okok

mindyng, nop nonim angyngipiy rek nep niñiy kindik giyngip. Pen nonim, nuk yerer gak ak niñyng nep mindyngip.

⁵² Jiysis miñmon Nasaret mindiy, pisnep yomb giy, gos niñrep yimb gek, Gor sek, biynimb gok sek nup niñey tep gak.

3

Jon Bi Ñing Pikñemb Ak Minim Angyngip (Mat 3:1-12; Mak 1:2-8; Jon 1:19-28)

¹ Rom gapman biyomb yimb Siysa Taybiyriyas, miñmon okok kond mindek, simiy ak yin ayak anjip piskind ak. Pen nuk paryomb okok mindiy, bi kond mindep namb kayan nuk gunap angek, am miñmon sikoy gunap kond mindeyak. Binuk Ponsis Paylat, Jiwdiya biynimb gok kuyip kond mindek. Binuk Herot, Galiyliy biynimb gok kuyip kond mindek. Herot numam nuk Piyliy, Yitiwriya biynimb gok sek, Trakonaytis biynimb gok sek kond mindek. Layseniyas, miñmon Abiyliy niy biynimb gok kuyip kond mindek.

² Pen won kun ak, binak Anas yip, Kayapas yip, biyomb Gor nup simbonjep ominal ak Jerusalem minderik.

Pen ñin namb kun ak, Sekaraya ñinuk Jon, biynimb kuñay ma mindeyak namb okok kin mindakniñ, Gor nup gos ñek,

³ Joden ñing gol okok amiy, biynimb gok kuyip minim angyñiyng angyngip, “Tap siy tap timey gipim ak, yenen kun gipun angy kirgiy, Gor nup nep gosimb niñem, nimbip ñing pikñen mey; Gor niñiy kirginiñgamb angyngip.”

⁴ Jon kuyip Gor minim angnak kun ak, bi Gor minim anjep Asaya, giningamb angyi tikak rek nep gak. Asaya minim tikiy angak:

“Bi bap biynimb kunay ma mindpay namb okok menj mingan dand araniy angningamb, ‘Per, biyomb asaw angyi, kinjenj pindrep giy kond mindpay.

⁵ Kun ak, dum okok pinjysak tep giy, giw mingan okok lum ñi tep giy, kinjenj tind mand giy mindonimuj gok; pind yipund giy, kamb gok diyok tep giy, tap siy tap timey gipim ak kirgiy, Biyomb anup kond mindenimimb.

⁶ Kun giy mey, biynimb okok mangyisek, Gor binuk yokek biynimb dingingamb anup ninrep giningiy angningamb’ angyi” tikak.

⁷ Jon Asaya angyi tikak rek angakniñ, biynimb kunaynep mindek ak apiy angyak, “Chinup ñiñg pikñan angey,” kuyip anj giy angak, “Siy saraw ñapan nuk guniy. Yerip gos ak niñiy pirik opim? ‘Ñiñg pikon, Gor biynimb gunap kuyip anj giningamb ñin ak, chinup ma anj giningamb angyi’ pirik opim?

⁸ Ñiñg pikniñg, tap siy tap timey gipim gok yenen kun gipun angyi kirgem mey, Gor nup gosimb niñbay angyi, nimbip ñiñg pikñanim! Pen gos bap niñiy, chin Ebrahim ñapan nuk angyi, Ebrahim nup nep gos ak ma niñnimimb. Nuk tikek, tikey wak gok chin mindpun apim ak, tap yikop. Gor kamb guniy diy, Ebrahim ñapan nuk gunap giniñg gipkop. Kun ak bi tep Ebrahim tikek; tikey amiy apiy gek chinup tikpay apim ak, Gor niñek minim rek ma apim.

9 “Pen niṅrep ginimimb! Gor mon maṅgiy ma piyip gok timb daṅgiyning, tiw ak mamb giy mindip angak.”

10 Jon minim kun ak rek angakniṅ, nup pen aṅgniṅiy aṅgyiṅgipay, “Chinup yergiyaṅ aṅgiy apan?” Aṅgey, kuyip aṅgyiṅgip,

11 “Biynimb tiṅgliys ominal mindonimuṅ gok, bap biynimb tiṅgliys ma mindonimuṅ gok kuyip ṅiniṅgiy. Pen biynimb tap keṅmaṅgiy mindonimuṅ gok, gunap biynimb tap ma mindonimuṅ gok kuyip ṅiniṅgiy angak.”

12 Pen bi takes dep gok, Jon chinup ṅiṅg pikṅaṅ aṅgiy, ap nup aṅgniṅiy aṅgyiṅgipay, “Tiysa. Chin yerginjun?”

13 Aṅgey, kuyip aṅgyiṅgip, “Takes ak diniṅg, gapman kay apay rek nep dinimimb. Yesek gunap ma dinimimb aṅgyiṅgip.”

14 Rom biynimb, amiybi kiyk ap poliys rek mindyiṅgipay gok, Jon nup minim kun ak rek nep aṅgniṅiy aṅgyiṅgipay, “Chin yerginjun?” Aṅgey, kuyip aṅgyiṅgip, “Biynimb gok kuyip timey ma giy, kor yesek giy maniy kuyip ak ma dinimimb. Wong gipim rek nep dinimimb aṅgyiṅgip.”

15 Pen kun gi mind dand amiy, biynimb gok gos ar bap niṅiy aṅgak, “Bi biy, Kiyaṅ yomb key yimb per kond mindpun ak rek ayip aṅgak.”

16 Aṅgey, nuk minim kun ak niṅiy kuyip angak, “Yand nimbip yikop ṅiṅg pikṅimbiy; Biyomb yimb ak kisen winiṅgamb. Nuk Biyomb yimb; yand bi yikop. Nup niṅen yip nambiṅ gip. Tomb tirup nup gok tunṅasikiṅg, tap nup gok marik

ginim rek ma ayip. Nuk apiy, Gor Kawnan yipund giy, mon manlan rek ak nimbip yokningamb.

¹⁷ “Pen nuk wiyt mangiy pikgek gipay rek ak giningamb. Wiyt mangiy ñinemb gok key ay, wiyt cheᅅg gok key ay giningamb. Kun giy, wiyt mangiy ñinemb gok dand korip nuk aminᅅgamb, cheᅅg gok dam mon per yin mindip ak yokningamb anᅅak.”

Herot Jon Nup Kalambis Ayak

¹⁸ Jon biynimb gok kuyip, Gor minim tep ak ar gunap anᅅen ninᅅrep giyan anᅅiy, minim tep kun ak rek sikoy ma anᅅyiniᅅip.

¹⁹⁻²⁰ Pen gapman biyomb Herot, tap siy tap timey okok gi dand amiy, numam Piyliyp biynuk Herodiyas nup kunep di gek, Jon, ak girep ma gip anᅅek, Herot ninᅅiy, nup dam kalambis ayak. Herot kisen timey gak ar bap mey kun ak.

Jon Jiysis Nup Ñinᅅ Pikñak (Mat 3:13-17; Mak 1:9-11)

²¹⁻²² Pen Jon nup kalambis ma ayak won ak, biynimb gok kuyip ñinᅅ pikñiyiniᅅip. Jiysis nup kunep ñinᅅ pikñek, nuk Nop Gor nup anᅅniᅅ mindakniᅅ, semb biyonᅅ liᅅg keykey amek, Gor Kawnan ak yakir kochir rek Jiysis ker wakniᅅ, minim bap semb biyonᅅ nimb apiy anᅅak, “Ñi tep yand! Nip ninᅅen yip tep yimb gip anᅅak.”

Jiysis Nusind Sikop (Mat 1:1-17)

²³ Pen Jiysis simiy nuk ak ñin jiwiy, andikiy onep ar ak amnakniᅅ, tikjak Nop Gor nup wonᅅ

ak gak. Biynimb gok Jiysis nup angninyak-en,
“Nop nuk mey; binak Josep angninyak.”

Josep nop ak Heliy.

²⁴ Heliy nop ak Matat.

Matat nop ak Liypay.

Liypay nop ak Melkay.

Melkay nop ak Janay.

Janay nop ak Josep.

²⁵ Josep nop ak Matatayas.

Matatayas nop ak Emos.

Emos nop ak Neyam.

Neyam nop ak Eslay.

Eslay nop ak Nagay.

²⁶ Nagay nop ak Mat.

Mat nop ak Matatayas.

Matatayas nop ak Semen.

Semen nop ak Josek.

Josek nop ak Joda.

²⁷ Joda nop ak Jowanan.

Jowanan nop ak Resa.

Resa nop ak Serababel.

Serababel nop ak Siyaltiyel.

Siyaltiyel nop ak Neray.

²⁸ Neray nop ak Melkay.

Melkay nop ak Eday.

Eday nop ak Kosam.

Kosam nop ak Elmandam.

Elmandam nop ak Yer.

²⁹ Yer nop ak Josiwa.

Josiwa nop ak Eliysa.

Eliysa nop ak Jorim.

Jorim nop ak Matat.

Matat nop ak Liypay.

³⁰ Liypay nop ak Simiyon.
Simiyon nop ak Jiwda.

Jiwda nop ak Josep.

Josep nop ak Jonam.

Jonam nop ak Eliyakim.

³¹ Eliyakim nop ak Meliya.

Meliya nop ak Mena.

Mena nop ak Matata.

Matata nop ak Netan.

Netan nop ak Depiyt.

³² Depiyt nop ak Jesiy.

Jesiy nop ak Obet.

Obet nop ak Bowas.

Bowas nop ak Salmon.

Salmon nop ak Nason.

³³ Nason nop ak Amiynadap.

Amiynadap nop ak Atmiyn.

Atmiyn nop ak Anay.

Anay nop ak Hesron.

Hesron nop ak Peres.

Peres nop ak Jiwda.

³⁴ Jiwda nop ak Jekop.

Jekop nop ak Aysek.

Aysek nop ak Ebrahim.

Ebrahim nop ak Tera.

Tera nop ak Nowa.

³⁵ Nowa nop ak Seruk.

Seruk nop ak Reyiw.

Reyiw nop ak Pelek.

Pelek nop ak Ebey.

Ebey nop ak Sela.

³⁶ Sela nop ak Keynan.

Keynan nop ak Apaksat.

Apaksat nop ak Siyem.
 Siyem nop ak Nowa.
 Nowa nop ak Lamek.
³⁷ Lamek nop ak Metiwsala.
 Metiwsala nop ak Yinok.
 Yinok nop ak Jaret.
³⁸ Jaret nop ak Makalalel.
 Makalalel nop ak Keynan.
 Keynan nop ak Enos.
 Enos nop ak Set.
 Set nop ak Andam.
 Andam nup mey, Gor gayak.

4

Seytan Jiysis Nup Yesek Angak (Mat 4:1-11; Mak 1:12-13)

¹⁻² Pen Jiysis Joden ñiņg mindiy andkind owakniņ, Gor Kawnan ak nup bak ay, dand miñmon nep namb okok amek, nuk tap ñimbiy mer; yikop nep mindek ñin omiņal jiwak. Pen nuk kun okok girangakniņ, Seytan minim yip ak niņaņ angyi, ap nup angak,

³ “Nand Gor Ñinuk mindiy ker, kamb biy angey biret rek ayek ñiņan angak.”

⁴ Angek, Jiysis nup pen angak, “Baybol buk ak tikiy angyak, ‘Biynimb gok biret nep ñimbiy ma mindeniņgambay angyak.’ ”

⁵ Angek, Seytan Jiysis nup dand miñmon yirik paryomb yimb bap amiy, miñmon okok mangiysek yimb yomiy

⁶⁻⁷ angak, “Miñmon teprep guniy niņan! Biyomb keykey kond mindpay. Yand miñmon

kun gok mangiysek kond mindpiyn rek, bi bap nup angning angningayn. Kun ak nand kongim yimiy yip angninengamban, miñmon kun guniy mangiysek nip angen, yimb yomb mindakniñ kond mindeningamban angak.”

⁸ Angek, Jiysis pen angak, “Nip ma nep angninngayn! Baybol buk ak tikiy angyak, ‘Biyomb chin Gor nup nep angninjiy, wong nup anep giñinimb angyak’ angak.”

⁹ Kun angek, Seytan Jiysis nup ponind Jerusalem amiy, dand Gor angninep korip yiy akyon giyak ar ak amiy angak, “Nand Gor Ninuk mindpiyn angyi, pindeng man biyan ayan!

¹⁰ Baybol buk ak tikiy angyak, ‘Gor enjol nuk gok angek nip kond mindeningambay.’

¹¹ Minim bap pen tikiy angyak, ‘Apyap pikning gey, nip dand araney, kamb tomb nip ak ma pikningamb angyak’ angak.”

¹² Seytan kun angek, Jiysis angak, “Biyomb Gor windin yirik ar ak, ñiñlon ay kun ak rek ma giningayn. Baybol buk ak, ‘Nup ñiñlon ma ayep angyi tikiyak’ angak.”

¹³ Seytan Jiysis nup minim tom gi mer ninjiy, kiring amiy, gos nuk okok nep, ‘Minek gunap, nup tip ak tom ginim angyi’ kasek ma andkind owak.

*Jiysis Miñmon Galiyliy Kiñin Giy Minim Angñak
(Mat 4:1-11; Mak 1:12-13)*

¹⁴ Pen Gor Kawnan ak Jiysis nup kond mindakniñ, andkind ap miñmon Galiyliy mindiy, key yimb gek ninjiy, minim nup ak ying dand, miñmon Galiyliy namb okok mangiysek amniyak.

15 Nuk Jiwda nan-gep korip okok amiy, minim anġrep gek, nup bi tep yimb anġiy, miñmiñ yimb giyak.

*Nasaret Biynimb Jiysis Nup Ma Diyak
(Mat 13:53-58; Mak 6:1-6)*

16 Pen Jiysis nuk miñmon Galiyliy namb okok giranġ diy, miñmon sikoy mindiy yomb gak Nasaret am mindek. Jiwda lotiw ñin ak apek, per giyinqip rek, nan-gep korip ak amiy, tikjakiy Baybol buk ak riytiym giningek,

17 nup bi Gor minim anġep Asaya tikak buk band ak dap ñey, di wisikiy, minim anġningek gak day ak niñiy, kuyip riyt giy anġak:

18 “Biyomb ak, wonġ nuk gunap yip gan anġiy, Kawnan nuk ak yokek yand yip mindip. Kun ak biynimb simbgeprek gok anġrep gen niñningambay. Biynimb kalambis rek mindipay gok wisik yoken amningambay. Biynimb windin koy rek mindipay gok gen niñningambay. Biynimb kosyam mindipay gok direp giningayn.

19 Pen Gor biynimb diningamb ñin tep ak, miñiy owip anġiy, biynimb gok kuyip anġñiningayn anġak.”

20 Jiysis minim kun ak riyt gi day jiwiy, buk band ak kom kom giy, bi buk kond mindyinqip anup tip ak ñiy bisgek, biynimb mindeyak gok mañgiysek windin ak jiwiy nup nep niñeyak, kuyip anġak,

21 “Asaya Biyomb anġek, per kond mindpim kun ak miñiy misen niñsipim anġak.”

22 Kun angek, minim tep yimb nuk angak ak niñiy, yimb nup ak dand araniyak. Pen gos bap niñiy angyak, “Bi kun biy Josep ñinuk rek?”

23 Kun angey, Jiysis kuyip angak, “Pen yand niñbiyn! Yip angningambim, ‘Nand Kiyñ yomb key yimb per kond mindpun ak, miñmon Kapaniyam mindiy, tap mageprek gey, yind achimal apek niñbun rek ak, miñmon nak biy kunep gey niñjun angningambim.’

24 Pen nimbip niñind aspiyn. Bi Gor minim angep gok, miñmon bapik okok tanjiy, minim tep ak angey, niñind apay anjiy dipay. Pen miñmon kiyk ak key ap angey, bi chin gok key aspays anjiy minim kuyip ak ma dipay.

25 “Pen niñim! Bi Gor minim angep Yilayja mindek ñin ak, simiy ominjal nokom takin onep kangol ak, miñmon ma yimb pikiy, tap ma jakiy, yiwan yomb sikerek yimb ak gak.

26 Yisrel biyn yandiw yiwan gak gok, kuñaynep mindeyak ak pen; Gor Yilayja nup yokek, am miñmon yomb Saydon miñmon sikoy Sareypar amiy, tap mageprek ak gek, biyn yandiw bap keñmanjiy nuk kuñaynep mindek.

27 Pen ar kun ak rek, kisen, bi Gor minim angep Yilayja mindek ñin ak, Yisrel biynimb soy ayndik ayak gok, kuñay yimb mindeyak ak pen; kuyip gunap gek sun ma ayak; bi Neman miñmon paryomb Siyriya nimb ak nep gek sun ayak angak.”

28 Jiysis kun angek, biynimb lotiw korip mindeyak gok niñey miluk timey yimb yapek,

29-30 nup yuk dam mindun okok yokon kuman anjiy, yukey amnakniñ, biynimb kuñay

mindeyak namb okok amiy kapkap amnak.

Jiysis Kichekiy Anḡ Mis Yokak
(Mak 1:21-28)

³¹ Nuk miñmon sikoy Kapaniyam Galiyliy propens ak am mindiy, Jiwda lotiw ñin ak apek, tikjakiy kuyip minim anḡnak.

³² Gor minim ak yiñrimey giy, yipund giy yimb nep anḡek, wal yimb anḡyak.

³³ Pen nan-gep korip namb kun ak, bi kichekiy ambanḡ ayak bap mindek. Nuk suk yomb anḡiy anḡak,

³⁴ “Bi Jiysis Nasaret nimb! Yerginiḡ opan? Chinup timey giniḡ opan rek ayip. Yand nip niñbiyn; Gor bi suḡ-tep nuk anep opan anḡak.”

³⁵ Pen Jiysis kichekiy ambanḡ ay mindek kun anup anḡak, “Minim ma anḡiy, bi ak kirgiy mis amnonḡ.” Anḡek, mis amyiḡ, bi nonim yipund giy anup, biynimb mindeyak namb siḡak diyokiy amnak ak pen, nup tapin ma pikak.

³⁶ Kun gek, biynimb niñmindeyak gok, kiyk nep anḡniḡ anḡniḡ giy anḡyak, “Bi kalrimey kun biy, minim kun ak akay nimb dand apiy anḡek, kichekiy gok mis ambay anḡyak.”

³⁷ Pen Jiysis gak minim kun ak, yiḡ dand miñmon kun okok maḡiysek amniyak.

Jiysis Biynimb Gek Suḡ Ayak
(Mat 8:14-15; Mak 1:29-31)

³⁸ Pen Jiysis Jiwda nan-gep korip ak kirgiy, Saymon korip ak amnak. Saymon biyn numok nuk ak tap yomb giy, mumbwak okok maḡiysek mon rek yinek mey, biynimb gok apiy Jiysis

nup angyak, “Apiy, Saymon numok nup gey, jak amnan angyak.”

³⁹ Angey, nuk biyn tap gek kum mindek mañ sinjak apiy angak “Tap gip biy suñ ayañ angak” Kun angakniñ, won anep suñ ayek, tikjakiy biynimb ap mindeyak gok kuyip tap keñmañgiy gak.

⁴⁰ Biynimb kun okok mindeyak gok, minim kun ak niñiy, pumb pañind amnak won ak, biynimb kiyk tap gak gok mañgiysek dand Jiysis mindek ak apeyak, kuyip nokom nokom diniñakniñ suñ ayak.

⁴¹ Pen biynimb malñiluk akañ, tap yerip ambañ ay mindek gok, angek mis amyiñg, nup niñyak rek suk yomb angyi angyak, “Nand Gor Ñinuk.” Kun angey, kuyip kun ma angnimimb angek, angak rek niñiy mis amniyak.

Jiysis Miñmon Wikan Gunap Amiy Kuyip Minim Anğñak

(Mak 1:35-39)

⁴² Minek miñmon yowakniñ, Jiysis miñmon kun ak kirgiy, key minden angyi, miñmon nep namb okok amnak. Amek, biynimb gok kisen amiy, nup piyow niñiy angyak, “Okok ma amnimin; chin yip mindon angyak.”

⁴³ Kun angey, Jiysis angak, “Gor yip angyokamb opiyn rek, am biynimb wikan gunap kuyip kunep, Gor biynimb diy kond mindeniñgamb rek minim ak angniñgayn angak.”

⁴⁴ Kun angyi, okok giranğyiñg, am Jiwdan gep korip okok amiy, minim tep kun ak kuyip anğñiyiñgip.

5

Jiysis Angek Piys Kunay Diyak
(Mat 4:18-22; Mak 1:16-20)

¹ Jiysis ñin bap am ñing Galiyliy chemb gol ak mindiy, Gor minim tep ak angnakniñ, biynimb kunay yimb nep, minim tep kun ak ninun angyi, chichmiy yimying wiyak.

² Kun giy wiyakniñ, Jiysis niñak, bi piys dep gok, bot omiñal dap ñing chemb gol kun siñak ay, piys dep wimben gok wasyim gi mindeyak.

³ Nuk Saymon Piyta bot ar ak pindeng ay angak, “Yip di nembnemb gey, ñing namb siñbindon amnan angak.” Angek, Saymon Piyta bot ak di nembnemb gek, ñing namb siñak amek, Jiysis bot ar kun ak bising mindying, biynimb gok kuyip minim angnak.

⁴ Minim angyiwiy, Saymon Piyta nup angak, “Bot biy pul gi dand ñing namb yomb siñbindon amiy, wimben ak yokiy piys dim angak.”

⁵ Angek, Saymon Piyta angak, “Biyomb. Miñiy kisyim biyan piys nen tanon tanon, miñmon yowip ak pen; piys gunap ma dipun. Nand kun apan ak, wimben ak monmon yokniñun angak.”

⁶ Kun angyi, wimben yokyakniñ, piys kunaynep apiy wimben miñgan ak amey, wimben ak aran-jakiy pungrikniñ rek gak.

⁷ Kun gek niñiy, numam bot ar bap mindeyak gok kuyip ñinan gek apeyak; piys kun gok diy, bot omiñal kun ak ayey, pisnep aran-jakiy, pongek yowning rek gak.

⁸⁻¹⁰ Kun gek niñiy, Saymon Piyta binuk yip bot ar mindeyak gok gos kunay yimb niñyak. Pen

Sebediy ñinuk Jemis yip, Jon yip, bot bap diy Saymon yip wonḡ jimñiy giyiḡgipiy ak, kunep gos kunay niḡrik. Pen Saymon am Jiysis mindek maḡ siḡak koḡim yimiy aḡgak, “Biyomb. Yand bi tap siy tap timey gipiy ak, nand key okok amnon aḡgak.” Aḡgek, Jiysis aḡgak, “Ma pirikninin. Miñiy ñin biy tikiy, bi piys dep ak kirgiy, bi biynimb dand Gor ker owep ak mindeniḡgamban aḡgak.”

¹¹ Kun aḡgek, bot ominal ak dam ñiḡḡ gol okok ay, piys tap gok kirgiy, Jiysis nup gosimb niḡiy, yip amiy tanḡyiḡgipay.

Jiysis Bi Soy Ayndik Ayak Bap Gek Suḡ Ayak

¹² Pen kisen Jiysis am miñmon yomb bap mindek, bi soy ayndik mumbwak okok maḡgiysek ayak bap, ap mindek maḡ siḡak koḡim yimiy aḡgak, “Nand yip gey suḡ ayniḡḡ, gey suḡ aynimur aḡgak.”

¹³ Aḡgek, nip gen suḡ ayniḡḡamb aḡgiy, nup diniḡakniḡ, suḡ ayak.

¹⁴ Suḡ ayek, bi kun anup aḡgak, “Jiysis yip diniḡek suḡ ayip ma aḡgninin. Mosis Baybol buk ak tikiy aḡgak rek, soy ayndik yip ak suḡ ayip aḡgiy, am bi Gor nup simbonḡipay gok kuyip yomey, kiyk niḡiy, niḡind apan aḡgey, am siypsiyp ñiluk bap kim tiwniḡḡ dap kuyip ñiyiḡḡ aḡgninin, ‘Yip suḡ ayip rek, Gor nup simbonḡim aḡgiy, siypsiyp ñiluk biy daswiyn aḡgninin.’ Kun gey, biynimb maḡgiysek niḡiy aḡḡniḡḡambay, ‘Nup suḡ ayip rek kun gip aḡḡniḡḡambay.’”

¹⁵ Pen Jiysis nup minim ak, miñmon okok kind kind amek, biynimb kunaynep, nup niḡun aḡgiy

apyiŋgipay. Biynimb kun gok, gunap minim tep nup ak niŋning apyiŋgipay; gunap chinup gek suŋ ayaŋ aŋgiy apyiŋgipay.

¹⁶ Apey, kuyip minim tep aŋgñiy, gek suŋ ayiŋgip. Pen ñin gunap nuk am tip bap key mindiy, Nop Gor nup aŋgniŋ mindyiŋgip.

Jiysis Bi Ñin Tomb Kalaw Gak Ak Gek Suŋ Ayak

¹⁷ Ñin bap Jiysis biynimb gok kuyip minim aŋgñi mindek. Pen namb kun ak, bi Peresiy gunap, bi low tiysa gunap ap biŋiŋ mindeyak. Bi kun gok, gunap miñmon yomb Galiyliy keykey okok nimb; gunap Jiwdiya keykey okok nimb, gunap Jerusalem nimb wiyak. Pen Jiysis Nop kond mindek ak mey, biynimb tap gak gok gek suŋ aynimuŋ rek ayak.

¹⁸ Pen bi gunap, bi ñin tomb kalaw gak bap nup, Jiysis mindek korip miŋgan ak dand amon, gek suŋ ayaŋ aŋgiy,

¹⁹ yirar ay dand amiy niŋyak: biynimb gok korip miŋgan kun ak pisnep timbikdak. Kun gek, bi yirar ay dand wiyak kun ak, dand korip ar biyoŋ amiy, korip ak tuŋgyikiy, Jiysis mindek namb siŋak yokey annak.

²⁰ Kiyk nuk gek suŋ aynimuŋ rek ayip aŋgiy niŋeyak, Jiysis bi ñin tomb kalaw gak anup aŋgak, “Mam. Tap siy tap timey gach nip chiŋgip ak, niŋiy kirsipiyn aŋgak.”

²¹ Kun aŋgek, bi Peresiy gok sek, bi low tiysa gok sek, gos namb kiyk okok nep key niŋiy aŋgyak, “Bi kun biy an? Nuk Gor nup aŋgiwiyiŋg asap. Gor nep mey, tap siy tap timey gach ak, niŋiy kirginimuŋ rek ayip aŋgyak.”

²² Pen gos niṅyak kun ak, Jiysis key tik niṅiy aṅgak, “Nimb yenen yip gos timey niṅiy kun aspim?”

²³ Yand bi ñin tomb kalaw gip biy nup, “Tap siy tap timey nip chingip gach ak, wiykyokpiyn aṅgnim?” Akan; ‘Nip suṅ ayip nen; tikjakiy amnon aṅgnim?’ Akan, minim yerip ak anṅen, nimbip tep giningamb?”

²⁴ Pen niṅrep yimb ginimimb! Minim nup apiyn kun ak, kiñiṅ ak mindip. Bi bap Ñinuk Nop minim ak diy mey; man ar biy apiy, tap siy tap timey gipay gach ak wiykyokningamb aṅgak.”

Kun aṅgiy, bi ñin tomb kalaw gak anup aṅgak, “Miñiy nip suṅ ayip nen; tikjakiy yirar band ak dand andkind korip amnon aṅgak.”

²⁵ Kun aṅgek, biynimb gok niṅmindyakniṅ, won kun anep tikjakiy, nup yirar ay dand wiyak band ak diy, Gor nup tep aṅgiṅ, korip nuk amnak.

²⁶ Kun gek, niṅiy jiwdiy, Gor nup yimb ak dand aranyiṅ, miñiy key yimb gamb niṅsipun aṅgiy wal aṅgiy.

Jiysis Liypay Nup Dak

(Mat 9:9-13; Mak 2:13-17)

²⁷ Pen kisen Jiysis amiy niṅak: bi takes dep ak, takes pikyṅgipay korip miṅgan ak biṅiṅ mindek. Yimb nuk ak Liypay. Jiysis nup niṅiy aṅgak, “Apey, yand yip taṅgor aṅgak.”

²⁸ Aṅgek, wong giyṅgip kun ak kirgiy, tap nuk gok maṅgiyseki kirgiy, Jiysis yip taṅgiṅgipiy.

²⁹ Pen Liypay, Jiysis nup tap yomb ak korip nuk ak danṅiy ay, bi takes dep gunap, biynimb

yikop gunap suk angek apeyak, kiy yip bisgiy tap ñinyak.

³⁰ Pen Jiysis kiy yip tap ñimbek ninjiy, bi Peresiy gunap, low tiysa kiyk gok sek ap, Jiysis binuk gok kuyip angyak, “Nimb yenen bi tap siy diy, bi takes diying maniy siy dipay gok yip bisgiy tap ñimbim?”

³¹ Kun angeyak, Jiysis kuyip angak, “Biynimb kim mindpun apay gok, dokta ninning ma ambay; biynimb tap gip gok nep, chinup gek sun ayan angyi, dokta ninning ambay.

³² Kun ak rek, yand biynimb tep tep gok kuyip dining ma opiyn; biynimb tap siy tap timey giy, mindrep ma gipun angyi ninningambay biynimb gok kuyip dining opiyn angak.”

Lotiw Gos Ak Nep Ninjiy Tap Ma Ñinyak
(*Mat 9:14-17; Mak 2:18-22*)

³³ Biynimb gunap Jiysis nup angyak, “Jon binuk gok yip, Peresiy bi kiyk gok yip ñin gunap, Gor nup gos nokom ninjun angyi, tap ma ñimbiy yiwan nep mindiy, Gor nup angninbay. Pen binak gok yenen tap ñimbying, ñing ñimbying nep mind-pay?”

³⁴ Kun angeyak, Jiysis kuyip tikdam ay angak, “Chin Jiwda biynimb gipun ar ak; bi bap biyn dining gek, binuk gunap tap yomb ninning geningambay, biynimb gunap pen tikjakiy, yenen kun gispim angyi, ma angningambay.

³⁵ Pen kisen biyomb kiyk ak nup ñang ayeningambay mey, simb gek tap ma ninningambay angak.”

³⁶ Pen Jiysis, Jiwda biynimb minim nind angyingipay ak, minim yand kisen dand ownik ak sesek wopsakningiy rek ayip angyi, kuyip minim gunap paydon ay angak, “Chech nindnimb ak talikek, chech kisenimb bap tungralikiy, dap ñangdey, andip andip ma mindeningamb. Keykey yimb ay, omiñal giy timey yimb giningamb.

³⁷ Pen ñing wayn ak kunep; ñing wayn kim ak diy, kanj meymey wak milip miñgan ak ma sopay. Yenen: songiy simjen ñeningambay, tan araniy, biñ timey yimb angyi pungrikiy songek, meymey wak ak timey giningamb.

³⁸ Kun ak ninjiy mey, ñing wayn kim ak diy, meymey wak kim miñgan ak nep song ayep.

³⁹ Pen biynimb ñing wayn nindnimb ñimbay gok apay, ‘Ñing wayn nindnimb ak tep yimb angyi,’ ñing wayn kim kisenimb ak ninjey, kuyip tep ma gip angak.”

6

Lotiw Ñin Ak Yenen Kun Gispim Angyak (Mat 12:1-8; Mak 2:23-28)

¹ Kisen Jiwda lotiw ñin bap, Jiysis binuk gok yip wiyt wonğ namb ak amying, binuk gok wiyt mangiy kun gok gunap tik ñin beñ okok ay, wak pikyokiy ñimbying ñimbying amniyak.

² Kun geyak, bi Peresiy gunap ninjiy angyak, “Nimb yenen lotiw ñin wonğ magep biy, wiyt mangiy wak pik yoksipim?”

³⁻⁴ Angeyak, Jiysis binuk gok giyak kun ak timey ma giyak ak ninjiy, bi Peresiy kun gok kuyip

angak, “Depiyt wosrey binuk gok yip yiwan gek, Gor angninep korip ak amjakij, biret Gor windin yirik ar ak ay, bi yikop ma ñimbay; bi Gor nup simbonpipay gok nep ñimbay biret ak, Depiyt angninek, nup ñey, binuk gok yip ñinyak. Kuyip yiwan gek giyak kesim kun ak, Baybol buk tikyak ak, nimb ma ninbim?”

⁵ Pen lotiw ñin apim ak, bi bap Ñinuk nep kond mindip angak.”

Jiysis Bi Ñin Pipich Gak Ak Gek Sun Ayak
(*Mat 12:9-14; Mak 3:1-6*)

⁶⁻⁷ Pen Jiwda lotiw ñin kisen bap, Jiysis Jiwda nan-gep korip ak amiy, kuyip minim angninying mindek. Korip miŋan kun ak, bi ñin pipich gak bap ap mindek. Bi Peresiy gok sek, bi low tiysa gok sek bi kun ak nup ninyak rek, Jiysis lotiw ñin biy gek sun ayningamb akan yergek, nup anŋ gun anŋiy, ninjinysek ay mindeyak.

⁸ Pen gos ninyak kun ak, Jiysis key ninij, bi ñin pipich gak anup angak, “Nand jakij namb sinbij owan angak.”

⁹ Angek, jakij owaknij, nuk bi Peresiy gok sek, bi low tiysa gok sek kuyip angak, “Yikop mindep ñin biy rek, biynimb gok kuyip direp giningambun akan; lotiw ñin anŋiy kuyip kirginingambun? Akan pen, kuyip gon ma jak amningiy; kirgon kumningiy?”

¹⁰ Kun anŋiy, kuyip ninjukus giy, bi ñin timey gak anup angak, “Ñin ak almil ayan!” Angek, almil ayaknij, day sun ayak.

¹¹ Jiysis bi kun anup gek sun ayek ninij, bi Peresiy gok sek, bi low tiysa gok sek kuyip miluk

yimb yapek, Jiysis nup yerginjun angyi, angnin angnin gi mindeyak.

*Jiysis Binuk Onep Wimingan Ak Dak
(Mat 10:1-4; Mak 3:13-19)*

¹² Pen ñin namb kun sinjak ñin bap, Jiysis Nop nup angninjin angyi, dum akyon amiy, Nop nup angnin mindek mindek, miñmon yowak.

¹³ Minek pumb waknin, biynimb nuk gok mangiysek angek apeyak, binuk onep wimingan ak kuyip tungasik key ay, kuyip bi minim yip dand amemb gok mindeningambim angyi, angyak.

¹⁴⁻¹⁵ Binuk angyak kun gok yimb kiyk mey; Bap Saymon. Jiysis yimb nup bap ay, “Piyta” angak.

Bap Enjriw. Saymon numam nuk ak.

Bap Saymon yimb along, Saymon Selot angyak.

Bap Jemis.

Bap “Jemis Alpiyas” angyak.

Bap Jon.

Bap Piyliyp

Bap Batlomiwiw.

Bap Matyiw

Bap Tomas.

¹⁶ Bap Jiwdas. Nop yimb ak Jemis.

Bap “Jiwdas Yiskariyot” angyak. Nuk nep mey, kisen Jiysis nup ñanngyan angyi mimunggak.

*Biynimb Kunaynep Jiysis Amnaknin Kisen Amniyak
(Mat 4:23-25)*

17 Pen Jiysis biynimb nuk kun gok yip, dum biyon kirgiy, am giw tep biyan mindyakniñ, biynimb kuñay yimb nep, nup niñun angyiy ap nan-giyak. Biynimb kun gok gunap Jerusalem nimb, gunap Jiwdiya namb okok nimb, gunap miñmon nambiys Taya nimb, gunap miñmon nambiys Saydon nimb.

18 Pen biynimb wiyak kun gok, gunap Jiysis minim nup ak niñning wiyak; gunap tap gek, chinup gek suñ ayan angyiy wiyak. Pen biynimb kichekiy amban ayek mindrep ma giyak gok, chinup gek suñ ayan angyiy, kunep wiyak.

19 Kiyk kun giy apiy mey, Jiysis nup diniñon, chinup suñ ayniñgamb angyiy, ap diniñyakniñ kuyip suñ ayak.

*Biynimb Simb Gip Gok Kisen Miñmiñ
Giniñgambay*

(Mat 5:1-12)

20 Jiysis binuk gok kuyip niñyiq angak, “Nimb biynimb simbgeprek mindpim gok, Gor nimbip diy kond mindeniñgamb!

21 “Nimb Gor biynimb tep nuk mindenjun angyiy, mindmangyiy piñyñimb gok, biynimb nuk yimb mindeniñgambim!

“Nimbip miñiy yiwan yomb gip gok, kisen yiwan ma giniñgamb!

“Nimbip simb gek siy angmindpim gok, kisen tep gakniñ, miñmiñ giyiñg mindeniñgambim!

22 “Bi bap Ñinuk nup chingiy mindem, nimbip yiruk niñy, ‘Biynimb timey kun guniy, an yip mindeniñgambim angyiy,’ nimbip yimb timey ay angyiweniñgyiy, miñmiñ yimb ginimimb.

23 Giniᅅgambay kun ak nusind yes kiyk gok, bi Gor minim aᅅep gok kuyip, giyᅅᅅipay rek nep nimbip giniᅅgambay. Kun ak niᅅiy, Gor chinup direp yimb giniᅅgamb miᅅmon nuk biyoᅅ aᅅiy tep gakniᅅ, ᅅin beᅅ pikyᅅᅅ, miᅅmiᅅ giyᅅᅅ mindenimimb!

24 “Pen nimb biynimb maniy tap okok kuᅅay mindip gok, niᅅrep yimb ginimimb! Tap nimbik dep rek ak man ar biy pisnep dipim.

25 Pen nimb miᅅiy tap rek ᅅimb gem gem koᅅᅅiy tanimb ak, kisen yiwan yomb giniᅅgamb ak niᅅ-tep ginimimb! Pen miᅅiy sik minim aᅅyᅅᅅᅅ mindpim ak, kisen simb gek siy aᅅmideniᅅgambim!

26 “Pen nimbip yimb dand aranyᅅᅅ nep mindeniᅅgambay ak, niᅅrep yimb ginimimb. Nusind yes kiyk gok, bi Gor minim yesek aᅅyᅅᅅᅅipay gok kuyip, kun ak rek giyᅅᅅipay aᅅgak.”

Biynimb ᅅaᅅep Nimb Gok Kuyip Wasemb Aynimimb

(Mat 5:38-48)

27 “Pen biynimb minim yand aᅅᅅen niᅅsipim guniy. Biynimb nimb yip penpen gep gok kuyip wasemb aynimimb.

Biynimb nimbip miluk niᅅbay gok kuyip direp ginimimb.

28 “Biynimb gunap, nimbip kunj timey geᅅᅅiy, kuyip pen wasemb aynimimb.

“Biynimb gunap, Gor nimbip timey ginimun aᅅᅅeniᅅᅅiy, nup aᅅᅅniᅅem, kuyip kond mindonimun.

29 “Pen biynimb gunap, nimbip mikem pis ak pikeningiy, andikem, piskind ak kunep pikningiy.

“Pen biynimb gunap, kolsiyor nimbip ak deningiy; tingliys ak kunep dim angyi, monmon ñinimimb.

30 “Biynimb gunap, tap nen asimb angeningiy, niñind apim angyi ñinimimb.

“Pen tap nimbip bap niñiy deningiy, chinup jiwñan angyi ma angnimimb.

31 “Chinup giyañ angyi niñbim rek nep, biynimb gok kuyip ginimimb.

32 “Biynimb nimbip wasemb aypay gok nep wasemb ayningambim ak, yergiy Gor nup tep giningamb. Biynimb tap siy tap timey gipay gok, biynimb kiyk key gok penpen wasemb aypay.

33 “Pen biynimb nimbip direp gipay gok nep direp giningambim ak, Gor nimbip yergiy niñek tep giningamb. Giningambim kun ak, biynimb tap siy tap timey gipay gok, gipay rek nep giningambim.

34 “Tap ñon pen ñiningambay angyi, gos anep niñiy tap ñiningambim ak; Gor nimbip yergiy niñek tep giningamb. Giningambim kun ak, biynimb tap siy tap timey gipay gok, gipay rek nep giningambim.

35 Kun ak biynimb nimb yip penpen ñanrep gok wasemb ay, direp giy, tap monmon ñinimimb. Chinup pen ñiningambay angyi, gos ak ma niñnimimb. Nap yomb jel gip ak gip rek geningambim mey; nimbip sakiy ma giningamb. Nuk biynimb tap siy tap timey gipay gok sek, nup tep ma apay gok sek kuyip kond mindip.

36 “Nuk biynimb simb ninjy dip rek, nimb kunep ginimimb.

Chin Biyomb Anjiy Biynimb Gok Kuyip Ma Anjiwnimimb

37 “Pen chin biynimb tep anjiy, biynimb gunap kuyip gos timey ninjningambim ak, minim kun ak andkind nimbip ker winjngamb.

“Biyimb nimbip timey gipay gok ninjy kirgenjngambim, Gor pen tap timey nimb gipim gok ninjy kirginingamb.

38 “Tap nimb gok mapin kamb ma giy, biynimb gok kuyip monmon ñeningambim mey; Gor nimbip pen kunep ñiningamb. Pen mapin kamb giy, sikoy sikoy nep ñeningambim, Gor nimbip pen kunep giningamb angak.”

39 Pen Jiysis minim bap paydon ay angak, “Bi windin koy bap, bi windin koy bap nup kinjen ak mindip kun anjiy, ma yomningamb. Yenen, nuk kun gek, ominal giy kaw mingan ak apyap pikningayr.

40 “Biyimb sikul apay gok, am sikul apay won ak, tiysa kiyk gok kuyip wiyniym ma gipay. Pen kisen sikul ak anj tep giy mey; tiysa kiyk gok yip andip andip mindeningambay.

41 “Yenen mon bopis windin nimbip pik yiw giy mindip ak ninjngiy mer, namam tap achip windin nup mindip anep ninjapim?

42 Mon bopis yomb nimbip pik yiw giy mindip ak diyokem, windin yimb ayek rek, yesek namam tap achip sikoy windin nup mindip ak ‘Diyokan anjiy apim.’

*Mon Bind Tep Akan Timey Anġiy Niņningambay
(Mat 7:17-20; 12:33-35)*

⁴³ “Pen mon teprep bind ak maņġiy timey ma piyp. Mon timey bind ak, maņġiy tep ma piyp.

⁴⁴ Kun ak mon gok piyek niņiy, mon ak tep; mon ak timey anġiy niņbay. Mon ñiwñiw sek sanġandlem rek gok, mon tep kondyap rek ma piyningamb.

⁴⁵ Biynimb mindrep gipay gok, namb kuyip biyaņ tep mindip rek, mind tep gipay. Biynimb mindrep ma gipay gok, namb kuyip biyaņ mindrep ma gip rek, mind tep ma gipay. Pen biynimb yerip rek mindpay ak, minim kiyk anġey niņiy; biynimb gok tep, biynimb gok timey anġiy niņningambun.

*Bi Korip Gep Omiņal
(Mat 7:24-27)*

⁴⁶ “Yip Biyomb chin, Biyomb chin, apim ak pen; minim apiyn ak kisen ma gipim.

⁴⁷ Biynimb minim yip ak niņiy, apiyn rek gipay gok;

⁴⁸ bi man kilis ar ak korip gek, ñiņ wilik apiy ma dand amnak rek ak mindpay.

⁴⁹ Pen minim yip niņiy kisen ma gipay gok, bi man sayn ar ak korip gek, ñiņ wilik apiy, pisnep tunġjispuk giy, dand amnak rek ak mindpay anġak.”

7

*Jiysis Bi Wong Giņemb Bap Gek Suņ Ayak
(Mat 8:5-13)*

1 Jiysis biynimb kun gok kuyip minim angn̄ndiy, Kapaniyam amnak.

2-3 Pen miñmon tinjon kun okok, biyomb amiybi kunaynep kond mindyinjip bap mindek. Nuk minim bap ninak: Jiysis ap Kapaniyam mindek. Kun ak ninij, Jiwdiya miñmon nop nimb biyomb gunap angyokiy angak, “Bi tep wonj yip giñemb ak, tap giy kumning gisap nen, nimb am Jiysis nup ponind apem, gek sun ayan angak.”

4-5 Angek, Jiysis mindek ak apiy, kilis giy angyak, “Amiybi kond mindep ak, bi tep yimb. Chinup Jiwda biynimb gok per kond mind tep giy, nan-gep korip chinup bap gak. Kun ak nand bi wonj giñemb nup ak am gey, sun aynimun angyak.”

6 Angey, Jiysis bi kun gok yip am am korip sinak man man giyakniñ, amiybi kond mindep kun ak, minim bap pen, bunjiy nuk gunap kuyip angyokek, am Jiysis nup namb pikiy angyak, “Biyomb ak nip angip, ‘Biyomb! Yand bi tep mer, korip yip ak tomb yiwur ma winimun.

7 Yand bi tep rek nip ker ninim. Pen yand ninbiyn; Gor nip bak ay mindip ak, sun ayan angiy minim anep angenimin, bi yip tap gip biy sun aynimun.

8 Kond mindep yomb yimb yand ak yip kond mindek; yand pen, amiybi gok kuyip kond mindiy, “Amnim!” angen ambay; “Wim!” angen opay; wonj ak kun kun giy gim angen gipay angip’ angyak.”

9 Kun angeyak Jiysis, bi kun ak gos nuk key ninij angip angiy, wal angying, biynimb nup kisen giy

apeyak gok kuyip angak, “Amiybi Rom nimb ak, yip gosimb niñmindiy, chinjrep yimb gip. Yisrel biynimb gunap, yip gos niñrep giy gip kun ak rek gey, ma niñbiyn angak.”

¹⁰ Pen amiybi kond mindep ak, binuk gok andkind amiy niñyak; Jiysis par okok nep mindiy angek, bi tap gak kun ak pisnep suñ ayak.

Jiysis Biyn Yandiw Ak Ñinuk Nup Gek Tip Ak Tikjakak

¹¹ Ñin namb kun siñak nep, Jiysis dawin sikoy Nayn amniyn angyi amnakniñ, binuk gok sek, biynimb yikop gok sek kuñaynep, nup kisen giy amniyak.

¹² Am am miñmon kun ak, kinjen day ak amjakyakniñ, biyn yandiw bap ñi nokom tikak ak kumek, biynimb kuñaynep yirar ay dand apeyak.

¹³ Jiysis biyn yandiw kun anup niñek, simb gek angak, “Siy ma angan!”

¹⁴ Kun angyi, chip yirar ay dand apeyak ak am diniñakniñ, lum siñak dayak. Day niñmindyakniñ, Jiysis bi paranj kun anup angak, “Ñi tikjakan!”

¹⁵ Angek, tikjak bisgiy minim angakniñ, nonim nup, “Ñinak ak biy angak.”

¹⁶ Pen biynimb niñmindeyak gok gos kuñay niñiy, Gor nup yimb ak dand aranying angyak, “Gor bi minim nup angep yomb bap yokamb, chinup ker wip. Gor chinup aymindniñ wip angyak.”

¹⁷ Pen Jiysis gak kun ak niñiy, kesim dey, miñmon Jiwdiya amiy, miñmon yikop okok amiy gak.

*Jon Bi Ñiņg Pikñemb Binuk Omiņal Jiysis Nup Niņniņg Amnirik
(Mat 11:2-6)*

¹⁸ Jon binuk gok, Jiysis gak rek maņgiysek niņiy, am Jon nup aņgñeyak, Jon binuk omiņal aņgek aperik aņgak,

¹⁹ “Nirmiņay am nup aņgniņiy aņgnimiyr, ‘Nand Kiyņ yomb key yimb kond mindpun anep opan akaņ, bi kun ak key kond mindenjun aņgnimiyr’ aņgak.”

²⁰ Aņgek, Jiysis mindek ak amiy aņgrik, “Jon bi ñiņg pikñemb ak nip aņgip, ‘Nand Kiyņ yomb key yimb kond mindpun ak nep opan akaņ, bi kun ak key kond mindonjun aņgiy,’ chirup aņgyokek, nip aņgniņniņg aswur aņgrik.”

²¹ Pen kiykmiņay kun aņgiy niņmindrikniņ, Jiysis biynimb miñak ar keykey gak gok gek suņ ayak. Biynimb tap gak gok, gek suņ ay, windin koy gak gok, gek windin yimb ay, biynimb kichekiy malñiluk ambaņ ay mindek gok, gek biynimb yimb ay gak.

²² Kun giy, Jiysis bi omiņal kun ak kuyip aņgak, “Nirmiņay andkind amiy, Jon nup aņgnimiyr, ‘Chir amiy niņbur: bi kun ak biynimb windin koy gip gok, gek windin yimb ay; biynimb ñin tomb soy ayndik ayip gok, gek suņ ay; biynimb timund sakiy ayip gok, gek suņ ay; biynimb kumbay gok, gek tip ak tikjakiy; biynimb simbgeprek gok, minim tep nuk ak aņgek niņbay aņgnimiyr’ aņgak.

²³ Pen minim bap aņgnimiyr, ‘Biynimb yip gosimb niņiy, chiņgiy nep mindeniņgambay gok, miñmiñ yimb giniņgambay aņgnimiyr’ aņgak.”

24 Kun angek, bi Jon nup minim dand orik ominjal ak andkind amnirikniņ, Jiysis biynimb ap mindeyak gok kuyip, Jon nup minim ar ak anġiy anġak, “Nimb nind miñmon nep namb okok ambik ñin ak, yergining ambik? Sund par nokom bap yinġen diy, dand amiy apiy gek ak niņning ambik?”

25 Akan yenen ambik? Bi chech tep ayak bap niņning ambik? Bi chech tep yimb diy, tap tep tep dun anġiy niņbay gok, mindpay biyomb korip okok nep.

26 Pen tap yerip ak niņning ambik? Yikop ma ambik! Bi Gor minim anġep, Jon nup nep niņning ambik. Nuk bi Gor minim anġep yikop bap mer; woņg bap key mindek, Gor nup anġek ap minim anġñak.

27 Bi Gor minim anġep kun anup mey, wosrey Baybol buk ak tikiy anġyak, ‘Gor anġip, “Bi minim anġep yand ak anġen, nind amiy, biynimb gok anġrep gek, kisen Ñi yand ak anġen niningamb anġip” anġiy’ tikiyak.

28 Nimbip aspiyn, Jon biynimb nind mindyningipay gok yip, miñiy mindpay gok yip maņgiysek wiyniym gip ak pen, Gor biynimb yikop diy kond mindeningamb gok, Jon rek ma mindeningambay; kiyk biynimb yomb mindeningambay anġak.”

29 Jiysis minim anġak kun ak; biynimb yikop gok sek, bi takes dep gok sek nind apey, Jon kuyip ñiņ pikñek, Gor nup yimb ak dand araneyak mey kun anġak.

30 Pen bi Peresiy gok sek, bi Jiwda low tiysa

gok sek alemb alemb ñiy, Gor minim tep ak ma diyak rek, chinup ñiņg ma pikñiningamb anġey mey, kuyip ñiņg ma pikñak.

³¹⁻³² Jiysis kun anġiy, kuyip anġak, “Nimb biyn-imb miñiy, ñin namb biy mindpim gok, ñapan sikoy gok silpiņ ñiyiņg, gunap apay, ‘Dachiņ pikon, yenen koņgim ma papim? Pen kamep simbgeprek anġon, yenen siy ma apim apay’ rek ak gipim. Nimb niņem, Jon gak ak tep ma giy, yand gipiyn ak tep ma giy gip.

³³ Jon bi ñiņg pikñemb ak, ap tap ma ñimbiy, ñiņg wayn ma ñimbiy gek, nup anġjiwiy anġyiņgipim, ‘Bi kichekiy malñiluk ambaņ ayek mindip ak anġyiņgipim!’

³⁴ Pen miñiy bi bap Ñinuk apiy, tap ñimbiy, ñiņg wayn ñimbiy gek, nup anġjiwiy apim, “Tap kuņay ñimbiy, ñiņg wayn ñimbiy gip ak mey; nuk biynimb tap siy tap timey gipay gok sek, bi takes dep gok sek bi kiyk apim.”

³⁵ Pen, biynimb Gor miñ ar ak, chinup tep gip anġiy niņbay gok nep, ar kun ak ambay anġak.”

Kinjenram Biyn

³⁶ Bi Peresiy bap, yimb nuk Saymon. Nuk Jiysis nup anġak, “Apey korip yand ak am tap ñiņjur anġak.” Anġek, Jiysis korip nup ak amiy tap ñiņrikniņ,

³⁷ kinjenram biyn miñmon kun ak nimb ak, minim bap niņak; Jiysis ap bi Peresiy ak yip tap ñimberik. Kun ak niņiy, wel kuy tep wak, kamb botol diy paryak ak dand apiy,

³⁸ Jiysis mindek kund okok ken amiy, tomb anġin ak bisgiy, siy anġ mindek. Kun giy, siy

ang mindakniņ, siy ñiņg ak tik Jiysis tomb ar ak yapek, jun kas nuk ak wiykyokiņg, tomb kind nup ak wel ayñiy, bom silokyiņg silokyiņg mindek.

³⁹ Kun gek, bi Peresiy ak gos nuk anep niņiy angak, “Bi kun biy, bi Gor minim angep yipund giy mindembikop rek, biyn kinjenram ker ap nup diniņsap ak, tik niņbikop angak.”

⁴⁰ Jiysis bi Peresiy gos niņak kun ak niņiy, nup angak, “Saymon! Minim nip nokom bap angniņg gispiyn angak.”

Angek, Saymon angak, “Tiysa. Minim kun ak angan angak.”

⁴¹ Angek, Jiysis tikdam ay angak, “Bi bap tik-jakiy, bi omiņal kuyip, bap nup payp handret kiyna ñiy, bap nup piyptiy kiyna ñiy, giņiņgamb.

⁴² Pen kisen bi omiņal kun ak, pen ñemb rek ma ayek, bi maniy ñiņiņgamb kun ak, kuyip-miņay angniņgamb, ‘Maniy nirip ñimbiyn ak, pen ñiņjur angiy gos ak ma niņnimiyr angniņgamb.’ Kun angek, bi an bi kun ak nup miñmiñ yimb giņiņgamb? Bi tap day yomb mindeniņgamb ak akan, bi tap day sikoy mindeniņgamb ak?”

⁴³ Angek, Saymon angak, “Gos yand niņbiyn ak, bi tap day yomb mindeniņgamb ak angak.” Angek, Jiysis angak, “Niņind yimb apan angak.”

⁴⁴ Kun angiy, Jiysis andikiy biyn anup niņyiņg, Saymon nup angak, “Biyn biy nup niņan! Yand korip miņgan nip biy apen, ñiņg ak diy tomb yip ak ma wasyim gipan; biyn biy yip miñmiñ giyiņg, siy ñiņg nuk ak tik yapek wasyim giy, jun kas nuk ak wiykek milip gip.

⁴⁵ Yip ma bom silokpan; biyn biy nep apiy tomb kind yip ak bom silokip.

⁴⁶ Yip wel ak ma ayñimban; biyn biy nep tomb kind yip ak, wel kuyrep wip ak ayñimb.

⁴⁷ Kun ak nip aspiyn: biyn kun biy tap siy tap timey kuñaynep gip ak niñiy kirgen, yip pen direp yimb gip. Pen biynimb tap siy tap timey siskoy gipay gok niñiy kirgen; yip pen direp ma gipay angak.”

⁴⁸ Kun angyi, biyn kun ak nup angak, “Tap siy tap timey gipan ak, niñiy kirpiyn angak.”

⁴⁹ Kun angek, bi nund yip tap ñimbeyak gok, kiyk key angnin angnin giy angyak, “Bi kun biy yenen, “Tap siy tap timey gipim ak niñiy kirsipiyn asap?’ Gor nep mey kun gipkop angyak.”

⁵⁰ Kun angyak ak pen, Jiysis biyn kun anup angak, “Gos nand anep, tap siy tap timey gipiyn rek, Jiysis niñiy kirgan angyi opan ak, nip niñiy kirsipiyn nen, andkind amiy, Gor ñin ar ak min-denimin angak.”

8

Biyn Gunap Jiysis Yip Amniyak

¹ Pen kisen ñin namb kun siñak, Jiysis binuk onep wimingan ak yip, miñmon yomb miñmon sikoy okok amiy, Gor biynimb nuk diy kond min-deningamb minim tep ak, biynimb okok kuyip angnak.

² Pen ñin kun ak, biyn tap gek, Jiysis gek sun ayak gunap, kichekiy malñiluk sek mindey, nuk gek biyn yimb ayak gunap, yip tangyingipay. Biyn kun gok yimb kiyk mey, bap “Makdala biyn

Mariya” angyingipay. Nup kichekiy onep ar ak mindek Jiysis angyokak.

³ Biyn bap Jowana. Nunyumiy yimb ak Chiwsa. Nuk biyomb Herot korip tap nup gok kond mindyngip. Biyn bap Siwsana. Kiyk biyn yikop gunap yip, maniy kiyk gok key dam tap taw dand apiy, Jiysis binuk gok yip, tap jimñiy ñimbyng girangyngipay.

*Wiyt Manjiy Yimbay Anjiy Paydon Ay Angak
(Mat 13:1-9; Mak 4:1-9)*

⁴ Biynimb miñmon keykey, tiwin gok tiwin gok, Jiysis nup niñning kisen wiyakniñ, biynimb nind wiyak gok kuyip, minim bap paydon ay angak,

⁵ “Bi bap wiyt jakañ anjiy, wiyt manjiy ak dam wonḡday okok yokeningamb, gunap kinjen kosemb ar ak yapek, biynimb gok taw amiy apiy gey, yakir gok pen ap niñiy ñiñningambay.

⁶ Gunap kamb ar man siskoy ayningamb okok yapiy, gup giningamb ak pen, kindiy am wos ma giningamb rek, pisnep milip giningamb.

⁷ Pen gunap, kikasik dindbiliñ namb okok yapeningamb, tap kun ak saw giy, yiwiñg dek, ma jakningamb.

⁸ Pen gunap, lum teprep okok yapiy, jakrep yimb giy, manjiy kuñay yimb nep piyningamb angak.”

Jiysis kun anjiy angak, “Nimb biynimb gos timund sek mindenimimb gok, minim aspiyn biy niñnimimb angak.”

*Paydon Ayak Minim Ak Misen Angak
(Mat 13:10-17; Mak 4:10-12)*

⁹ Kun angek, binuk gok nup angninij angyak, “Minim paydon ay angambaran kun ak, minim junj nuk yergiy mindip?”

¹⁰ Angey, Jiysis kuyip angak, “Gor biynimb nuk diy kond mindeningamb minim weygiy mindyngip ak, nimbip gos ñek niñningambim; pen biynimb yikop gok:

‘Anqip kun angiy ma piyow niñningambay.’

¹¹ “Pen minim paydon ay tap yin rek apiyn ak, Gor minim ar ak apiyn.

¹² Mangiy gunap, yowningamb kinjen kosemb ar apiyn ak; biynimb gok Gor minim ak niñning gey, Seytan gek sakiy giningambay angiy apiyn.

¹³ Pen mangiy gunap, yowningamb kamb ar man siskoy ayak okok apiyn ak, Gor minim ak niñey tep gakniñ, nup gos niñningambay ak pen, gos kilis yimb giy ma niñningambay rek, miker gunap apek nup kirginingambay angiy apiyn.

¹⁴ Pen mangiy gunap, yowningamb kikasik dindbilih namb okok apiyn ak; biynimb gok Gor minim niñningambay ak pen, kisen minim miker akan; miñmiñ gep ar ak nep gos niñiy, Gor nup gos kilis giy ma niñningambay angiy apiyn.

¹⁵ Pen yin mangiy gunap, man tep yimb sinjak yapiy, jak tep giy, mangiy kunay yimb nep piyningamb apiyn ak; biynimb gok minim tep ak niñiy, di wos yimb giy, mindrep yimb giningambay gok kuyip apiyn.”

Melik Ak Ma Weyginimimb

(Mak 4:21-25)

¹⁶ “Pen biynimb gok lam dangiy, tiyn mingan okok akan, bonq ar kinbay beñ okok ma aypay.

Melik gek biynimb niñyan angyi, ar siñbiyon ayey mey, biynimb gok korip miñgan apyiñg, melik kun ak niñningambay.

¹⁷ Minim weygiy rek mindyiñgip ak; niñnimimb rek nep mindeniñgamb.

¹⁸ Kun ak minim apiyn gok niñrep yimb ginimimb. Biynimb minim niñiy, niñdiniñgambay gok, minim tep gunap sek niñningambay; pen biynimb minim niñiy ma niñdiniñgambay gok, sikoy niñjun angyi niñbay ak sek, pisnep kurginiñgamb.”

Jiysis Nup Niñning Wiyak
(*Mat 12:46-50; Mak 3:31-35*)

¹⁹ Pen ñin kun ak, Jiysis numam gunap nonim yip, nup niñning wiyak. Apiy niñyak: korip miñgan kun ak timbik giy angyi mindek niñiy, mis ar akyan mindeyak.

²⁰ Kun gek, biynimb ap mindeyak gok niñiy, Jiysis nup angyak, “Nanim namam nak gok, nip niñning ap mindpay mis biyan angyak.”

²¹ Angey, Jiysis kuyip angak, “Biynimb siñok Bapiy Gor nup minim ak niñiy, kindik gipay gok mey; amiy yand, mam yand rek ayip angak.”

Jiysis Angek Pinim Yomb Dek Ak Kirgak
(*Mat 8:23-27; Mak 4:35-41*)

²² Pen ñin bap Jiysis binuk gok yip, “Galiyliy chemb tikiy pis bindoñ amnun angyi,” bot ak diy sanđiyak.

²³ Namb okok amyiñg, Jiysis nuk wisin kin amnak won ak, pinim yomb yimb ak ñiñg namb kun ak diy, ñiñg pañg bot miñgan ak amek, kumniñgiy rek nep ayak.

²⁴ Kun gek, binuk gok ap, Jiysis nup kikawin gey tikjakek angyak, “Biyomb! Chin mangiysek kumning gispun angyak.”

Angey, Jiysis angek pinim yomb dek kun ak won anep kirgiy, ñing pañg apek ak kirgiy, nind mindek rek mindek.

²⁵ Pen binuk gok kuyip angak, “Gor nup gosimb niñbim rek ayip ak, yenen nup angninem tap gamb kun ak ma kirgip?”

Angek, kiyk pirikiy, angnin angnin giy, “Bi kun biy an? Pinim yomb dip ak sek, ñing yomb pañgip ak sek minim anqip rek nep gip angyak.”

*Bi Kichekiy Malñiluk Sek Ak Sunj Ayak
(Mat 8:28-34; Mak 5:1-20)*

²⁶ Pen bot kun ak diy, Galiyliy chemb namb ak am am, Gerasa biynimb mindeyak pis okdon ken amniyak.

²⁷ Pen miñmon kun ak, bi kichekiy malñiluk kuñay yimb ambanj ayak bap mindek. Bi kun ak nuk daynep mindiy, korip yimb miñgan ak ma kinyiñgip; chip komyiñgipay kamb miñgan okok nep kin tanjiñgip.

²⁸⁻²⁹ Bi nup kond mindep gok, sen diy, ñin tomb nup gok tiwning wos giyiñgipay ak pen, kichekiy tap gok ap kilis gey, sen ayiñgipay kun gok gek puñgrikek, miñmon nep namb okok pernep amyiñgip.

Pen bi kun ak, Jiysis nup ninij wal anjiy, ap tomb anjin siñak kongim yimek, Jiysis tap nup ambanj ayak kun gok kuyip angak, “Bi kun biy nup kirgiy mis amnim angak.”

Kun angakniņ, bi kun ak nup tap ambaņ ayak kun gok, nembnemb gey, minim yomb anġiy angak, “Nand Gor Biyomb jel gip Ñinuk ak, yip tap giniņg gispan ak ma ginimin angak.”

³⁰ Angek, Jiysis angak, “Yimb nand ak anġan.” Angek angak, “Yimb yand ak ‘Ñin jiwiy’ angak.” Kichekiy malñiluk gok kuņay yimb molik sikiy mindeyak rek mey, kun angak.

³¹ Pen kichekiy gok, Jiysis nup minim yomb anġiy anġyak, “Chinup anġ mon key yinġap kaw miņgan yomb ak ma yokninin anġyak.”

³² Kun anġiy niņyak; kanj kuņay yimb nep amil geyak yep pir kun siņak. Jiysis nup anġyak, “Chinup anġey, am kanj mindpay gindon kuyip molik sikun anġey,

³³ Jiysis “Yaw” anġek, bi anup kirġiy, am kanj kun gok kuyip molik sikey, kanj gok puņġiw minduņ biyaņ amiy, gindam ñiņg maņġiy chemb namb biyaņ pikiy, ñiņg ñimbiiy maņġiysek kumdiyak.

³⁴ Pen bi kanj mokep gok, Jiysis gak kun ak niņiy, puņġrikind anġiy am biynimb miñmon yomb mindeyak gok kuyip anġñiy, am biynimb miñmon yikop okok mindeyak gok kuyip anġñiy giyak.

³⁵ Kun giy anġñeyak, “Tap kun ak yerġek niņiy aspay anġiy,” apiy niņyak: bi kichekiy molik sikiy mindyiniņip ak, biyimb ay, waliņj yimiy, Jiysis tomb anġin siņak bișiņg mindek niņiy, pirikyak.

³⁶ Pen biynimb niņmindey Jiysis kichekiy anġ mis yokak gok, biynimb kisen wiyak gok kuyip, kun kun gip anġiy anġñiyak.

³⁷ Pen Gerasa biynimb mangiyseke kuyip jel gek, pirikiy, Jiysis nup angyak, “Nand andkind amnon angey,” bot diy amning gaknya,

³⁸ bi kichekiy amban ay mindek, Jiysis gek biyimb ayak ak, Jiysis nup angak, “Yand nand yip amjipur angak.”

³⁹ Kun angek, Jiysis nup angak, “Mer. Gor nip yerer gip ak, am biynimb nand gok kuyip angñinimin angak.” Angek, nuk andkind amiy, biynimb gok kuyip, Jiysis yip kun kun gip angyi angñak.

Pañ Kumak Ak Sek; Biyn Jiysis Nup Dininek Sun Ayak Ak Sek

(Mat 9:18-26; Mak 5:22-43)

⁴⁰ Pen biynimb Jiysis asaw angyi kond mindeyak gok, nuk bot diy amjakek ninjiy, “Tep aswan angyak.”

⁴¹⁻⁴² Pen biyomb Jiwda nan-gep korip kond mindyngip bap, yimb nuk Jayras. Pañ nuk nokom yimb simiy yin ayak wimangan ak kumning gek, Jiysis mindek sinak ap kongim yimiy angak, “Apey, korip yand amnur angak.” Angek, Jiysis ninning amnaknya, biynimb kunay yimb nep, ap nup pis pis chichmiy yimying amniyak.

⁴³⁻⁴⁴ Pen biyn bap, biyn kinjen pandikaknya mindek, simiy yin wimangan ayak bap, Jiysis amek kund okok ken apiy, chech paryomb ayak ak dinjaknya, sun ayak. Biyn kun ak, dokta gok yip gey sun ayan angyi, kuyip maniy ñiyngip ak pen, nup gey sun aynimun rek ma ayak.

⁴⁵ Pen Jiysis kuyip angak, “Yip an dinjimb?” Angek, biynimb gok angyak, “Chin ma ninbun

angyak.” Angey, Piyta angak, “Biyomb. Biynimb kunaynep akniy, ap nip chichmiy yimey niniy aspan rek ayip angak.”

⁴⁶ Angek, Jiysis angak, “Biynimb nokom bap yip dininek, suŋ ayip ak niniy aspiyn angak.”

⁴⁷ Pen biyn Jiysis nup dininjak kun ak, weyginimuŋ rek ma ayek niniy, jep diyiŋg, Jiysis mindek maŋ siŋak ap kongim yimiy, biynimb gok ninmindyakniŋ angak, “Yip biyn kinjen minnek minnek pandikip ak, nip dininen pisnep suŋ ayip angak.”

⁴⁸ Angek, Jiysis angak, “Pañ yand. Yip gosimb niniy, nup dininen yip suŋ ayniŋgamb angyi, dininey nip suŋ ayip ak, minim ma mindip. Amnoŋ angak.”

⁴⁹ Jiysis kun angakniŋ, bi Jayras nup wong giŋiyiŋgip ak apiy, Jayras nup angak, “Panak pisnep kumimb; tiysa nup angey tomb yiwur ma winimuŋ. Angey, andkind amnaŋ angak.”

⁵⁰ Angek, Jiysis minim kun ak niniy, Jayras nup angak, “Pañ yand ak kumimb angyi gos ak ma niŋnimin. Yip gosimb niŋeniŋgamban, gen tikjakniŋgamb angak.”

⁵¹ Kun angyi korip ak amjakiy, biynimb gok kuyip mangyisek anŋ mis akyaŋ ay; pañ nop nonim omiŋal ak, Piyta ak, Jon ak, Jemis ak kuyip poŋind pañ kun ak niŋniŋg, korip miŋgan biyaŋ amniyak.

⁵² Pen pañ ak kumimb angyi, biynimb siy anŋ mindeyak gok, Jiysis kuyip angak, “Siy ak ma anŋim. Ñapan kun biy ma kumimb; yikop wisin kinjap angak.”

⁵³ Kun angek, nup sik angyi angyak, “Ñapan pisnep kumimb ak, yenen kun asap angyak.”

⁵⁴ Pen Jiysis pañ kumak kun anup, ñin kind ak diy angak, “Tikjakan!”

⁵⁵ Kun angakniñ, kawnan nuk ak tip ap tokow gek tikjakak. Jiysis nop nonim kuyip angak, “Tap gunap ñer ñinañ.”

⁵⁶ Kun angyi, kuyip ber angak, “Biynimb gunap kuyip, minim kun ak ma yimb angnimiy angak.”

9

Jiysis Binuk Gok Kuyip Anj Wikan Keykey Yokak

(Mat 10:5-15; Mak 6:7-13)

¹⁻² Jiysis binuk onep wimangan ak kuyip angek apeyak, angak, “Nimbip kond mindeningayn ak mey, okok amiy, kichekiy malñiluk biynimb molik sikek mindpay gok angem mis amiy, biynimb tap gip gok gem suñ ay, Gor biynimb diy kond mindeningamb minim ak angniy, ginimimb.

³ “Pen amning; yir kondim, maniy, wand, chech, tap ñinemb tap gok sek dand ma amnimimb. Yikop amnimimb.

⁴ Korip bap amjakem, nimbip angdeningiy, kiy yip kin tep giy, amning ginimimb ñin ak nep amnimimb.

⁵ “Pen miñmon wikan gunap amem, nimbip ma angdeningiy, miñmon kun ak kiring amning, kuyip angnimimb, ‘Minim tep ak dand apambun ma dipim rek, miñmon nimbip biy apon, silkul

day day tomb chinup dip ak wiykyokiy amjipun angyi, ' wiykyokiy amnimimb angak.”

⁶ Kun angakniņ, kiyk miñmon sikoy okok amiy, minim tep nup ak anğñiyiņg, biynimb tap gak gok, gey sun ayak.

*Herot Gos Kuņay Niņak
(Mat 13:1-2; Mak 6:14-16)*

⁷ Pen biynimb gok, Jiysis yerer gak minim ak anğ amiy apiy giyakniņ, gapman biyomb Herot niņiy, gos kuņay yimb niņak. Biynimb gunap angyak, “Jon bi ñiņg pikñemb kuņam tikey kumimb ak, tip tikjakiņ angyak.”

⁸ Gunap, “Bi Gor minim anğep nindnimb Yilayja, tikjakiņ angyak.” Gunap, “Bi Gor minim anğep wosrey bap tikjakiņ angyak.”

⁹ Kun anğey, biyomb Herot angak, Jon nup kuņam tiken kumimb ak, bi kun ak an ap mindakniņ aspay ak, yand am niņnim angyi gog niņak.

*Jiysis Biynimb Payp Tawsin Ak Tap Ñek Ñiņyak
(Mat 14:13-21; Mak 6:30-44; Jon 6:1-12)*

¹⁰ Pen Jiysis binuk onep wimiņgan ak andkind apiy, miñmon okok tanğiy, yerip yerip giyak minim ak nup anğñiyakniņ, am miñmon wikan bap key mindon angyi, kuyip poņind miñmon Betsayda amniņg, sanğdiyak.

¹¹ Kinjeņnamb okok amniyakniņ, minim bap angyak, “Jiysis binuk gok yip apiy pandiksipay angyak.” Kun anğey, biynimb tiwin gok tiwin gok, nup niņniņg wiyak. Apeyak, tep opim angyi, Gor biynimb diy kond mindeniņgamb minim ak

kuyip anġniyinq, biynimb tap gak gok, gek sun ayak.

¹² Pen dungep pumb pañind amnak won ak, binuk onep wimiŋan ak apiy, nup anġyak, “Miñmon akniy, biynimb ma mindpay namb okok mindpun ak; biynimb guniy anġyokey, biynimb mindpay okok amiy, keñmaŋgiy kiyk gok key piyow niñyinq, kiniŋgiy miŋan ak piyow niñyinq giyaŋ anġyak.”

¹³ Kun anġeyak, Jiysis anġak, “Nimb key kuyip keñmaŋgiy ñinimimb anġak.” Anġek anġyak, “Chin tap ñiñemb kuŋay ma mindip. Yikop biret onep mamind ak mindiy, piys omiŋal mindiy gip. Nand yerip gos niñban? Biynimb biy kuŋay yimb mindpay ak, chin am tap ñiñemb kuyip gunap taw dand winjun? anġyak.”

¹⁴ Ñin kun ak, biynimb ap nan-giyak gok, biyn gok sek, ñapan ŋaŋ gok sek mer, bi gok nep mey payp tawsin amnak.

Pen Jiysis binuk gok kuyip anġak, “Biynimb kuŋay ap mindpay biy anġem, tiwin keykey bis-giyaŋ anġak.”

¹⁵ Anġek, anġak rek gey,

¹⁶ nuk biret onep mamind ak sek, piys omiŋal ak sek diy, kuyonġiy niñiy, Gor nup “Tep” anġiy, tipaŋg binuk gok kuyip ñek, kiy pen diyinq, biynimb gok kuyip bilok ñiyak.

¹⁷ Ñeyak, ñimb dand amiy, ñimb diniŋgiy rek ma ayek, day day kirgiyak gok, binuk gok wand onep wimiŋan ak yinqey arachakak.

Piyta Angak Nand Bi Kiyņ Yomb Key Yimb Ak Angak

(Mat 16:13-19; Mak 8:27-29)

¹⁸ Pen ñin bap Jiysis am keynep mindiy, Gor nup angnij mindaknij, binuk gok amjakey, kuyip angnijiy angak, “Biynimb yikop gok yip an angyi niņbay?”

¹⁹ Angek angyak, “Biynimb gunap, nip Jon bi ñiņg pikñemb ak angyi niņbay. Gunap, bi Gor minim angep nindnimb Yilayja angyi niņbay. Gunap, bi Gor minim angep nindnimb bap, tikjakip angyi niņbay angyak.”

²⁰ Angeyak, kuyip angak, “Nimb key yip bi an angyi niņbim?”

Angek, Piyta angak, “Nand Bi kiyņ yomb key yimb, Gor chinup wosrey yokniņgayn angak ak nep opan angak.”

²¹ Kun angek, Jiysis kuyip angak, “Minim kun ak, biynimb gunap kuyip ma anğñinimimb angak.”

Kumiy Tip Ak Tikjakniņgayn Angak

²² Kun angyi, minim bap pen angak, “Bi bap Ñinuk nup yiwur yomb yimb ak ñiniņgambay. Bi minim tunğasikep yomb gok, bi low tiysa yomb gok, bi Peresiy yomb gok nup ma diy, miluk niņiy ñanğayniņgambay ak pen; ñin omiņal nokom mindiy, tip ak tikjakniņgamb angak.”

²³ Pen nuk binuk gok sek, biynimb mindeyak gok sek kuyip angak, “Biynimb an yip ker mindiņg ginimuņ ak, tap man ar biy gos yomb niņbay ak kirgiy, pumbnamb kisyimken, gos yand niņiy

apiyn ar ak nep giy; miker diy kumningambay gos ak ma niñiy, sakiy giy nep yip chingiy tanjeningiy.

²⁴ “Biynimb Jiysis nup diy mindon, tep ma giningamb angyi niñningambay gok, pisnep apyap pikningambay. Pen biynimb nup diy mindon, chinup yerer giningamb ak, minim ma mindip angningambay gok, mind tep gep ak diningambay.

²⁵ “Biynimb tap man ar biy dun angyi gey amningamb gok, gos yomb kiyk ak tap man ar biy ker nep amek, Gor yip perper mindeningiy rek ma ayningamb.

²⁶ “Biynimb an kuyip nambiñ ginimuñ rek ayek niñiy, “Jiysis nup ma niñbun angningambay ak, kisen yand Bapiy melik chirapiy ak diy, enjol suñ-tep gok sek winingayn ñin ak, kuyip pen kunep Bapiy nup, ‘Kuyip ma niñbiyn angningayn.’

²⁷ “Pen nimbip niñind yimb aspiyn. Biynimb miñiy mindpim guniy, gunap ma kumningambim; kim nep mindiy, Gor biynimb diy kond mindeningamb ak niñningambim angak.”

Jiysis Wak Nup Ak Key Ayak

²⁸ Jiysis kun angyi, ñin anep jiy ak rek mindiy; Jon, Jemis, Piyta kuyip yakam poñind, Gor nup angninging yep dum kun siñak amnak.

²⁹ Amiy, Gor nup angnij mindakniñ, jomluk nup ak key yimb ay, chech nup ak tund giy ñiñakol yimb gak.

³⁰⁻³¹ Kun gakniñ, bi wosrey kumrik, Mosis yip, Yilayja yip Gor melik ak diy apiy, Jiysis Jerusalem ameningamb nup mon kiros bak biyoñ ñangbirik ayey, kumningamb minim ak anğ mindeyak.

³² Pen Piyta, Jemis, Jon kuyip yakam wisin apek, windin jukjuk gi mindeyak ak pen, tikjakiy Jiysis melik tep nup ak niñiy, bi omiñal yip jak mindeyak gok niñiy giyak.

³³ Bi omiñal kun ak amning girikniñ, Piyta gos niñrep giy mer, Jiysis nup angak, “Biyomb. Chin biy mindpun ak tep yimb mindpun. Chinup yaw angey, korip bandak band omiñal nokom gun. Nip bap, Mosis nup bap, Yilayja nup bap angak.”

³⁴ Kun angakniñ, won kun anep, semb tund yomb ak kuyip ap mangiyseki yiw gakniñ pirikyak.

³⁵ Pen minim bap semb namb kun ak nimb apiy angak, “Bi biy, Ñi mapin yand. Minim angnimur rek niñnimimb angak.”

³⁶ Won kun ak nep; bi omiñal kun ak ma minderik; Jiysis nep mindek.

Pen dum biyon mindey tap gek niñyak kun ak, ñin namb kun siñak biynimb gunap kuyip ma angñiyak.

Ñiskoy Kichekiy Ambañ Ayak Ak Jiysis Gek Ñiyimb Ayak

(Mat 17:14-21; Mak 9:14-29)

³⁷ Pen minek dum biyon kirgiy, kinjenamb okok apyapying niñyak, biynimb kuñay yimb nep, Jiysis nup piyowey apek.

³⁸ Bi bap biynimb namb kun ak, suk yomb angiy angak, “Tiysa! Ñi yip nokom biy simb niñan angiy dand aswiyn.

³⁹ Kichekiy ak pernep ambañ ay mindiy, nup gek suk yomb sikerek angiy, gi dam pikiy, kosimb

asimb apiy, kumdam namb aying wip. Nup kun giy, perper gek mey, mind tep ma gip.

⁴⁰ Bi nak gok kuyip, kichekiy mindip kun ak angyokim apiyn ak pen; kiyk angyok mer ninjy kirpay angak.”

⁴¹ Kun angek, Jiysis angak, “Biynimb miñiy mindpim ar biy, minek akay Gor nup gosimb niñningambim? Ma yimb niñbim kun ak, yergiy minim kil sek angnim?” Kun angyi, bi kun anup angak, “Ñi nand kun ak dand sinbiy owan angak.”

⁴² Angek, dand owakniñ, kichekiy ak ñi kun anup tip ak kilis giy pipañg yokek gindam pikak. Jiysis pen kichekiy anup anğ gek, key amnakniñ, ñi kun ak ñiyimb ayek, di nop nup ñak.

⁴³ Biynimb ap mindeyak gok, Nop Gor gak kun ak ninjy, ñawil diyak.

*Jiysis Kumningayn Angyi Tip Ak Angak
(Mat 17:22-23; Mak 9:30-32)*

Kiyk gos yomb kun ak niñmindyakniñ, Jiysis binuk gok kuyip angak,

⁴⁴ “Minim aspiyn biy timund ay niñ-tep yimb ginimimb. Mañ mindip, Bi bap Ñinuk nup mimunğ ninjy, biyomb gunap kuyip ñiningambay angak.”

⁴⁵ Minim angak kun ak, kiyk tik niñep rek ma ayek; pirikiy Jiysis nup ma angninyak.

*An Rek Biyomb Yimb Angyak
(Mat 18:1-5; Mak 9:33-37)*

⁴⁶ Binuk gok kiyk key anğ amiy apiy giy angyak, “Yand biyomb minden,” “Yand biyomb minden,” angyak.

⁴⁷ Jiysis binuk gok, gosimb timey ninyak kun ak key ninjiy, ñapan sikoy yimb bap, dap mindek bak sinjak ay angak,

⁴⁸ “Biynimb gosimb yip ninjiy, ñapan sikoy biy rek dininḡambay gok, yip dininḡambay. Pen biynimb yip dininḡambay gok, Biyomb yip yokek winik anup dininḡambay angak.”

⁴⁹ Jiysis kun angek, Jon angak, “Biyomb. Chin ninḡun: bi bap yimb nip ak anḡiy; kichekiy malñiluk tap okok anḡyokip. Pen bi kun ak, chin yip ma tapun rek, kun ma ginimin apun angak.”

⁵⁰ Angek, Jiysis angak, “Yenen nup kun apim? Biynimb chinup miluk ma ninḡbay gok, bunḡiy chin angak.”

Samariya Kay, Jiysis Nup Ma Diyak

⁵¹ Pen Nop Gor, nup dand miñmon nuk biyon amniḡgak ñin ak, maḡ mindakniḡ, Jiysis Jerusalem amniyn anḡiy, gos kilis giy ninḡak ak mey;

⁵² bi gunap kuyip nind anḡyokiy angak, “Nimb nind amiy, kinemb tip yip ak ninḡayem angak.” Angek, kiyk am Samariya biynimb korip layn bap amjakiy, Jiysis kinemb tip nup bap ayem anḡey,

⁵³ biynimb miñmon nop nimb kun gok, Jiysis Jerusalem amniḡgak rek ninjiy, kuyip tep ma gek, nup ma diyak.

⁵⁴ Ma deyak ninjiy, Jemis yip, Jon yip am, Jiysis nup anḡrik, “Biyomb! Chin mon maḡlaḡ semb biyon nimb ak anḡon apiy, biynimb kun gipay gok kuyip yinimuḡ akan?”

⁵⁵ Kun anḡer, Jiysis andikiy kuyipmiḡay ninḡiḡ, kun ma ginjun anḡiy kuḡay angak.

56 Biynimb kun gok, Jiysis nup ma deyak, miñmon kun ak kirgiy, miñmon bap key amniyak.

Yand Yip Tanğoniğambun Anğak
(Mat 8:19-22)

57 Pen kinjeñnamb okok amniyakniñ, bi bap apiy, Jiysis nup anğak, “Miñmon akay akay amniğamban okok, yand yip nep tanğoniğambur anğak.”

58 Kun anğek, Jiysis anğak, “Yand yip kosyam tanğeniğamban. Kayn ayndik gok korip kiyk kinemb ak, man miñgan okok mindip. Yakir gok korip kiyk ak key mindip. Pen Bi bap Ñinuk, tip kinemb ar nuk ak ma mindip anğak.”

59 Pen Jiysis bi bap nup anğak, “Yip kondey, yand yip tanğor anğak.” Anğek, bi kun ak pen anğak, “Yip yaw anğey, yand bapiy nup kond minden, kumek komiy winim anğak.”

60 Anğek, Jiysis anğak, “Biynimb permindep ma dipay gok, chip kumemb kun gok kuyip komniğiy, nand pen am, Gor biynimb diy kond mindeniğamb minim ak anğñey amnañ anğak.”

61 Bi bap pen anğak, “Yand nand yip nep tanğoniğambur ak pen, yip yaw anğey, am amiy bapiy, mam ay yand gok kuyip ñin piksakiy, anğñiy winim anğak.”

62 Anğek, Jiysis anğak, “Biynimb Gor nup marik giniğ giy pen, gos yomb kiyk ak, andkind biynimb kiyk, tap kiyk gok amniğamb ak; Gor biynimb yand anğiy diy, kond mindonimuñ rek ma ayniğamb.”

10

Binuk Kuṅaynep Anḡyokek Am Miñmon Keykey Minim Anḡñiyak

¹ Kisen Jiysis bi ñin jiwiy omiṅal nokom, andikiy omiṅal nokom (72) diy, kuyip bilok omiṅal ak key, omiṅal ak key miñmon okok keykey anḡyokiyṅ anḡak, “Nimb nind amiy, minim yip ak anḡñem, yand kisen niniṅgayn anḡak.”

² Pen kuyip minim bap anḡak, “Tap woṅg ak kuṅay yimb nep mindip ak pen, biynimb pipanḡ dand wep gok nep kuṅay ma mindpay. Kun ak, bi woṅgday nop nimb anup anḡniṅ mindem, biynimb tap pipanḡ dand wep gunap sek anḡek, am pipanḡ dand winiṅgiy.

³ Nimb pen woṅg ar kun anep ginimimb. Pen siypsiyp ñiluk yand gok nimbip yoksiyyn; kayn ayndik mindpay namb ak,

⁴ anpawis, wand, tomb tirup gok sek, dand ma amnimimb. Biynimb kinjeṅnamb okok niṅiy, minim ma anḡnimimb.

⁵ Pen korip bap amjakiy, korip miṅgan amyiṅ, kuyip minim tep won ak anḡiy anḡnimimb, ‘Gor nimbip kond minden.’

⁶ Anḡem, biynimb Gor nup dep rek mindeniṅgambay gok, minim nimbip kun ak diniṅgambay.

⁷ “Pen korip kun anep mindiy, tap keñmanḡiy dap ñiniṅgambay gok, ñimbyiṅ mindenimimb. Chinup tap minek minek ñey ñimbun ak, nambinḡ gip anḡiy, korip ok korip ok ma ginimimb. Bi woṅg gipay gok pey dipay. Kun ak rek, kuyip

minim tep angem niñningambay rek, nimbip pen keñmañgiy ñiniñgambay.

⁸ “Pen miñmon bap amem, nimbip sik anğdiy, keñmañgiy ñiniñgiy gok ñiñnimimb.

⁹ Miñmon kun ak, biynimb tap ginimuñ gok, gem suñ ayakniñ, biynimb gok kuyip mañgiysek anğ tep giy anğnimimb, ‘Kiyñ yomb biynimb diy kond mindeniñgamb ak, tomb anğin nimbip ak wip anğnimimb.’

¹⁰ “Pen miñmon bap amem, nimbip ma sik anğdey, lor namb siñak amiy, ‘Miñmon nimb biy apon silkul dip gok, wiyk nimbip ker yokiy amjipun.

¹¹ Pen niñim: Kiyñ yomb biynimb diy kond mindeniñgamb ak, tomb anğin nimbip ak wip anğnimimb.’

¹² “Nimbip aspiyn: kisen kor yomb ñin ak, miñmon Sodom Gomora biynimb tap siy tap timey nep gey gey yin simbok amnak ak, kor giy yiwur sikoy rek diniñgambay; biynimb minim nimb am angem ma diniñgambay gok, kor giy yiwur yomb yimb diniñgambay.

Yiwur Diniñgambay

¹³ “Korasin biynimb gok sek, Betsayda biynimb gok sek tap mageprek ak gen, niñiy kirpay rek, yiwur yomb yimb diniñgambay. Pen Taya-Saydon biynimb gok kuyip, tap magep kun ak rek, gunap gen niñbiyap ak, chech talik yowip gunap yimiy, bisgiy tun diyiñ diyiñ mindembiyap.

¹⁴ Kor yomb ñin ak, Taya-Saydon biynimb yiwur sikoy rek diniñgambay; Korasin biynimb gok

sek, Betsayda biynimb gok sek yiwur yomb yimb ak dingingambay.

¹⁵ Pen ñin kun ak, Kapaniyam biynimb kunep, semb biyon ma amningambay; pisnep kaw mingan yomb ak amningambay angak.”

¹⁶ Jiysis binuk gok kuyip angak, “Biynimb minim nimbip dipay gok, minim nimbip ak mer: minim yip ak dipay. Nimbip ma dipay gok, nimbip mer: yip ma dipay. Pen yip ma dipay ak, yip mer: Biyomb yip yokek winik ak nup ma dipay angak.”

Binuk Kunaynep Andkind Wiyak

¹⁷ Pen kisen binuk ñin jiwiy omiñal nokom, andikiy omiñal nokom (72) kun gok, miñmon okok tanjjiwiy apiy, tep gakniñ Jiysis nup angyak, “Biyomb! Kichekiy malñiluk biynimb amban ayip gok yimb nip ak angiy, ‘Jiysis mindip rek mis amnim’ angon, apun rek niñiy ambay angyak.”

¹⁸ Angeyak, kuyip angak, “Yand niñmindnikniñ, kichekiy malñiluk nop kiyk Seytan, kasek won anep, añiñak rek diy apyap pikip.

¹⁹ Siyñ saraw, kondal, maplongim, tap okok nimbip miluk niñiy, timey giningiy rek ma ayip. Nimbip ñinen aspiyn rek, yuk yokem anningambay.

²⁰ “Pen kichekiy malñiluk gok, apun rek niñiy ambay angiy, miñmiñ ma ginimimb; Gor Biyomb chin ak, yimb chinup di ayip miñmon nuk biyon angiy, miñmiñ ginimimb angak.”

Jiysis Nop Gor Nup Tep Angak (Mat 11:25-27; 13:16-17)

21 Won kun sinjak, Gor Kawnan ak Jiysis nup bak ayek, nup tep gakniņ, Gor nup anņniņiy angak, “Bapiy. Nand Biyomb semb biyoņ sek, man biy sek kond mindpan ak, gos nak ak key niņey tep gip ar ak gipan. Chin biynimb yomb gos tipaņgiy niņbun apay gok kuyip kirgiy, chin biynimb tep ma mindpun, ñapan sikoy rek mindpun apay gok kuyip diy, kuyip gos tep ñimban ak, nip tep aspiyn angak.”

22 Kun anņiy angak, “Biynimb gunap yip ma niņbay; Bapiy nep yip niņimb. Pen Bapiy nup kunep biynimb gunap ma niņbay; yand nep nup niņrep gipiyn. Pen Bapiy yip angek, nuk gip rek gipiyn ak mey, biynimb gos tep ñiyn anņiy niņbiyn gok, gos tep ñen, Bapiy nup niņrep gipay angak.”

23-24 Kun anņiy, andikiy binuk gok nep kuyip angak, “Gapman biyomb gok sek, Gor minim anņep biyomb gok sek kuņaynep rek, yand gipiyn ak, minim apiyn ak, niņun anņiy kond mindyņgipay ak pen; ma niņyak. Gor nimbip di tep yimb gek mey, niņsipim angak.”

Bi Samariya Nimb Ak Girep Yimb Gak

25 Bi low tiysa bap, Jiysis yerip rek anņnimuņ anņiy, ap nup angak, “Tiysa. Yand yerer giy, perper mindeniņgayn?”

26 Angek, nup angak, “Baybol buk ak tikiy, yerip anņyak?”

27 Angek, bi low tiysa kun ak angak, “Baybol buk riytiym gi niņbiyn ak anņyak:

‘Gor Biyomb nak anup wasemb yimb ay, gos timund nak ak, kilis nak ak maņgiysek nup ker amnimuņ. Nand key wasemb aypan

rek, biynimb gunap kuyip, kunep wasemb aynimin angyi' tikyak."

²⁸ Kun angek, Jiysis bi kun anup angak, "Mey yipund giy apan ak. Ar kun ak kisen giy, perper mindeningamban angak."

²⁹ Angek, bi low tiysa kun ak, yimb yip ak sikoy giningamb angyi, Jiysis nup tip angninjiy angak, "Baybol buk tikyak ak, biynimb gunap kuyip wasemb aynimimb angyi tikyak. Kun ak biynimb gunkay kuyip, kun giyan angyi tikyak?"

³⁰ Angek, Jiysis bi low tiysa ak nup, kesim diy angak, "Bi bap Jerusalem kirgiy, miñmon Jeriykow amniyn angyi, kinjenamb ak amnakniñ, bi tap siy dep gunap apiy, nup tapin nep pikiy, chech tap nup gok piling dand amniyakniñ, nuk kinjenamb sinjak kumning kumning gi mindek.

³¹ Bi Gor nup simbonjep bap, lor ar kun ak amiy niñak; bi kun ak kumning gi mindek. Nuk niñiy pis anep amnak.

³² Pen bi Liypay kiñin Gor angninjep korip kond mindyngip bap, lor ar kun anep amiy niñak, bi kun ak kumning gi mindek. Niñiy, kunep pis anep amnak.

³³ Pen bi Jiwda mer, miñmon Samariya nimb bap, kinjen par nokom kun ak nep amiy niñak; bi kun ak kumning gi mindek. Niñiy, nup simb niñiy,

³⁴ mindek man sinjak amiy, soy nup gok wel gunap ay, wayn ñing gunap ay tiwningak. Tiwningiy, di dongiy ar nuk ak ay dand amiy, korip maniy tawiy kinyingipay ak dam ay, kond mind tep yimb gak.

³⁵ Minek amning giying, bi korip kond mindyngip kun anup, maniy kind nokom bap ñiy angak, ‘Nand bi kun biy nup direp ginimin. Pen maniy yerip yerip angningamban ak, andkind apiy nip ñiningayn angak.’ ”

³⁶ Jiysis kesim kun ak diy, bi low tiysa kun anup angak, “Bi kinjenamb pikayak ak, bi ominal nokom pandikiy, bi an nuk key wasemb ayip rek, nup wasemb ayak?”

³⁷ Angek, bi low tiysa ak angak, “Bi nup simb niñiy direp gak ak angak.” Angek, Jiysis nup angak, “Niñind apan. Mey ar kun anep ginimin angak.”

Mata Nup Wong Gos Anep Ayak

³⁸ Pen Jiysis binuk gok yip miñmon bap am-jakeyak, biyn miñmon kun ak mindek bap, kuyip poñind korip nuk ak amnak. Biyn kun ak yimb nuk Mata.

³⁹ Korip nuk ak, nunay bap mindek. Yimb nuk Mariya. Pañ Mariya kun ak, Jiysis mindek man sijak ap bisgiy, Jiysis minim angakniñ, niñmindek.

⁴⁰ Mata nuk keynep tap keñmangiy dangiy gi gi, gos kuñay niñiy, ap Jiysis nup angak, “Biy-omb. Mariya yip kirgek, key nep tap chin gok dangiysipiyn ak tep ma gip. Nup angey apek, ominal giy tap dangiyur angak.”

⁴¹ Angek, Jiysis angak, “Mata. Mata. Nip tap kun gok nep gos ayip!

⁴² Ak tap yikop! Mariya minim tep ak diyn angiy, gos ak ayek, ap niñmindip. Kun ak, yand nup kiring amnon angnim rek, ma ayip angak.”

11

Gor Nup Kun Giy Rek Anḡniḡnimimb Anḡak (Mat 6:9-15; 7:7-11)

¹ Ñin bap, Jiysis miñmon wikan bap mindiy, Nop Gor nup anḡniḡ jiwakniḡ, binuk bap ap nup anḡak, “Gor nup yergiy rek anḡniḡbay? Jon binuk gok kuyip, anḡñek niḡyak rek, chinup kunep anḡñey niḡjun anḡak.”

² Anḡek, Jiysis kuyip anḡak, “Gor nup anḡniḡniḡ, kun giy anḡnimimb:

‘Bapiy. Nand timey ma giy, Bi tep yimb mindpan ak, yimb nip dand aranemb. Nand nep Biyomb chin mindiy, chinup kond mindenimin.

³ Pen tap keñmaḡgiy gok, minek minek ñimbun rek ak ñinimin.

⁴ Biyñimb gunap chinup timey gey, kuyip pen miluk niḡiy timey ma gipun rek, tap siy tap timey chin gipun ak, kunep niḡiy kirginimin. Chinup kond mindey, gos bap apek timey ma ginjun anḡnimimb’ anḡak.”

⁵⁻⁶ Kun anḡiy, binuk gok kuyip anḡak, “Nimb bap, kisyimnamb yomb akyan, buḡgiy nimb bap korip ak amiy anḡniḡgambim, ‘Buḡgiy. Bi yand niḡep rek bap, par okok nimb apiy amniyn anḡiy, korip yip ak apchakamb, tap nup ñen ñiḡnimun ak ma mindek mey; nip ker aswiyn. Yip biret omiḡal nokom ñan anḡeniḡgambim,’ buḡgiy nimbik kun ak minim bap anḡniḡgamb;

⁷ ‘Kisyimnamb biy, yip kun giy ma ap anḡninin! Ñapan yand gok yip kinjeḡ giñiy kinjipun. Kun

ak yergiy tikjakiy, nip tap aspan ak diñinim anğniņgamb?’

⁸ “Pen nimbip aspiyn: bi korip nop nimb ak, bunğiy yand anğiy, kasek ma diñeniņgamb; nup ñan anğiy kond mindyiņg, kilis gi mindem mindem, anğniņgambim rek niņiy, diñiniņgamb.

⁹ “Kun ak nimbip aspiyn: tap yerip tikdenimuņ, Gor nup anğniņem, nimbip ñiniņgamb. Pen tap yerip piyowniņniņgambim ak, kunep diniņgambim. Chinup kinjeņ ak yikaņ anğiy, pik giygiw gem, yikniņgamb.

¹⁰ “Yenen: biynimb an Gor nup anğniņbay gok, apay rek gip. Tap piyowpay ak kuyip yomimb. Pen kinjeņ ak yikaņ anğiy, pik giygiw gey, apay rek niņiy yikip.

¹¹ “Nimb bi ñapan nop gok, ñapan nimb bap piys nen anğek, siyņ timey bap ñimbikip?

¹² Akan pen, yakir maņgiy nen anğek; kondal bap ñimbikip? Ak kun ma gipkip!

¹³ Nimb biynimb tep mer ak pen; ñapan nimb gok tap tep gok nep ñimbim. Bapiy tep semb biyoņ ak bi tep yimb. Nuk tap yesek bap key ma ñiniņgamb. ‘Kawnan nand ak chinup yokan anğem,’ yokniņgamb anğak.”

Kichekiy Malñiluk Nop Kiyk Seytan Kilis Ak Dipan Anğyak

(Mat 12:22-30; Mak 3:20-27)

¹⁴ Pen bi bap kichekiy ak ambaņ ayek, minim anğiy mer, yikop nep mindek. Jiysis kichekiy abañ ayak kun ak anğyokek, minim anğakniņ, biynimb ap niņmindeyak gok, gos kuņay yimb niņyak.

15 Pen biynimb kun gok gunap angyak, “Nuk kichekiy malñiluk nop kiyk Seytan, yimb bap Belsiybul apay kilis ak diy, angyoksap angyak.”

16 Pen biynimb gunap, Jiysis yerip giniᅅgamb angyiy angyak, “Tap bap key semb sinᅅbiyon gey niᅅiy mey; Gor nep angyokek winak anᅅniᅅgambun angyak.”

17 Pen Jiysis gos yesek niᅅyak kun ak niᅅiy anᅅak, “Miñmon yomb nokom bap, asik keykey ay mindrep ma giniᅅgambay. Biynimb kiñiᅅ nokom bap, kunep asik keykey ay mindrep ma giniᅅgambay.

18-19 Kun ak rek, Seytan kiñiᅅ ak tungasik keykey ay, yergiy mind tep giniᅅgambay? Yip Belsiybul nup kond mindek, kichekiy malñiluk anᅅ mis yoksap apim ak pen, yand kun gembiniᅅ, yergiy biynimb nimb gok kichekiy malñiluk anᅅ mis yokpiyap. Kiyk key nimbip anᅅniᅅgambay, biynimb bap kun giniᅅgiy rek ma ayip.

20 Pen Gor yip kond mindek angyokpiyn ak; yip yenen, Gor binuk biynimb diy kond mindeniᅅgamb ak wip biy angyiy ma niᅅbim.

21 “Pen bi kalrimey bap mindiy, chim yakam nuk ay tep giy, korip nuk niᅅmindek, biynimb tap nuk bap piliᅅ diniᅅgiy rek ma ayniᅅgamb.

22 Pen bi kalrimey yimb bap key apiy, chim tap nuk siy di mindip gok piliᅅ diy mey, key niᅅimb rek bilokniᅅgamb.

23 “Biynimb yand ker ma mindpay gok, Seytan kind ak mindiy mey, yip ma dipay. Pen biynimb yand yip woᅅᅅ ma gipay gok, kinjeᅅ day anᅅ tikey, biynimb yip ker winiᅅᅅ gipay gok ma opay.

*Kichekiy, Malñiluk Tap Gok Yikop Angyokem Tip
Andkind Winiņgiy Rek Ayip
(Mat 12:43-45)*

²⁴ “Kichekiy malñiluk timey bap, biynimb am-
ban ay mindek, angyokeniņgambay, am miñmon
nep namb okok tip bap niņiy minden angyiy, am
kun okok tang tang mer niņiy, korip miņgan nind
mindiy opiyn ak amniyn angniņgamb.

²⁵ Angyiy, amiy niņiņgamb: korip kun ak girep
yimb gey, tip anep mindeniņgamb.

²⁶ Nuk niņiy okok amiy, nund rek mer; kichekiy
malñiluk timey yimb onep ar ak sek poņind apiy,
miņgan kun ak mindeniņgambay. Kun gek, nind
mindrep giyiņgip rek mer; pisnep timey yimb
giniņgamb angak.”

²⁷ Jiysis kun angek niņiy, biyn bap namb kun
ak tikjakiy, meņg miņgan dand araniy angak,
“Nanim nip tikiy tiy ñak ak, miñmiñ yimb gin-
imur angak.”

²⁸ Angek, Jiysis angak, “Kun apan ak pen;
biynimb Gor nup minim ak niņiy, angyip angyip rek
giniņgambay gok, miñmiñ giniņgambay angak.”

*Tap Bap Key Gey Niņun Angyak
(Mat 12:38-42; Mak 8:12)*

²⁹⁻³⁰ Pen biynimb kuņay yimb nep, ap nanan
giyakniņ, Jiysis angak, “Biynimb miñiy mindpim
ñin namb biy, tap siy tap timey giyiņg apim,
‘Tap key rek bap semb biyoņ gek niņiy, Kiyn
yomb key yimb per kond mindpun ak nep, wip
angiy niņiņgambun apim.’ Pen nimbip aspiyn,
tap bap key gen ma niņiņgambim. Niņiņg:
Jona wosrey ñin omiņal nokom, piys yomb koņgiy

namb biyaŋ mindiy, owak rek ak yip kunep gek, niŋniŋgambim. Gor Jona nup kond mindrep gak rek, Niyniypa biynimb niŋiy, Gor nup gosimb niŋyak.

31 “Pen wosrey, Kiwiyn biyn yomb miñmon paryomb Yitiyopiya nimb ak, kiyŋ Solomon biyomb rek ayek niŋiy, minim nup ak niŋiyn aŋgiy owak. Pen biynimb miñiy mindpay gok, Biyomb yimb ak ap mindiy, minim aŋgip ak ma dipay rek, kisen kor yomb ñin ak, minim yomb diniŋgambay.

32 “Wosrey, Jona am Niyniypa biynimb kuyip aŋgek, tap siy tap timey giyak gok kirgiy, Gor nup diyak. Jona bi yikop ak aŋgek niŋyak ak pen, miñiy Biyomb yimb ap mindip biy nup, kun ma gipim. Kisen kor yomb ñin ak minim yomb diniŋgambim aŋgak.”

*Kisyimnamb Okok Rek Ma Mindenimimb
(Mat 23:1-26; Mak 12:38-40; Luk 20:45-47)*

33 “Biyimb gok lam daŋgiy tiyn miŋgan okok akaŋ, bong ar kinbay molik okok ma aypay; ar siŋak tik ayey melik gek, biynimb gok korip miŋgan kun ak apiy misen niŋbay.

34 Pen windin maŋgiy ak sup rek mindip ak mey, mind tep gek, mumbwak ak mind tep yimb giŋiŋgamb. Pen mind tep ma gek; kisyim wip rek ak mindeniŋgamb.

35 “Namb chinup ak melik mindip aŋgiy niŋniŋgambim ak pen; kisyim wip rek ayip ak, niŋrep yimb ginimimb.

³⁶ Mumbwak nimb maŋgiysek melik yimb giy mindeningamb ak, wikan bap kisyim ma mindeningamb; lam melik gip rek ak, giying nep mindeningamb angak.”

Nimb Peresiy Gach Sek Angak

³⁷ Pen Jiysis minim anjjiwakniŋ, bi Peresiy bap nup angak, “Apey, korip yand ak amiy tap ñinur angak.” Angek, Jiysis am korip nup ak,

³⁸ bisgiy tap ñinakniŋ, bi Peresiy kun ak, gos nuk namb okok nep niŋiy, bi kun biy yenen, chin Jiwda kay per gipun rek, ñin nuk ak ñiŋg ay gilunŋ yokiy mer; yikop nep tap ñimbsap anŋiy, gos ak niŋak.

³⁹ Gos kun ak kun giy niŋek, Jiysis angak, “Nimb Peresiy kay, piler kap gok mis okok ken, ñiŋg pik tep gipay rek ak gipim ak pen, namb nimb biyaŋ tap siy tap timey gipim gach ak, arachakiy mindip.

⁴⁰ Nimb sakiy sek yimb. Gor nimbip wak ak nep ma gayak; namb biyaŋ kunep gayak.

⁴¹ Kun ak, tap piler kap miŋgan biyaŋ mindip ak, biynimb simbgeprek gok kuyip ñinimimb. Kun giy mind tep giniŋgambim.

⁴² “Pen nimb Peresiy kay niŋrep yimb ginimimb. Sinimb tap monmon gok niŋem tap yomb rek ayek, ñin paŋgniŋ dand amiy, wanjrem ak amek, Gor nup nokom bap ñun anŋiy, per ñimbim. Ak tep gipim; minim ma mindip. Tap siskoy okok per kun giy gipim ak pen, yenen minim junj yimb ak kunep ma gipim. Gor nup niŋiy dep akan, biynimb gok kuyip niŋiy dep ar ak, per kirpim.

43 “Nimb Peresiy kay ninrep yimb ginimimb. Gos nimbik ninbim ak, lotiw namb ak akan, miytiyñ gipay namb ak amon, aswim-ey angey, yimb chinup anep dand araniyan angy, gos ak nokom ninbim.

44 “Pen gipim kun ak, Gor nimbip pen kunep giniñgamb ak, ninrep ginimimb. Biynimb gunap ninjy, nimbip bi tep yimb apay ak pen; chip kuy giy mindip rek ak, mindpim angak.”

45 Kun angek, bi low tiysa bap, Jiysis nup angak, “Tiysa. Minim kilis timey yimb apan kun ak, chinup kunep apan akan?”

46 Angek, Jiysis angak, “Nimb bi low tiysa gok ninrep yimb ginimimb. Minim kilrimey apim ak, wand miker yomb gok rek, biynimb gok kuyip gom ñimbim ak pen; kuyip simb ninjy ma tungasik dipim.

47 “Kun ak ninrep yimb ginimimb! Nasind yes nimb gok wosrey, bi Gor minim angep gok kuyip pikayey, nimb kaw kuyip komemb gok gayrep giyñ mindpim.

48 Gipim kun ak tep nep pikyak angy gipim.

49 “Kun ak Gor ninrep giy angak, ‘Bi minim yip angep gok, bi minim yip dand amemb gok kuyip yokniñgayn ak pen, kuyip yiruk ninjy, gunap timey giniñgambay; gunap pisnep pikayniñgambay angak.’

50 “Pen wosrey, miñmon alwol gayak ñin ak tikiy, bi Gor minim angep gok kuyip per pikey wip rek, biynimb miñiy mindpay gok, minim miker kun ak diniñgambay.

51 Miker kun ak mey, bi Ebol nup nind kiñiñ giy ñaŋgiy, ñaŋg dand apiy, ñaŋg dand apiy, kisen Sekaraya nup, Gor nup tip tap simboŋg ñemb korip miŋgan ak bindoŋ, kamb diy giyak bind ar ak biy, namb siŋak ñaŋgayak. Nimbip niñind yimb aspiyn. Minim miker kun ak maŋgiysek, biynimb miñiy mindpay gok diñiŋgambay.

52 “Pen nimb bi low tiysa gok niñrep yimb ginimimb. Kiy diy, kinjeŋ yikiy korip miŋgan amiy niñrep gep ak, yiruk gek kirpim. Kirgiy, biynimb korip miŋgan amniŋg gipay gok kuyip, per kinjeŋ day aŋgrikpim. Kun ak niñrep yimb ginimimb aŋgak.”

53-54 Jiysis kuyip kun aŋgiy, mis amnakniñ; bi Peresiy gok sek, bi low tiysa gok sek nup yiruk niñiy aŋgyak, “Minim yerip ak aŋgon, pen aŋgek niñiy, dand kor yomb amnun aŋgyak.” Kun ak mey, nup minim yesek yesek ar keykey gok aŋgniñyiniŋgipay.

12

Tap Weygiy Gipay Gok Misen Niñniŋgambay (Mat 10:26-27)

1 Pen won kun ak, biynimb kuŋay yimb nep ap nan-giy, chichmiy yimyakniñ, Jiysis binuk gok kuyip aŋgak, “Peresiy kay per timey gipay ak weygiy, mind tep gipun apay. Kun ak rek, nimb kunep ginimimb rek ayip ak, niñrep yimb ginimimb.

2 Tap weygiy gipim gok, kisen misen niñniŋgambay. Minim kapkap aŋg weygiyim gok, kunep misen gek niñniŋgambay.

3 Pen minim kisyimken apim gok, melik sek angey niñningambay. Minim kapkap korip mingan okok apim gok, korip ar biyoñ angey, ying dand miñmon okok amningambay angak.”

*Gor Nup Piriknimimb
(Mat 10:31)*

4 “Biynimb yand guniy. Nimbip aspiyn, Gor nup chingon, chinup ñangningambay angyi ma piriknimimb. Ak yikop mumbwak ar anep timey giningambay.

5 Kun ak nimbip aspiyn: pirikning, Gor Biyomb nimbip pikay, mon key yinjap yokningamb ak nup piriknimimb. Kun ak nimbip niñind yimb apiyn.

6 “Nimb niñbim: yakir sikoy onep mamind ak yokiy, maniy likañ sikoy won omiñal nep dipay. Yakir sikoy kun gok, Gor ma niñnimuñ rek bap ma mindip; mangiysek niñimb ak nep mindip.

7 Pen nimb biynimb gok, tap yimb; yakir gok kuyip wiyniym gipim. Kun ak, Gor jun kas nimbip mangiysek ñin pañgip ak mey; gos sek mindenimimb angak.”

*Jiysis Nup Yimb Di Angep
(Mat 10:32-33; 12:32; 10:19-20)*

8 “Nimbip aspiyn: biynimb Jiysis ker mindpun angyi, biynimb mindpay namb ak angyikey; kuyip pen, biynimb guniy yip ker mindpay angyi, enjol mindpay namb ak misen angyikningayn.

9 “Pen biynimb ‘Jiysis ker ma mindpun angyi’ biynimb mindpay namb ak angey, kuyip pen, yip ker ma mindpay angyi, enjol mindpay namb ak angningayn.

10 “Bi bap Ñinuk nup anjjiweninggambay, Gor niñiy kirgining kirginingamb; pen Kawnan nuk ak nup anjjiweninggambay, nuk niñiy ma kirginingamb.

11 “Pen nimbip kor gining, dand lotiw gining biynimb ap nan-gipay namb ak amey akan; kansol mindpay namb ak amey akan, gapman biyomb mindpay namb ak amey, pen minim yerip ak diy anjgun angyi, gos ak ma piyow niñnimimb.

12 Tikjak apikniñ, Gor Kawnan ak nimbip gos ñakniñ, angningambim angak.”

Tap Kunay Dun Angyi Gos Ma Niñnimimb

13 Biynimb kunay mindeyak namb kun ak, bi bap Jiysis nup angak, “Tiysa. Mam yand ak nup angey, bapiy tap nuk day kumak gok, bilok yip pis ak key ñañ angak.”

14 Angek, Jiysis nup angak, “Yip an angyi, ‘Bi tap pikasik ñemb ak mindonimun angek,’ tap nimbip gok pikasik ñinim?”

15 Tap kunay dun angyi gos ak ma niñnimimb. Tap dun angyi niñbim kun gok, nimbip gek mindrep ginimimb rek ma ayip angak.”

16 Pen Jiysis minim bap kuyip paydon ay angak, “Bi maniy kunay mindeningamb bap, wongday nuk ak, wiyt mangyi tap gok kunay yimb mindeningamb.

17 Gos nuk okok nep key niñdand amiy, tap niñemb yand kunay mindip gok, korip miñgan akay dap ay ñimb mindenim angningamb.

18 Pen gos bap niñiy, korip sikoy gok timbrik yokiy, korip yomb yomb gok nep giy, keñmangyi

tap yand okok mangiysek, di mingan kun okok ay wong ak kirgiy,

¹⁹ tap yand kun gok nep ñimbying, ñing ñimbying, miñmiñ giying, gi mindeningayn angningamb.

²⁰ Pen kun giy ninjek, Gor nup angningamb, 'Nand bi sakiy sek yimb. Miñiy kisyimnamb biyan kumeningamban, tap nand kunaynep mindip gok, an rek diningamb angningamb.'

²¹ "Kun ak rek mey, biynimb tap kiyk gok nep mapin tikjakek, Gor nup ninjey tap yikop rek ayip angak."

Gos Kunay Ma Niñnimimb Gor Nimbip Kond Mindeningamb

(Mat 6:25-34)

²² Jiysis kun angyi, binuk gok kuyip angak, "Chech akay nimb diy yimningambun; tap akay nimb diy ñinjingambun angyi gos yomb ak ma niñnimimb.

²³ Nimbip gayak ak, chech, tap ñinemb nep piyow niñningiy angyi ma gayak.

²⁴ "Yakir gok biynimb gipay rek, wiyt yimey, pikgek tik dand ma opay. Pen wiyt mangiy tik dap nan-giningiy korip bap ma mindip. Gor nep mey, tap ñinemb kuyip ak ñimb. Nuk tap yikop gok niñiy kun gip ak, yenen chinup ma kond mindeningamb angyi gos kunay niñbim?

²⁵⁻²⁶ Akan pen, kumning giningambim ñin ak kirgiy, won bap sek mindenimimb rek ayek; tap yesek kun gok gos kunay niñbim?

²⁷ "Tap sangiy okok jakiy, mangiy piyning sum gip gok, key mokyan giningiy rek ma ayip, Gor

nep gek, mokyaŋ tep yimb ak giy mindpay. Pen wosrey, biyomb Solomon mokyaŋ giyiŋgip ak, mokyaŋ tep kun ak rek ma giyiŋgip.

²⁸ Tap saŋgiy okok jakip kun gok tap yikop; per ma mindeniŋgamb. Miñiy rek mindiy, toy rek pikrik mon daŋgiyey yiniŋgamb. Pen Gor tap ma kond mindep rek kun gok kond mindip ak, chinup kond mindeniŋgamb aŋgiy niŋnimimb ak pen; gos nimb ak parsek ma mindip.

²⁹ “Keñmaŋgiy, ñiŋg, tap gok akay nimb diy ñiŋjun aŋgiy, gos ak ma niŋnimimb.

³⁰ Biynimb Gor ker ma mindpay gok, gos kun ak rek niŋbay; pen Nap yomb ak nimbip sakiy ma gip; tap nimbip tikdip gok niŋimb.

³¹ Kun ak nuk biynimb diy kond mindeniŋgamb ak, chinup sek dinimuŋ aŋgiy, gos nokom niŋiy gem amek mey, nimbip kond mindakniŋ, tap kun gok ma tik diniŋgamb.

*Tap Teprep Nimb Gok Nan-gem Mindonimuŋ
Gor Miñmon Biyoŋ
(Mat 6:19-21)*

³² “Kanj siypsiyp sikoy tiwin biy. Nap yomb nimbip diy kond mindeniŋgayn aŋgiy niŋimb ak mindip ak mey; ma piriknimimb.

³³ Tap nimb gok mindip rek yokiy maniy diy, biynimb tap ma mindip gok kuyip ñinimimb. Kun gem mey, tap mapin nimb gok lum ar biy ma mindeniŋgamb; mindeniŋgamb Gor miñmon biyoŋ. Kun biyoŋ ma kurginiŋgamb; siplep ma siwiy, bi siydep gok siy diniŋgiy rek ma ayniŋgamb.

³⁴ Tap tep nimb gok man ar biy di nan-gem, gos nimbip ak mindeniŋgamb man ar biy; pen semb

biyon nan-gem, gos nimbip ak amningamb kun biyon angak.”

Minj Moka Giy Mindenimimb

³⁵ “Kun ak laplap nimb ak dem apek, mañ mañ pañgiy, ler ak pimbirikiy, lam ak danjiy ay niñmindenimimb.

³⁶ Bi wonḡ giñimbay gok anḡningambay, ‘Biyomb chin ak, biyn diyiḡ tap yomb ñimbsipay namb ak amimb rek, mañ mindip winiḡgamb anḡiy,’ niñnep mindeniḡgambay. Kun ak biyomb kiyk ak giranjiy, ap kinjeḡ ak pik giygiw gek, kasek yikniḡgambay. Kun ak rek nimb ginimimb.

³⁷ Pen nuk andkind apiy niñniḡgamb: niñmindeniḡgambay ak, kuyip di tep yimb giniḡgamb. Biyomb kun ak nuk key, chech nuk ak lip gek apek, mañ mañ pañgiy, ler ak pimbirikiy, kuyip anḡek, am tap ayñimbay tip ak biḡiḡ kus kus gey, nuk key kuyip tap ñiḡemb gok dam ñiniḡgamb.

³⁸ Pen Biyomb ak kisyimnamb biyaḡ akaḡ; kakaruk anḡakniḡ apiy niñniḡgamb: binuk gok wisin ma kineniḡgambay, kuyip di tep yimb giniḡgamb.

³⁹ Kun ak niñim. Biynimb korip nop nimb gok, bi tap siy dep bap ñin ak rek winiḡgamb anḡiy niñmindembiyap ak; korip kuyip ak piklakiy, tap kuyip gok siy ma dipkop.

⁴⁰ Kun ak rek Bi bap Ñinuk winiḡgamb anḡiy, kond mindenimimb. Ma asaw anḡiy, niñniḡgambim ñin ak winimuḡ rek ayip angak.”

*Gor Nup Wong Giñirep Ginimimb
(Mat 24:45-51)*

⁴¹ Jiysis kun angek, Piyta angak, “Biyomb. Minim paydon ay apan kun ak, chinup nep apan akan, biynimb mangiysek apan?”

⁴² Angek, Jiysis angak, “Bi an gos tep mindek, wong gi tep yimb giningamb ak, biyomb nuk ak amning giy, nup angningamb, ‘Bi wong yip giñimbay gunap kuyip kond mindiy, tap ñinemb kuyip gok bilok ñiyiing gi mindenimin angyi’ amningamb.

⁴³ Kun ak kisen andkind apiy, angningamb rek gek niñiy, nup di tep yimb giningamb.

⁴⁴ Niñind apiyn. Nup angek, tap nuk gok mangiysek kond mindeningamb.

⁴⁵ “Pen bi wong nup giningamb ak, biyomb yand ak kasek ma winingamb angyi, biynimb wong giñiningambay gunap kuyip tapin pikiy, tap ñimbiy, ñiing kilis ñimbiy, sakiy ay gi mindakniñ,

⁴⁶ biyomb nuk ak kasek ma winingamb angyi niñningamb ñin ak apiy, nup timey yimb giy, biynimb minim nup ma niñiy, am mindpay kind ak angyokningamb.

⁴⁷ “Biyomb ak apiy mey, minim nuk angak ak niñrep giy, kindik ma gipay biynimb gok kuyip, yiwur yomb yimb rek ñiningamb.

⁴⁸ Biynimb minim nup nind ma niñiy, timey giningambay gok kuyip, yiwur siskoy rek ñiningamb. Pen ar kun ak rek, bi bap nimbip tap yomb ñiy, pen kun ak rek ñim angningamb. Pen tap kunaynep di ñin ar nimbip ak ayek, direp

ma geniᅇgambim, apiy nimbip minim yomb yimb ak aᅇgningamb.

*Gunap Jiysis Nup Ma Diy Asik Key Ayniᅇgambay
(Mat 10:34-36)*

⁴⁹ “Yand opiyn ak, man ar biy sup puᅇg aᅇgiyning opiyn. Okok maᅇgiyseᅇk yinbikop ak tep!

⁵⁰ Yiwur yomb diniᅇgayn ak, yip miker yimb gisap. Kun ak pisnep di den mey, yip tep giniᅇgamb!

⁵¹ “Yip aᅇgningambim, biynimb di jimᅇning gisap aᅇgningambim ak pen; yand opiyn rek, gos ar keykey niᅇjiy, asik keykey ayniᅇgambay.

⁵² “Miᅇniy ᅇin biy tikiy, amyong apyong onep mamind rek mindeniᅇgambay ak; omiᅇal nokom yip dey, omiᅇal yip ma diy, asik keykey ayniᅇgambay. Pen mer ak: omiᅇal yip der, omiᅇal nokom yip ma diy, asik keykey ayniᅇgambay.

⁵³ Bi apiymiᅇay ak, ᅇinuk akanᅇ nop, yip ma dek mey, asik keykey ayniᅇgayr. Biyn amiymiᅇay ak, panuk akanᅇ nonim, yip ma dek mey; asik keykey ayniᅇgayr. Nonim yip, ᅇinuk biyn ak yip kunep: nonim akanᅇ, ᅇinuk biyn ak yip ma dek mey, asik keykey ayniᅇgayr aᅇgak.”

*Bi Kiyᅇ Yomb Key Yimb Ak Wip Aᅇgiy Ma Niᅇyak
(Mat 16:2-3; Mak 8:11-13)*

⁵⁴ Pen Jiysis minim bap sek kuyip aᅇgak, “Pumb paᅇind amimb okok ken semb ayek niᅇjiy, miᅇniy miᅇmon pikning gisap aᅇgiy niᅇmindem, apim rek nep gip.

⁵⁵ Pinim yomb ak akyim ken apek niñiy, miñiy pumb yomb gining gisap angem, apim rek nep gip.

⁵⁶ Tap semb ar biyoñ niñrep giy; man ar biy niñrep giy gipim ak pen, yenen ñin yomb kond mindyñgipim ak, miñiy wip biy ma niñbim?

*Minim Yomb Mindip Rek Gor Yip Tungasik
Ayrep Ginjun*

(Mat 5:25-26)

⁵⁷ “Pen yenen, Gor kinjeñ tep ar niñrep giy dinimimb ak mindakniñ, tap yesek ar gok apun rek gip angyi niñbim?”

⁵⁸ “Pen bi bap nimbip kor dand amjipiyn angek, kor yomb kun ak yenen amjipun angyi, kinjeñnamb okok amying, nund yip minim anğ tungasik ayrep ginimimb. Pen mer ak, nimbip pisnep dam biyomb kor niñimb ñin ar ak yokek, nuk pen di poliys ñin ar ak ayek, nimbip dam kalambis ayingamb.

⁵⁹ Kun ak nimbip aspiyn; kalambis kun ak mindnep mindeniñgambim. Tap day nimbik gok pisnep day pañg diy nep, mis amniñgambim angak.”

13

¹ Won kun ak nep, biynimb gunap ap, Jiysis nup kesim diy angyak, “Galiyliy biynimb gunap ap Gor anğniñep korip ak, tap simboñg ñiyakniñ, gapman biyomb Paylat kuyip pisnep pikayamb, likañ kuyip yowip, meymey siypsiyp pikayey likañ yowip namb siñak angyak.”

² Angeyak, Jiysis kuyip angak, “Galiyliy biynimb kun gok, tap siy tap timey key yimb geyak, kuyip kun gip angyi niñbim?”

³ Ak mer! Pen niñim! Tap siy tap timey gipim gok, yenen kun gipun angyi ma kirgeniñgambim, mañgiysek kun ak rek nep kumniñgambim.

⁴ “Pen miñmon Saylom, korip paryomb yiy akyon giyak ak pañg apyapiy, biynimb onep kañgol pis ak kuyip pikayak ak niñbim. Pen nimb angniñgambim, ‘Jerusalem biynimb gunap tap siy tap timey giyak rek mer; kiyk tap siy tap timey yomb yimb ak gey, Gor gek korip kun ak pañg apyapiy, kuyip pikayak angniñgambim.’

⁵ Pen ak kunep mer! Nimbip niñind yimb aspiyn. Nimb mañgiysek tap siy tap timey gipim gok, yenen kun gipun angyi ma kirginiñgambim ak; mañgiysek kumyak kun ak rek nep kumniñgambim angak.”

Mon Bind Mañgiy Ma Piyp Ak Paydon Ayak

⁶ Pen Jiysis minim bap paydon ay angak, “Bi bap kiyaw mañgiy ak piyan angyi, yin ak jiw dand apiy, miñ wayn wong namb nuk ak yimniñgamb. Kisen andkind apiy niñniñgamb; mañgiy ma nep piyeniñgamb,

⁷ bi wong nup giñiniñgamb ak nup angniñgamb, ‘Simiy nokom nokom yinakniñ, per apiy niñbiyn; kiyaw yimnik ak, mañgiy niñemb ak ma nep piyp. Kun ak wongday namb yip ak mindek tep ma gip. Timb yoknimin angniñgamb.’

⁸ “Angek, bi wong nup giniñgamb ak angniñgamb, ‘Biyomb. Kiyaw kun ak miñiy

ma timb yokep. Yand kiyaw kiñiñ kun ak kipil gi tep giy, tap kaskas gunap dap ayen,

⁹ simiy andikiy ak manjiy piyek kirginimin; pen ma piyek, ñin kun ak timb yokninin angninngamb' angak."

Biyn Kund Ñikgak Ak Yipund Gak

¹⁰ Pen Jiwda lotiw ñin bap, Jiysis Jiwda nan-gep korip miñgan ak amiy, kuyip minim angnin mindek.

¹¹ Korip miñgan kun ak, biyn kichekiy gek, kund ñikgiy nep tanjek tanjek, simiy yin kañgol piskind ayak ak, ap mindek.

¹² Jiysis biyn kun anup, angek apek angak, "Tap nip gip ak suñ ayip angak."

¹³ Kun anjiy, nup diniñakniñ, kund ak yipund gek, Gor nup yimb ak dand aranak.

¹⁴ Pen Jiwda lotiw ñin ak, gek suñ ayak ak niñiy, biyomb Jiwda nan-gep korip kond mindek ak nup miluk yapek, biynimb ap mindeyak gok kuyip angak, "Nimbip biynimb tap gip gok, wong ñin onep kañgol ak mindip; apem gek suñ aynimuj. Miñiy ñin biy lotiw ñin ak pen, kun gispim angak."

¹⁵⁻¹⁶ Angek, Jiysis angak, "Kanj kaw, donjiy nimb gok tiwning ayem mindeningamb ak, lotiw ñin ak niñing nen gek, kuyip simb niñiy miñ wisikiy, dand amem niñing niñningambay akan mer? Pen basind yes chin Ebrahim tikek, tik dand amiy tikpay pañ biy, Seytan nup wosrey tiwningayek, simiy yin kañgol piskind ayip ak, nup simb ma niñbim? Miñiy lotiw ñin biy, miñ nup ayip ak tungasiken, minim yomb aspim? Kun ak tom yimb gipim angak."

17 Jiysis kun angek, bi nup miluk niñyak gok, kuyip nambin yimb gak. Pen biynimb yikop gok, Jiysis tap mageprek giyinjip rek ninjy, miñmiñ yimb giyak.

*Mon Mastet Mangiy Ak Paydon Ay Angak
(Mat 13:31-33; Mak 4:30-32)*

18 Jiysis minim bap sek angyi angak, “Gor biynimb diy kond mindeningamb minim angning gispiyn ak, yergiy rek angen ninrep yimb giningambim?”

19 Mey minim ar angning gispiyn biy rek mindip. Bi bap mon mastet mangiy ak, di wonyday nuk ak yimek, jak yomb giy, alik tep ak pikek, yakir gok ap ay mindeningambay angak.”

20 Minim bap pen tip ak angak, “Gor biynimb diy kond mindeningamb minim ak, yergiy angen ninrep giningambim?”

21 Ar kun ak rek, biyn gok yiys ak sikoy band bap diy, palaw tiyn yomb ak sek, tungandik mandik gey, mindyng yomb yimb tanimb rek ak giningamb angak.”

*Kinjenrumb Sikoy Ak
(Mat 7:13-14, 21-23)*

22 Pen Jiysis Jerusalem amning, yipund giy ma amnak. Nuk miñmon dawin yomb okok sek, miñmon sikoy okok sek namb namb kinying, minim angnnek amnak.

23 Biynimb kun okok mindeyak gok, bap Jiysis nup angak, “Gor biynimb gunap nep dingingambim?”

Angek, kuyip angak,

24 “Kun ak nimbip aspiyn, nimb kilis giy nep, kinjenrumb sikoy tam ak amningambim. Biynimb kunjay yimb nep, korip miŋgan amnun angyi, gi mer niŋningambay.

25 Yenen, bi korip nop nimb ak kinjen giŋek, nimb mis okok nep mindiy, pik giygiw giying angningambim, ‘Biyomb! Kinjen ak yikan angem,’ nuk angningamb, ‘Nimb akay nimb? Yand nimbip ma niŋbiyn’ angningamb.”

26 “Angek, nimb pen angningambim, ‘Nind miŋmon chinup ak, ap minim angninakniŋ, nand yip tap niŋnuk angem,’

27 nimbip tip ak angningamb, ‘Yand nimbip ma niŋbiyn. Nimb akay nimb? Nimb biynimb tap siy tap timey nep gipim ak, kinjen ma yikningayn! Amnimimb’ angningamb.”

28 “Kun ak kisen Ebrahim, Aysek, Jekop, bi Gor minim angep gok, Gor niŋ ar ak mindyakniŋ, nimbip pen anŋ mis yokek, siy angying, meŋg siwbirik mindeningambim.

29 Pen biynimb Jiwda mer gok, gunap pumb lim gip okok ken apiy; gunap paŋind amimb okok ken apiy, gunap akdoŋ nimb apiy, gunap akdoŋ nimb apiy, Gor biynimb diy kond mindeningamb namb ak apiy, jimniy tap yomb niŋningambay.

30 “Kun ak, biynimb nind opay gok, kasek amnun angyi gos ak ma niŋey, biynimb kisenimb gok apiy, kuyip tawsak ay nind amningambay angak.”

*Jiysis Jerusalem Simb Niŋak
(Mat 23:37-39)*

³¹ Won kun sijak nep bi Peresiy gunap apiy, Jiysis nup angyak, “Gapman biyomb Herot nip pikayning gisap ak, miñmon biy kirgiy, miñmon bap key amninin angyak.”

³² Angeyak angak, “Nimb am kayn ayndik kun ak nup angem, niñmindonimuj. Miñiy sek, toy sek biynimb tap gip gok gen suñ ay, biynimb kichekiy malñiluk ambañ ayip gok, gen biynimb yimb ay giningamb. Menik mey, Jerusalem amiy, wong yand ak gi dingingayn.

³³ “Pen miñiy ñin kaw biy, Gor wong yip angak anep gi mindeningayn. Jerusalem amen yip pikayningambay. Bi Gor minim angep gok kuyip, per miñmon gunap ma pikaypay; Jerusalem nep pikaypay.

³⁴ Jerusalem! Jerusalem! Gor, bi minim nup angep nimbip ker yokip gok, yenen per kamb diy pikaypim! Per biynimb nimbip gok kakaruk ñiluk rek, pil beñ okok ayin angen, yip yiruk niñiy ma dipim!

³⁵ Kun ak niñim; Gor angnipep korip yomb nimbik ak, yikop yimb mindeningamb. Yip ma niñningambim. Kisen, bi Gor chinup nen angyokek asaw ak, tep yimb asaw angningambim ñin ak nep, yip niñningambim angak.”

14

Jiysis Bi Ñin Tomb Siw Gak Ak Gek, Suñ Ayak

¹ Jiwda lotiw ñin bap, Jiysis am, Peresiy biyomb bap korip ak tap ñinjakniñ, nuk yerip rek ginimuj angyi, niñyinjek ay mindeyak.

² Yenen: ñin kun ak, bi ñin tomb siw gak bap ap mindek.

³ Jiysis bi kun anup niñiy, bi Peresiy gok sek, bi low tiysa gok sek kuyip angak, “Bi tap gip gok, lotiw ñin ak gon suñ aynimuñ akan, mer?”

⁴ Angek, minim bap pen ma yimb angeyak; nuk bi ñin tomb siw gak anup, diniñek suñ ayek, angyokying,

⁵ bi kun gok kuyip angak, “Ñapan nimb bap akan; makaw nimb bap, lotiw ñin ak ñiñg malpim kaw miñgan ak amek, nimb simb ma niñiy, ma diyokniñgambim?”

⁶ Angek, kiyk pen minim bap ma angyak.

Yimb Yomb Minden Angy Gos Ak Ma Niñnimimb

⁷ Pen bi kun gok tap ñiñning, cheya ar tep tep gok nep bisgey amnakniñ, Jiysis minim bap paydon ay angak,

⁸ “Bi bap biyn diniñg giy, tap yomb ñiñning nimbip suk angek amiy, cheya tep aynimuñ ar ak, ma bisginimimb. Bi kun ak nuk, biyomb yimb bap apiy bisgan angy, aynimuñ rek ayningamb.

⁹ Kun ak nimb ar kun ak bisgeniñgambim, bi nimbip suk angniñgamb ak apiy angniñgamb, ‘Nimb key siñak amem, biyomb biy bisgan angek,’ nimbip nambin gakniñ, am gol okok bisginiñgambim.

¹⁰ “Pen nimbip tap ñiñun angy suk angeniñgiy, amiy gol okok bisinñg mindem mey, bi nimbip suk angniñgamb ak apiy angnimuñ, ‘Buñgiy sikop.

Nimb apiy cheya tep ar biy bisgim angek,' biynimb tap ñiñning ap mindeningambay gok nimbip niñiy, bi gok namb biy biyomb mindpay angingambay.

¹¹ Kun ak rek, biynimb chin yimb yomb mindip angyi niñbay gok, Gor niñek yimb kuyip apyowningamb. Pen biynimb, Gor Biyomb yimb mindip angyi siskoy diy mindpay gok, Gor yimb kuyip gek araningamb angak.”

¹² Jiysis minim kun ak angyi, bi tap yomb ñiñning, biynimb suk angak ak nup angak, “Nand tap yomb ñiñning; namam nak gok, buñgiy nak gok, biynimb miñmon nak jimñiy gok, bi maniy kuñay mindeningamb gok kuyip nep suk ma angnimin. Biynimb kun gok rek, nip pen ambey ñiningambay.

¹³ Tap yomb ñiñning; biynimb yimgeprek gok, biynimb ñin tomb pañg pikek amdip gok, biynimb windin koy gok, biynimb ñin tomb timey gip gok kuyip suk angey apiy; tap ñiñnimimb.

¹⁴ “Biynimb simbgeprek kun gok, nip pen ñiningiy rek ma ayingamb ak mey; kisen Gor biynimb suñ-tep nuk gok, gek tikjakningambay ñin ak, nip pen ñiningamb angak.”

*Tap Yomb Ñiñningambay Ak Paydonj Ayak
(Mat 22:1-10)*

¹⁵ Pen minim kun ak niñiy, bi kiy yip tap ñimbek bap, Jiysis nup angak, “Gor biynimb nuk diy kond mindeningamb gok, nuk yip jimñiy tap yomb ñiñningambay rek, miñmiñ yimb giningambay angak.”

16 Angek, Jiysis angak, “Bi bap tap yomb ñiñning, biynimb kuñaynep suk angningamb.

17 Pen tap yomb ñiñemb ñin kun ak apeningamb, bi nup wong giñiningamb ak nup angyokiy angningamb, ‘Miñiy am biynimb angaypiyn gok kuyip am poñind wan angek,’ amiy angningamb, ‘Tap mañgiysek dap nan-gip nen, apem amnun angningamb.’

18 “Angek, biynimb kun gok bap angningamb, ‘Yand amnim ak pen; mankumb bap tawpiyn ak, niñning amjiapiyn angningamb.’

19 “Bap angningamb, ‘Amnim ak pen; wong giyan angyi, makaw anep wanjrem tawpiyn ak, wong girep giningiy akan angyi, tiwning diniñning amjiapiyn angningamb.’

20 “Bap angningamb, ‘Amnim ak pen, biyn yand ak kisen nep diapiyn angningamb.’

21 “Kun angey, bi kun ak andkind amiy biyomb nuk anup angningamb, ‘Biyomb! Biynimb apan gok am angen, kiyk kun kun apay.’ Angek, biyomb ak simbwur nup ak timey gek, binuk kun anup, tip ak dawin yomb kun okok angyokiy angningamb, ‘Nand kasek kinjen tam yomb okok sek, kinjen tam sikoy okok sek amying; biynimb simbgeprek gok diy, biynimb ñin tomb bej bej gip gok diy, biynimb windin koy gip gok diy, mumbwak mind tep ma gip gok diy, dand winimin angningamb.’

22 “Angek, angningamb rek giy, kisen bi wong giñemb kun ak angningamb, ‘Biyomb. Apan rek kisen gipiyn ak pen; wikan gunap tip anep mindip angningamb.’

²³ “Angek, biyomb ak bi kun ak nup, miñmon yikop okok angyokiy angningamb, ‘Kinjen tam yomb okok sek, kinjen tam sikoy okok sek amiy, biynimb kuñay yimb dand apey, korip miñgan yip ak pisnep timbik dinimuñ.

²⁴ Pen biynimb nind suk angen ma opay gok, tap yip siskoy gunap ma ñiñningambay. Mer yimb angningamb’ angak.”

*Gos Niñrep Giy Yip Ker Winimimb Angak
(Mat 10:37-38)*

²⁵ Jiysis kun angyi amnakniñ, biynimb kuñay yimb nep, nup kisen giyakniñ, nuk andikiy kuyip angak,

²⁶ “Biynimb gok yip ker winiñgambay ak pen, gos yomb kiyk amningamb; nop, nonim, nunay, numam, biyn, ñapan kiyk, akan mumbwak kiyk key ak; yand niñen biynimb yand mindeningiy rek ma ayip.

²⁷ “Biynimb gunap angningambay, Jiysis biynimb nuk mindenjun ak pen; kun gon, biynimb gunap chinup timey giniñgiy rek ayip angyi, mumbwak kiyk keynep gos niñyিং mindeningambay ak, kuyip ma diniñgayn.

²⁸ “Pen bi nimb bap, korip yomb bap giniñg, maniy ak yerip yerip diy ginim angyi, gos ak niñrep giy ginimuñ.

²⁹ Pen giyn giyn angyi, simen ak nind nep giniñgamb ak pen, korip par kun ak sisak gek, biynimb gok nup angyiwiñ angningambay,

³⁰ ‘Bi par ak korip giniñg rek gi dand amiy, day sek kirgip angningambay.’

³¹ “Pen kun ak rek, bi bap, biyomb bap yip penpen gining; gos niŋ-tep giy amnimuŋ. Gos niŋdand amiy, amiybi yand ak ten tawsin nep mindip; biyomb kun ak amiybi nuk tiwendiy tawsin mindip; penpen giy, yip ñaŋg aynimun rek ayip aŋgiy mey,

³² par okok kisen owakniŋ, minim ak yokiy aŋgningamb, ‘Minim aŋg jimñinjur aŋgningamb.’

³³ “Kun ak niŋrep ginimimb. Tap nimb gok nep wasemb ay, biynimb nimb gok nep wasemb ay giningambim ak, biynimb yand ma mindeningambim.

Sol Minim Ak Paydoŋ Ayak

³⁴ “Sol tap yindik tep yimb ak pen; yindik nuk ak amek, yergiy gey tip ak yindik giningamb?”

³⁵ Sol kun ak rek, di woŋgday ak ayey, timey giningamb. Kun ak woŋg nuk bap ma mindip; diyokep rek nep ayip. Minim kun ak, biynimb gos timund sek ak tikniŋnimimb aŋgak”

15

Siypsiyp Ñiluk Kurgak

(Mat 18:12-14)

¹ Biynimb tap siy tap timey giyak gok sek, bi takes dep gok sek Jiysis minim asap ak niŋun aŋgiy, ap niŋmindeyak.

² Pen bi Peresiy gok sek, bi low tiysa gok sek Jiysis nup, aŋgjiwiŋ aŋgyak, “Nuk yenen bi tap siy dep gok yip, bi takes diyiŋg maniy yesek gunap dipay gok yip, per tap jimñiy ñiŋimb aŋgyak.”

³ Kun aŋgey, Jiysis niŋiy, minim bap kuyip paydoŋ ay aŋgak,

4 “Bi nimb bap, kanj siypsiyp ñin jiwiy onep mamind ak mok mindeningamb. Pen nokom bap kurgek, gunap dam wikan bap ayek, tap kaskas ñinyakniñ, kanj nuk kurginingamb ak, mapin piñiyñiy nep ayek, piyowek amningamb. Am piyow giranğrağ niñiy,

5 nup tep yimb gakniñ, di wanjrem ar ak ay dand korip winingamb. Dand apiy,

6 buñgiy nuk gok kuyip suk aņgiy, biynimb miñmon nuk yip jimñiy gok kuyip suk aņgiy gek, ap nan-gey aņgningamb, ‘Kanj yand kurgip ak piyow niñiy dipiyn nen; maņgiysek apem miñmiñ gun aņgningamb.’

7 “Kun ak rek, Gor biynimb nuk kuņaynep suņ-tep rek ayningamb ak pen; gos nuk ak amningamb biynimb minim nup timbrikiy, pisnep kumjun rek ayip aņgiy, niņningambay gok. Kun ak mey, bap nup ker apek, enjol nuk gok yip miñmiñ yimb giningambay.

Maniy Maņgiy Kurgak

8 “Akaņ pen, biyn bap maniy maņgiy nuk onep wanjrem ak mindeningamb. Pen won bap, korip miņgan okok kapkap yapeningamb, nuk yerginingamb? Nuk lam daņgiy ay, tap day day liņ liņ, maniy nuk won kun ak niñiy dek,

9 nup tep yimb gakniñ, buñgiy nuk gok kuyip, maņgiysek suk aņgek ap nan-gey aņgningamb, ‘Maniy yowip won ak piyow niñbiyn nen, maņgiysek apem miñmiñ gun aņgningamb.’

10 “Kun ak rek, Gor biynimb nup kirpay gok kuyip giningamb. Biynimb nup kirpay kun gok, bap gos kisenimb niñiy, nup deningamb, nuk

enjol nuk gok yip miñmiñ yimb giniᅇgambay aᅇgak.”

Ñi Ak Nop Nup Kiriᅇg Amnak

¹¹ Jiysis kun aᅇgiy aᅇgak, “Bi bap ñi omiᅇal tikniᅇgamb.

¹² Ñinuk kisen ak, ap nop nup aᅇgniᅇgamb, ‘Bapiy. Tap chirupmiᅇay apan gok, pikasik yip gok key ñan aᅇgek,’ nop tap kuyipmiᅇay gok pikasik keykey ñiniᅇgamb.

¹³ Ñek, ñinuk kisen ak permindiy mer, nop tap pikasik ñiniᅇgamb gok yokiy maniy diy, dand miñmon paryomb okok amniᅇgamb. Am kun okok mindiy, biyn siy tap timey okok giyᅇg, maniy dand amniᅇgamb gok, maᅇgiyseᅇ giñimb diniᅇgamb.

¹⁴ “Kun giy ñimbdeniᅇgamb, yiwan yomb yimb ak wiᅇniᅇgamb miñmon kun ak. Maniy diy, tap taw ñiᅇnimuᅇ rek bap, ma yimb mindeniᅇgamb.

¹⁵ Kun gek, am bi miñmon nop nimb, kun ak nimb bap aᅇgniᅇk, nup kanj woᅇg ak aᅇgayniᅇgamb.

¹⁶ Pen nup yiwan yomb yimb ak ginep mindek mindek, kanj mokniᅇgambay tap day gok gunap, ñiᅇnimuᅇ rek ayniᅇgamb ak pen; biynimb gunap, nup tap keñmaᅇgiy ma ñiniᅇgambay.

¹⁷ “Pen kisen, gos nuk ak asik ayek aᅇgniᅇgamb, ‘Bapiy bi nup woᅇg giñimbay gok, keñmaᅇgiy kuᅇay mindip. Yand biy minden, yiwan yomb yimb ak gip.

18 Bapiy mindip ak tip andkind amiy, nup angningayn, “Windin yirik ar nip ak timey giy, Gor windin yirik ar ak timey giy gipiyn rek,

19 yip ñiyand ma angnimin. Bi woŋg nip giñemb yikop rek bap, angayey mindenim, angningayn” angningamb.’

20 “Kun angyi, sanjiningamb. Am am, nop mindeningamb sinjak maŋ maŋ gakniŋ, nop ñinuk nup parchim niŋek, simb timey yimb gek, kasek am nup di kaykol gakniŋ,

21 angningamb, ‘Bapiy. Gor windin yirik ar ak timey giy, windin yirik ar nip ak timey giy gipiyn rek, yip “Ñiyand” ma angnimin angningamb.’

22-24 “Nop pen, bi woŋg nup giñiningambay gok kuyip angningamb, ‘Ñiyand ak pisnep kurgiy kumak rek ayak ak pen; miñiy niŋsiyiyn. Nup chech paryomb ak ayñiy, ñin riyŋ ayñiy, tomb tirup ayñiy ginimimb. Kun giy, am makaw ñiluk tep yimb bap pik dand apem, dangyi ñimbyiŋ, miñmiñ ginjun angningamb.’ Angek, angningamb rek giy, keñmaŋgyi dangyi ñimbyiŋ, miñmiñ giningambay.

25 “Pen ñinuk nind ak, woŋgday okok girangyi, andkind yep korip maŋ sinjak apiy niŋningamb; giyta pikiy, miñmiñ giyiŋ geniŋgambay.

26 Kun gey niŋyi, bi nop nup woŋg giñemb bap nup angniniŋ angningamb, ‘Yergispay?’

27 Angek angningamb, ‘Namam kisen kumimb angyi niŋbun ak pen; miñiy andkind apek, nap makaw ñiluk tep yimb bap, pik dangyi ñimbyiŋ, miñmiñ gispay angningamb.’

²⁸ “Angek, nup miluk timey yimb yapek, korip mingan ma yimb amningamb; mis akyaņ nep mindeningamb. Nop pen mis apiy, ‘Korip mingan wan anġiy’ nup minim sisayn anġek,

²⁹ ñinuk anġningamb, ‘Yand minim apan rek kindik giy, bi yikop woņg giñimbay rek ak mindiy, woņg nip ak per gen gen, simiy kuņay yimb nep yinimb. Pen yip meymey ñiluk bap ñey, buņgiy yand gok yip pik danġiy ñimbyiņg, miñmiñ ma gipun.

³⁰ Ñinak kun ak, tap bilok ñinak gok dam biyn siy, tap okok giy, ñimbdiy apek, nup simb niņiy, makaw ñiluk tep yimb ak pikpan anġningamb.’

³¹ “Kun anġek, nop ñinuk nup anġningamb, ‘Chirapiy per mindpur rek, tap yand gok maņgiysek nak diniņgamban.

³² Namam kisen kumimb rek ayak ak pen; miñiy tip ak apek yimb niņiy mey, miñmiñ gispun anġningamb’ anġak.”

16

Kisen Yergiy Rek Mindeningambim Gos Ak Niņnimimb

¹ Jiysis binuk gok kuyip anġak, “Biyomb tap nuk kuņay mindeningamb bap, bi kond mindep nuk bap anġayek, tap nup gok kond mindeningamb. Pen biyomb ak, minim bap niņningamb; bi tap nup kond mindeningamb ak, tap nup gok mon-mon giniņgamb.

² Kun ak niņiy, nup suk anġek apek anġningamb, ‘Tap yip kond mind tep ma gipan ak, yip anġñey niņbiyn. Kun ak nand am, tap yand

yerip yerip mindip gok ñin paŋg tep giy; biynimb okok kuyip, tap day yand yerip yerip mindip gok ñin paŋg tep giy, ap yip aŋgñinimin. Pen wong yip ak kisen ma giniŋgamban aŋgniŋgamb.’

³ “Aŋgek, bi tap nup kond mindep kun ak, namb nuk okok nep gos kuŋay niŋiy aŋgniŋgamb, ‘Biyomb ak yip aŋgyoksap rek yerginim? Yand bi kilis ma mindpiyn ak, man piŋiy paŋgnim rek ma ayip. Biynimb gunap tap kuyip ak asimbi aŋgñimben, yip nambiŋ giniŋgamb aŋgniŋgamb.’

⁴ Pen kisen gosimb niŋrep giy aŋgniŋgamb, ‘Yerginim ak niŋsiyiyn. Ar kun ak gen biyomb ak yip aŋgyokek, biynimb gunap yip dey, korip kiy ak kin mindeniŋgayn aŋgniŋgamb.’

⁵ “Kun aŋgiy, biyomb nuk ak biynimb gunap kuyip, tap day mindeniŋgamb gok suk aŋgek, bi nind winiŋgamb anup aŋgniŋgamb, ‘Biyomb yand ak, tap day nuk nip yerip yerip mindip?’

⁶ Aŋgek, ‘Wel diram ñin jiwiy onep kaŋgol ak aŋgniŋgamb.’ Aŋgek aŋgniŋgamb, ‘Tiker biy diy, kasek ñin jiwiy omiŋal nokom nep tikan aŋgniŋgamb.’ Aŋgek, aŋgniŋgamb rek giniŋgamb.

⁷ “Kisen bi bap apek aŋgniŋgamb, ‘Biyomb yand ak, tap day nuk nip yerip yerip mindip?’ Aŋgek, ‘Wan tawsin rays bek aŋgniŋgamb.’ Aŋgek aŋgniŋgamb, ‘Tiker biy diy, kasek eyit handret nep tikninin aŋgniŋgamb.’ Aŋgek, aŋgniŋgamb rek giniŋgamb.

⁸ “Kun gek, kisen biyomb ak niŋiy aŋgniŋgamb, ‘Bi tap yip kond mindep ak, yerer giy mindrep giniŋgamb ak, niŋrep gip aŋgniŋgamb.’

“Kun ak niņim: Biynimb yikop gok apay, ‘Miņiy yergiy gon, kisen bisgep chin ak mindeniņgamb aņgiy’ gos ak niņyiņg, gey amimb. Pen biynimb Gor ker mindpay gok, kun rek gey ambikop ak tep.

⁹ Maniy tap yerip man ar biy mindip gok, biynimb yimgeprek gok kuyip simb niņiy ñem mey; kisen tap kun gok pisnep kurginiņgamb ñin ak, kinjeņ tep nimb ak mindeniņgamb.

¹⁰ Tap sikoy bap, biynimb gunap kuyip ñin ar ak ayey, direp ma giniņgambay ak; tap yomb bap ñey, kunep giniņgambay. Pen tap sikoy bap, di ñin ar kuyip ayey, direp giniņgambay ak; tap yomb gok ñey, kunep giniņgambay.

¹¹ Pen nimb taprep lum ar biy diyiņg, niņrep giy ma geniņgambim; an nimbip gek perper mindeniņgambim.

¹² Biyomb ak tap nuk, pen ñin ar nimbip ayek, direp ma geniņgambim, gos yerip niņiy, tip tep miņmon nuk biyoņ ak nimbip aņgniņgamb.

¹³ “Bi nokom bap, biyomb omiņal kuyip wong giņinimuņ rek ma ayip. Yenen: nuk biyomb bap nup niņek tep geniņgamb, biyomb bap nup kirginiņgamb. Akan biyomb bap nup niņek tep geniņgamb; bap nup kirginiņgamb. Kun ak, nimb maniy tap yikop gok, tap tep yimb aņgiy, Gor nup kirginimimb rek ayip ak; niņrep ginimimb aņgak.”

¹⁴ Bi Peresiy gok, gosimb yomb kiyk maniy ar ak nep niņyiņgipay ak mey, Jiysis minim aņgak kun ak niņiy, aņgiwyak.

15 Anġjiweyak, kuyip anġak, “Tap biynimb niġey tep gip gok, Gor niġek tap yikop rek ayip. Nimb biynimb windin yirik ar ak, chin biynimb tep mindpun apim ak pen; Gor namb nimbip biyaŋ niġimb.

16 “Pen Jon bi niġing pikniemb ma mindek niin ak, biynimb gok Mosis low minim tikak ak sek, bi Gor minim anġep gunap minim tikyak ak sek niġiy, ar kun ak gey amyinġip. Pen miñiy, Jon apiy, minim tep Gor biynimb diy kond mindeniġamb ak anġek niġiy, biynimb maŋiysek ar kun ak nep amnun anġiy, gey amġap.

17 Pen semb biyoŋ sek, mankumb biy sek kurginiġamb rek ayip: Gor low minim ar ak, kurginimuŋ rek ma mindip.

18 “Kun ak bi biyn diy kirġiy, am biyn kisenimb bap dipay gok, timey gipay. Pen bi an tikġakiy, biyn bi diy kirġak bap nup diniġamb ak; kunep timey giniġamb.

Maniy Bi Ak Yip Lasaras Yip

19 “Bi bap maniy tap nuk kuŋay yimb mindyiŋġip. Nuk chech teprep yimb gok nep yimiy, tap niġemb teprep gok nep niimbyiŋġip.

20 Pen korip kinjeŋrumb gol nuk siġak, bi soy sek tap ma mindek bap, dap ayey mindyiŋġip. Yimb nuk Lasaras.

21 Gosimb nuk ak, yand bi tap kuŋay mindip biy tap niimbek, day day boŋġ molik okok yowniġamb gok niimben mey, yip yiwan ma giniġamb anġyiŋġip. Pen kayn gok apiy, soy nup gok bileŋġ niimbyiŋġipay.

22 “Kindik, bi maniy tap nuk ma mindyngip kun ak kumek, enjol gok ap nup dand Gor miñmon biyoñ amiy, Ebrahim yip ayak. Bi maniy tap nuk kuñay mindyngip ak, kunep kumek komyakniñ,

23 am mon key yinjap ak, yiwur yomb yimb gakniñ mindyngip. Pen mindiy, kiyonngiy niñak: Ebrahim, Lasaras yip keykey sinbiyoñ minderik.

24 Niñiy, suk anngiy angak, ‘Bapiy Ebrahim. Yip simb niñan. Lasaras nup angey, ñin mañgiy par nuk bap ñiñg ak tawiy, dap alemb yip ak diniñek, yip sayn gañ. Mon ak yiniy, yip yiwur timey yimb gip angak.’

25 “Angek, Ebrahim angak, ‘Ñi niñan! Man ar biyañ mindenak ñin ak, nak tap tep gok nep dinak; Lasaras tap timey gok nep dak. Pen miñiy miñmon biy, nuk sayn tep mindakniñ, nip yiwur yomb gisap.

26 Gor mol yomb yimb ak, namb biy gayak ak mey; chin biynimb pis biy, talakiy kayañ ak ma amniñgambun. Pen nimb pis kayañ ak talakiy, biy ma winiñgambim angak.’

27 “Angek, bi kun ak angak, ‘Kun apan ak, Lasaras nup angey, bapiy korip amiy,

28 mam yand onep mamind ak kuyip, minim kilis yimb ak angenimun, miñmon yiwur pernep gip biy, ma winiñgiy angak.’

29 “Kun angek, Ebrahim angak, ‘Gor Mosis nup gos ñek, Baybol buk minim tikak ak sek, bi minim nup angep gunap kuyip gos, ñek Baybol buk tikiyak minim ak sek mindip. Niñniñg, kun gok niñniñgiy angak.’

³⁰ “Angek, maniy bi kun ak angak, ‘Bapiy. Ak tep ma apan. Biynimb bap kumiy tikjakiy, am angeningamb mey, niñind angip angiy, tap siy tap timey gipay ar ak kirgiy, Gor nup nep gosimb niñningambay angak.’

³¹ “Angek, Ebrahim angak, ‘Kiyk Mosis minim tikak ak ma niñiy, bi Gor minim angek gunap, minim tikiyak ak ma niñiy gipay ak; bi bap kumiy tikjakiy, am angek, kunep ma niñningambay angak.’ ”

17

Tap Siy Tap Timey Giy Apyap Pikpay (Mat 18:6-7; Mak 9:42)

¹ Jiysis binuk gok kuyip angak, “Biyn bap akan, bi bap miñ timey ar ak giy, biynimb gunap kuyip gos ñey, ar kun ak giy apyap pikpay ak; timey yimb gip. Miñ ar kun ak nind giyñgipay, miñiy gipay, kisen kunep giningambay. Pen gipay kun ak rek, yiwur kun ak key yimb diningambay.

² Kiyk won kun siñak nep, gining giyakniñ, kuyip kamb yomb bap, kuñam ak sek miñ aybirikiy, dam ñing yokpiyap ak, kuyip tep gipyap. Yenen: kiyk kim mindiy, biynimb yip ker ñin tomb wos ma gip gunap, kuyip gey apyap pikningambay ak, yiwur yomb yimb diningambay.

³ Kun ak nimb asik tep ginimimb.

Pen mam akan, ay bap tap siy tap timey gonimun, nup niñchikiy angem, yenen kun gipiyn angiy niñonimun; niñiy kirginimimb.

⁴ Pen tap nimbip rek gunap timey giying, yenen kun gipiy n angyi, ap angonimun, niñiy kirginimimb. Nin nokom bap, kun gek gek onep ar ak rek amek, kunep niñiy kirginimimb angak.”

Gor Nup Gosimb Niñbay

⁵ Jiysis kun angek, binuk gok angyak, “Chin key kun ginjun rek ma ayip; kuyip yiruk niñjun rek ayip. Kun ak nand gey, chin Gor nup gosimb nokom niñon, chinup kond mindakniñ, kun ginjun angyak.”

⁶ Angey, Jiysis kuyip angak, “Pen Gor nup gosimb niñbim ak yomb mer: mon mastet mangyi achimb rek nep mindek; angningambim, ‘Mon biy junj sek jiwiy, ñiñg yomb namb sinbindon, jak mindey angem,’ Gor angningambim rek nep giningamb.

Bi Wong Giñemb

⁷ “Bi bap, bi wong giñemb nuk bap diy angek, am man piñiy pangiy akan, kanj siypsiyp gok mok tangiy, andkind korip apek, biyomb nuk ak, nup yerip angningamb? ‘Nip yiwan gip, kasek ap bisgiy tap niñan angningamb?’

⁸ Mer! Kun ma angningamb. Nuk angningamb, ‘Chech ak dey apek, ler ak aybirikiy, ñiñg tap yip gok dapey ñimben, kisen ñiñg tap nand gok niñan angningamb.’

⁹ Bi wong giñemb nuk ak, angningamb rek gek, nup minim tep gunap ma angningamb. ‘Bi wong giñemb yand ak mey, apiyn rek gip angningamb.’

¹⁰ “Kun ak rek mey nimb. Gor nimbip angningamb rek giy, kisen angningambim, ‘Chin

biynimb tep mer: ar bap key ma gipun; wong chin gep rek ak mey, gipun angningambim' angak."

Bi Soy Aydik Ayak Onep Wanjrem Ak Gek Sun Ayak

¹¹ Jiysis Jerusalem amniyn angyi, miñmon Samariya biy Galiyliy bindon, namb ak am am miñmon bap amjakakniñ,

¹² bi soy ayndik ayak onep wanjrem ak, nup namb pikiy, keykey sinbindon mindiy,

¹³ angyak, "Biyomb Jiysis. Chinup simb niñan angyak."

¹⁴ Angeyak, kuyip angak, "Nimbip sun ayip nen, am bi Gor nup simbongep gok kuyip, yomnimimb angak." Kun angek, kinjenamb okok amniyakniñ, kuyip manjiysek sun ayek,

¹⁵ bi Samariya nimb ak nup sun ayak ak niñiy, minim yomb angying, Gor nup yimb ak dand aranying,

¹⁶ andkind ap Jiysis mindek sinjak kongim yimiy, nup "Tep" angak.

¹⁷ Kun gek niñiy, Jiysis angak, "Yand angninbiyn-en; bi onep wanjrem ak sun ayip angyi niñbiyn ak pen; bi onep anjip ak akay?"

¹⁸ Bi gunap yenen ma opay? Bi par okok nimb ak nep apiy, Gor nup tep anjip angak."

¹⁹ Kun angyi, bi kun anup angak, "Jiysis yip gek, sun ayningamb angyi gos ak niñban rek, nip gen sun ayip nen, amnon angak."

*Gor Biynimb Diy Kond Mindeningamb
(Mat 24:23-28)*

20 Pen bi Peresiy gok, Jiysis nup angyak, “Kiyn yomb key per kond mindpun ak ñin akay rek apiy, chinup diy kond mindeningamb?”

Angey, Jiysis angak, “Biyomb biynimb diy kond mindeningamb apim kun ak, biyomb kiyn gunap, biynimb misen kond mindey niñiy apay,

21 ‘Biynimb kond mindip biy, kond mindip bindon apay’ rek ma angningambim. Yenen, nuk nimbip bak ay, kapkap kond mindeningamb angak.”

22 Kun angyiy, binuk gok kuyip angak, “Kisen ñin bap, Bi bap Ñinuk nup niñun angyiy, mapin nimbip ak, piñiyñiy nep ayningamb ak pen, nup misen ma niñningambim.

23 Biynimb gunap mindip bindon, mindip biy angey, minim kun ak niñind apay angyiy, ma am piyow niñnimimb.

24 Yenen: Bi bap Ñinuk winingamb ñin ak, añiñak diy, melik parsek gip rek ak, gakniñ winingamb.

25 Pen biynimb miñiy mindipay gok, nup yiruk niñiy ma dey; yiwur yomb yimb ak diy, kumiy tikjak semb biyon amiy, kisen tip ak winingamb.

26 “Nuk winingamb ñin kun ak, wosrey Nowa mindek ñin ak, gak rek giningamb.

27 Biynimb gok tap ñimbying, ñing ñimbying, biyn penpen ñiying gi mindyakniñ, Nowa amyong apyongon siyip miñgan sikind amdey, miñmon yomb sikerek ak pikiy, ñing wilik apiy, biynimb kun gok kuyip, mañgiysekiy wiwingdek kumyak.

28 “Pen bi Lot mindek ñin ak, Sodom Gomora biynimb gok kunep tap ñimbyiᅅg, ñiᅅg ñimbyiᅅg, sikyim giyiᅅg, tap woᅅg giyiᅅg, korip giyiᅅg gi mindyakniᅅ,

29 Lot miñmon kun ak kirgiy, miñmon wikan bap key amnakniᅅ, mon maᅅlaᅅ yomb yimb ak, semb biyoᅅ nimb apiy, Sodom Gomora biynimb kuyip, maᅅgiyseᅅ yin simbok amnak.

30 Bi bap, Ñinuk winiᅅgamb ñin ak; Nowa mindyiᅅgip ñin ak sek, Lot mindyiᅅgip ñin ak sek gi mindyiᅅgipay rek, gi mindeniᅅgambay.

31 “Ñin kun ak, biynimb korip ar biyoᅅ mindeniᅅgiy gok, tap kiyk gok diniᅅg, korip miᅅgan ma amniᅅgiy. Pen biynimb woᅅgday okok taᅅgensiᅅgiy gok, tap gunap diniᅅg, andkind korip ma amniᅅgiy.

32 Lot biynuk nup gak ar ak niᅅnimimb.

33 Pen biynimb key nep mindiy, mindrep giniᅅgayn aᅅgniᅅgambay gok, mon key yinjap ak amniᅅgambay. Biynimb Jiysis ker minden, yip pikayniᅅg pikayniᅅgiy aᅅgiy, yip kisen giniᅅgambay gok, biynimb yand yimb mindiy mey, perper mindeniᅅgambay.

34 Nimbip aspiyn: ñin kun ak, bi omiᅅal minj ar nokom bap, kineniᅅgayr ak; Gor bi bap nup diy, bap nup kirginiᅅgamb.

35 Pen biyn omiᅅal biret jimñiy gi mindeniᅅgayr ak; bap diy, bap nup kirginiᅅgamb.

36 [Bi omiᅅal woᅅgday okok taᅅgensiᅅgayr ak; bap diy, bap nup kirginiᅅgamb aᅅgak.]”

37 Kun aᅅgek aᅅgyak, “Biyomb. Minim aspan kun ak, akay kun giniᅅgamb?”

Angey, Jiysis angak, “Miñ miñgan, mon miñgan, kamb miñgan okok ma giningamb; misen nep namb siñak giningamb angak.”

18

Bi Kor Niñep Bap Biyn Kanjil Bap

¹ Jiysis binuk gok, yiruk ma niñningiy, Gor nup angninging nep mindeningiy angiy, kuyip minim bap paydoñ ay angak:

² “Miñmon bap, biyomb kor niñep bap mindeningamb. Pen bi kun ak, Gor nup gosimb ak ma niñiy, biynimb gok kuyip simb ma niñningamb.

³ Biyn kanjil miñmon kun ak nimb bap, pernep apiy nup angningamb, ‘Bi ñangep yand ak, minim chirup ak niñnimin angningamb.’

⁴ Kun angningamb ak pen, biyomb kor niñep kun ak, minim nup ak ma diningamb. Ma dek, nup ap minek minek angniñ gek gek, kisen biyomb kun ak angningamb, ‘Yand Gor nup, gosimb ak ma niñiy, biynimb gok kuyip, simb ma niñiy gipiyn ak pen;

⁵ biyn kanjil biy minek minek ap angek angek, yip yiruk giningamb nen, kor kun ak niñnim angningamb.’

⁶ “Bi yikop biynimb simb ma niñep ak, kun gak ak pen;

⁷⁻⁸ Gor ma giningamb angiy niñbim? Akan pen, takiy mindiy giningamb angiy niñbim? Mer! Nimbip aspiyn: biynimb nuk key niñiy dak gok kuyip, timey giyakniñ, pumbnamb kisyimken

nup angninying mindpay rek, per ma kond mindeningamb; angningambay rek ninji giningamb angak.”

Bi Peresiy Bap Takes Dep Bap

⁹ Pen chin mind tep gipun; biynimb gunap, mind tep ma gipay angyak rek, kuyip minim bap paydon ay angak,

¹⁰ “Bi Peresiy bap, bi takes diyingip bap Gor nup angninying, Gor angninep korip ak amnirik.

¹¹ Bi Peresiy ak namb nuk okok nep, Gor nup lotiw giy angak, ‘Nip tep yimb aspiyn. Yand bi gunap gipay rek; biyn siy, tap siy, tap timey okok ma gipiyn. Yand bi takes dep biy rek mer.

¹² Wiyk minek minek lotiw minden angyi, per ñin ominjal tap ma ñimbiyn sek. Per tap yand onep wanjrem ak diying, nip nokom bap ñiy, yand onep anjip ak nep dipiyn angak.’

¹³ “Pen bi takes dep ak, keykey sinbikdon jiy kuyangiy mindiy, gos kunay ninji angak, ‘Gor. Yand bi tap siy tap timey gipiyn ak, yip simb ninjimin angak.’

¹⁴ “Nimbip aspiyn: Gor bi takes dep ak kun angek ninji, nup diy, bi suñ-tep yimb mindpiyn angak ak nup ma dak. Yenen: biynimb yimb kiyk key dand aranimbay gok, Gor gek apyap pikningambay. Pen biynimb, Gor Biyomb mindip angyi, pirikiy, kapkap mindeningambay gok; Gor gek yimb mindeningamb angak.”

*Jiysis Ñapan Sikoy Gok Kuyip Bilesiym Gak
(Mat 19:13-15; Mak 10:13-16)*

15 Biynimb gok Jiysis ñapan chinup gok bile-siym gan angyi, dand apey, bilesiym gakniñ, binuk gok, biynimb kun gok kuyip niñchikiy angyak.

16 Kun geyak, Jiysis ñapan sikoy gok suk angek wiyakniñ, binuk gok kuyip angak, “Yenen kun apim? Ñapan sikoy gok kirgem, yip ker wiyañ. Gor nup dipay mey; ñapan sikoy kun gok rek.

17 Ñapan sikoy gok, Gor minim ak kun kun giy mindip angey niñiy, kasek dipay. Kun ak nimbip niñind aspiyn; biynimb ñapan sikoy yip gosimb niñbay rek niñningambay gok, Gor kuyip diy, kond mindeniñgamb; biynimb yikop gok kuyip kirginiñgamb angak.”

*Jiwda Biyomb Bap Tap Kunay Mindek
(Mat 19:16-22; Mak 10:17-22)*

18 Jiwda biyomb bap, Jiysis mindek ak apiy angak, “Tiysa nand bi tep yimb. Yand yergen, Gor gek per mindeniñgayn?”

19 Angek, Jiysis angak, “Biynimb gunap tep ma mindipay; Gor nuk nep mey, bi tep yimb mindip. Kun ak gos yerip niñiy, yip bi tep yimb apan?”

20 Pen nand Gor low minim ak niñban: ‘Biyn siy bi siy ma ginimimb. Chip ma ñañgnimimb. Tap siy ma dinimimb. Yesek ma angnimimb. Nap nanim minim angnimiyr ar ak nep niñiy, kindik ginimimb anqip’ angak.”

21 Angek, bi kun ak angak, “Yand ñiskoy miñg tikiy, low minim ar kun ak kindik gi dap dap, miñiy ñin biy, kindik ginep mindpiyn angak.”

22 Jiysis minim kun ak niñiy angak, “Tap nokom bap nep ma gipan. Tap nak gok mangiyseki yoki

maniy diy, biynimb yimgeprek gok kuyip ñiy mey; mindrep gep nand ak, mindeningamb Gor miñmon biyoñ. Kun ak apiyn rek giy apiy, bi yand bap mindenimin angak.”

²³ Angek, nuk minim kun ak ninjiy, gospar yimb ayak.

²⁴ Gospar ayek, Jiysis angak, “Biynimb tap kuñay mindip gok, kosyam yimb Gor nup gosimb niñey, kuyip diy kond mindeningamb.

²⁵ Kanj kamel gok, ñiw lekpay miñgan ak aning, kasek amningiy rek ayningamb; pen biynimb maniy tap kiyk kuñay mindip gok, kosyam yimb Gor nup gosimb niñey, kuyip diy kond mindeningamb angak.”

²⁶ Kun angak, biynimb mindeyak gok angyak, “Minim aspan kun ak, biynimb gunap Gor ker mindenjun rek ma ayip. Akan yerip?”

²⁷ Angey, Jiysis angak, “Ar gunap biynimb giningiy rek ma ayningamb ak pen; Gor nuk gining, ginimuñ rek nep mindip angak.”

²⁸ Kun angak, Piyta angak, “Niñan! Korip tap chin gok mañgiysek kirgiy, nip chingiy nep tapun angak.”

²⁹ Angek, Jiysis kuyip angak, “Nimbip niñind aspiyn. Biynimb Gor biynimb nuk kuñay diy kond mindonimuñ angiy; korip, biyn, numam, nop, nonim, ñapan kiyk gok kuyip kirgey, Gor sakiy ma giningamb.

³⁰ Miñiy mindpun ñin namb biy, kuyip kond mind tep gek, tap kiyk gok, biynimb kiyk gok kuñaynep mindeningamb. Pen ñin kisen ak apek, nuk yip perper mindeningambay angak.”

*Yip Pikayningambay Angiy Tip Ak Angak
(Mat 20:29-34; Mak 10:46-52)*

³¹ Jiysis binuk onep wimingan ak kuyip, dand gol okok amiy angak, “Ninim. Miñiy Jerusalem amoningambun, Bi bap Ñinuk nup, wosrey Baybol buk ak tikiy angyak rek giningambay.

³² Nup di bi Jiwda mer gok, ñin ar ak ayeningambay, nup angyiwying, ñiñlon aying, kiñuk giying,

³³ miñ diy pikying, pisnep pikayningambay. Pen minek ominal nokom mindiy, tip ak tikjakiy, kim mindeningamb angak.”

³⁴ Pen kun angek, binuk gok gos pangyiknimun rek ma ayek, minim asap ar ak angyi, ma ninyak.

*Jiysis Bi Windin Koy Gak Ak Gek, Windin Yimb
Niñak*

(Mat 20:17-19; Mak 10:32-34)

³⁵ Pen kisen, am miñmon Jeriykow amjakyakniñ, bi windin koy, maniy tap gok nen asimb angyingip bap, kinjen yomb gol sinak bising mindek ak mey;

³⁶ biynimb kunaynep minim angy pandikyakniñ, biynimb gunap kuyip angninjiy angak, “Yergis-pay?”

³⁷ Angek angyak, “Jiysis bi Nasaret nimb ak, apiy pandiksap angyak.”

³⁸ Kun angeyak, nuk suk yomb angyi angak, “Jiysis! Depiyt Ñinuk! Yip simb niñan angak.”

³⁹ Angek, biynimb pandikeyak gok, nup angy angyak, “Yenen kun aspan? Kapkap mindey angyak.”

Kun angyak ak pen, nuk kapkap ma mindek, suk yomb angying angak, “Jiysis! Depiyt Ñinuk! Yip simb niñan angak!”

⁴⁰ Angek, Jiysis niñiy aland giy, biynimb gok kuyip angak, “Poñind yep mañ sinbiy wim angak.”

Angek, poñind apeyak angak,

⁴¹ “Nip yerginim?”

Angek angak, “Biyomb. Yip gey windin ak tip niñiy angak.”

⁴² Angek, Jiysis nup angak, “Yip geningamb, windin yimb niñningayn angyi gos niñban ak, windin niñan angak.”

⁴³ Angek, won kun anep windin niñiy, Gor nup yimb ak dand aranying, Jiysis amnakniñ, kindik gak. Biynimb mañgiysek Jiysis gak kun ak niñiy, Gor nup yimb ak dand aranyak.

19

Sakiyas Yerer Gak

¹⁻³ Pen miñmon Jeriykow namb kun ak, bi mañ nep won bap, maniy tap nuk kuñay mindyngip ak mindek. Yimb nuk ak Sakiyas. Nuk bi takes dep gok kuyip, mañgiysek kond mindyngip. Jiysis pandikakniñ, biynimb kuñaynep ap niñning geyak, Sakiyas bi mañ won ak mey, Jiysis bi yerip rek ak niñiy angyi,

⁴ nind amiy, mon bind bap tanaraniy, Jiysis apek tam bineñ niñmindek.

⁵ Jiysis pen ap, mon tan mindek kiñiñ siñak apiy, kuyongiy niñiy, Sakiyas nup angak, “Kasek lung

yowan! Miñiy korip nand ak, am mindeningayn anggak.”

⁶ Angek, Sakiyas lung yapiy, miñmiñ giying, Jiysis nup ponind korip nuk amnak.

⁷ Biynimb gok gak kun ak ninjy, miluk yapek angyak, “Bi kun ak am, bi tap siy tap timey gip korip ak, kining amjap angyak.”

⁸ Pen kisen am, Sakiyas korip ak minim ang mindying, Sakiyas Jiysis nup anggak, “Biyomb. Nand niñan! Miñiy tap yand gok bilok pis ak ay, pis ak biynimb simbgeprek gok kuyip ñiningayn. Yand nind tom giy, biynimb gunap tap kuyip siy dinik rek ayip gok, pen ñining, tap nokom bap dinik rek, pen omiñal omiñal ñiningayn. Pen tap omiñal siy dinik rek, pen ñining, onep jiy ak ñiningayn. Kun giy, gi dam dam mangiysek day pang diy, kirginingayn anggak.”

⁹ Pen biynimb gok niñmindyakniñ, Jiysis Sakiyas nup minim ak angyi anggak, “Bi biy nusind Ebrahim, Gor nup gosimb niñak rek niñimb ak mey; Gor miñiy nup diy, biynimb nuk yip korip jimñiy kinbay gok kuyip diy gip.

¹⁰ Yenen: bi bap Ñinuk wak ak, biynimb Gor ker mindpay gok kuyip diniñg ma wak; biynimb nup ker ma mindpay gok kuyip diniñg awak anggak.”

*Bi Onep Wanjrem Ak Maniy Diyak
(Mat 25:14-30)*

¹¹ Pen biynimb kun gok, Jiysis mey, Biyomb per kond mindpun ak; Jerusalem amek, nup kiyn anggayon, chinup kond mindek, mindrep yimb giningambun angyi niñyak.

Jiysis gos ninjak kun ak key ninjy, minim nind angak ak ninjakniņ, minim bap sek paydoņ ay angak,

12 “Bi biyomb mindep rek bap, kond mindep yand ak mindip amen, yip kiņy anğayek, and-kind apiy, biynimb miñmon yand guniy kuyip kond mindenim anğiy, miñmon paryomb okok amningamb.

13 Pen kisen amningamb: nind bi nup woņg giñiningambay onep wanjrem ak kuyip suk anğek apey, maniy yir omiņal, omiņal keykey bilok ñiy anğningamb, ‘Maniy ñispiyn biy diy, woņg biysniys genimimb. Kisen yand tip ak winingayn anğningamb.’

14 “Kun anğiy, amningamb ak pen; biynimb miñmon nuk yip jimñiy gok, nup miluk ninjy, bi gunap anğyokey kisen amiy, bi kond mindep ak nup anğningambay, ‘Bi chinup kiņy anğ ayniņg gispan biy, chin ma diniņgambun anğningambay.’

15 “Pen nup kiņy anğayek, tip ak andkind apiy, bi nup woņg giñiningambay gok kuyip, suk anğek apey anğningamb, ‘Maniy ñinik gok sikyim gi andik mandik giy; pen yerip yerip dipim?’

16 Anğek, bi nind winingamb ak anğningamb, “Biyomb. Maniy yir yip ñinak omiņal ak, sikyim gi andik mandik giy, pen yir ñin jiwiy ak dipiyn anğningamb.”

17 “Anğek, biyomb ak anğningamb, ‘Nand girep gipan. Tap sikoy ak ñenik, woņg girep ginak rek, miñiy miñmon dawin yomb onep wanjrem ak anğen, kond mindeniņgamban anğningamb.’

18 “Bi namb ak apiy anḡningamb, ‘Biyomb. Maniy yir yip ñinak omiḡal ak, sikyim gi andik mandik giy, pen yir onep mamind ak dipiyn anḡningamb.’

19 “Anḡek, biyomb ak anḡningamb, ‘Gipan kun ak rek, miñiy nip anḡen, dawin yomb onep mamind ak kond mindeningamban anḡningamb.’

20-21 “Pen bi nup woḡ giñemb bap apiy anḡningamb, ‘Biyomb. Yand nip niḡbiyn. Nand bi kalrimey yimb. Biynimb gunap tap kuyip gok sikyim girep giy mer; pilgiy rek dipan. Tap woḡ kosyam giy yimbay gok, nand kilis giy nep ñimban. Kun ak yand nip pirikiy mey, maniy yir yip ñinak omiḡal ak, yikop dam tiwning ayen mindek, miñiy dand opiy anḡningamb.’

22 “Anḡek, biyomb ak anḡningamb, ‘Minim nak apan ak tuḡgandikiy, nip key kor giniḡayn. Yip bi timey yimb, biynimb tap kuyip gok sikyim girep giy mer; yikop diy, tap woḡ kosyam gi yimbay gok, nand kilis giy nep, taw piliḡ dipan apan kun ak;

23 yenen maniy yip ak diy, dam beḡ ayey, andkind apiy siyniḡ gunap sek ma dipiyn anḡningamb.’

24 “Kun anḡiy, bi yep maḡ siḡak mindeningambay gok kuyip anḡningamb, ‘Maniy yir yip omiḡal ak piliḡ diy, bi maniy yir ñin jiwiy mindip ak nup ñim anḡningamb.’

25 “Anḡek anḡningambay, ‘Biyomb. Nuk maniy yir ñin jiwiy ak, di mindip anḡningambay.’

26 “Anḡey anḡningamb, ‘Nimbip aspiyn. Per biynimb tap kiyk kuḡay mindip gok, gunap sek

dipay; pen biynimb tap kiyk siskoy mindip gok, gey pisnep yap amimb.

²⁷ Pen biynimb, ‘Kiyη kun ak chin ma dingingambun angyi, miluk niηbay gok kuyip am dand apiy, windin yirik ar yip siηbiy, ñang aynimimb angingamb’ angak.”

Jiysis Nup Kiyη Gok Kuyip Gipay Rek Giying Dand Jerusalem Amniyak

(Mat 21:1-11; Mak 11:1-11; Jon 12:12-19)

²⁸ Jiysis kuyip minim kun ak angyi, binuk gok yip Jerusalem amnun angyi, nuk nind giy,

²⁹ am am, Oliyp pir miñmon Betpasiy-Beteniy gol siηak amjakiy, binuk omiηal kuyip angyokiy angak,

³⁰ “Miñmon wikan bindoη amiy niηningayr; doηgiy marip biynimb ma dand tapay bap, tiwningayey mindeningamb. Wisikiy dand winimiyr.

³¹ Pen biynimb gunap apiy angingiy, ‘Kanj doηgiy chinup ak yenen wisik dand amjipiyr angeningiy’ angnimiyr, ‘Biyomb ak woηg mindek angyokamb, dinging opur angnimiyr’ angak.”

³² Kun angek, amiy niηrik: angak rek nep mindek.

³³ Am miñ ak wisik girikniη, bi doηgiy nop nimb gok apiy angyak, “Doηgiy marip chinup ak yenen miñ wisiksiyir?”

³⁴ Angey angrik, “Biyomb ak woηg mindamb angyip ak mey, wisiksiyur angrik.”

³⁵ Kun angyi, doηgiy marip kun ak miñ wisikiy, poηind dand Jiysis mindek ak amjakiy, chech kiyk

band gunap tunġjiwi, di donġiy ar ak ay, Jiysis nup di ar kun biyoŋ ayer bisgak.

³⁶ Bisgiy, lor ar ak amnakniŋ, biynimb gok, chech tap okok dap lor ar kun ak ayakniŋ, tawyiŋ tawyiŋ amnak.

³⁷ Am am, Jerusalem maŋ maŋ gakniŋ, Oliyp dum kinjeŋ kuyangipay tip ak, biynimb nuk gok kuŋaynep, nup miñmiñ yimb giyiŋ, tap yerip yerip gak gok gos ak niŋiy, suk yomb aŋgyiŋ, Gor nup yimb ak dand aranyiŋ,

³⁸ aŋgyak:

“Gor kiyŋ yomb chinup aŋgyokamb wip biy, chinup kond mindrep giniŋgamb.

Chinup direp yimb gip kun ak, yimb nup dand yiy ar biyoŋ aranjun aŋgyak.”

³⁹ Kun aŋgyakniŋ, bi Peresiy gunap namb kun okok mindeyak gok, Jiysis nup aŋgyak, “Tiysa. Biynimb nak gok kuyip aŋg gey, kun ma aŋgyan aŋgyak.”

⁴⁰ Aŋgeyak, Jiysis aŋgak, “Nimbip aspiyn; kun ak ma aŋgeniŋgambay, Gor kamb gok gek, minim aŋgniŋgambay aŋgak.”

Jiysis Jerusalem Niŋiy Siy Aŋgak

⁴¹ Jiysis Jerusalem maŋ maŋ giyiŋ, dawin yomb kun ak niŋiy, siy ñiŋg tik dam yokyiŋg aŋgak,

⁴² “Miñmon Jerusalem. Nimbip simb yimb niŋsipiyn. Nimbip di Gor yip jimñiniŋg winik ak niŋbikip rek, tep yimb gipkip! Pen ma niŋiy, windin koy rek mindpim! Gor nimbip ker apek ma dipim rek,

⁴³ kisen bi gunap ap dawin yomb nimbip biy, ñiluk ay kus kus gi mindiy,

⁴⁴ pisnep gi timey yimb gey, wong wariy, minj, korip, tap gunap ma yimb mindeningamb angak.”

*Jiysis Gor Anjningep Korip Mingan Ak Amnak
(Mat 21:12-17; Mak 11:15-19; Jon 2:13-22)*

⁴⁵ Kun angiy, nuk Gor anjningep korip ak amiy, biynimb sikyim geyak gok kuyip, ang mis yokying angak,

⁴⁶ “Baybol buk tikiy angyak, ‘Korip yand ak, yip anjningep korip ak mindip angyak’ ak pen, nimb sikyim gem gem, biynimb tap siy diy, ap kapkap kinbay korip bap rek ayip angak.”

⁴⁷ Pen Jiysis minek minek, ap Gor anjningep korip mingan ak, biynimb gok kuyip minim angñiyingip. Bi Gor nup tap simbonjep yomb gok, bi low tiysa gok, bi minim tungasikep gok nup pikayun angiy, gos nokom niñyak ak pen,

⁴⁸ biynimb manjiysek minim tep nup ak niñun angiy, yiñrimey yimb geyak, minim bap angiy nup pikayingip rek ma ayak.

20

*Nip An Angek Kun Girapan
(Mat 21:23-27; Mak 11:27-33)*

¹ Pen ñin namb kun sinjak, Jiysis Gor anjningep korip mingan ak amiy, nuk biynimb di Gor yip jimñiy ayingamb minim tep ak angñakniñ, bi Gor nup tap simbonjep yomb gok, bi low tiysa gok, bi minim tungasikep gok apiy,

² nup angyak, “An nip angek, ap Gor angninɛp korip biy, biynimb gok kuyip yuk yokying, minim angniyiɛg girapan?”

³ Angey angak, “Yand nimbip pen, angninɛp bap angninɛg gispiyn.

⁴ Jon biynimb gok kuyip ñiɛg pikñak ak, gos nuk key niɛiy gak akan, Gor angek gak?”

⁵ Angek, kiyk key angninɛ angninɛ giy angyak, “ ‘Gor angek Jon biynimb gok kuyip ñiɛg pikñak angon,’ nuk angninɛgamb, ‘Kun ak minim nup ak, yenen ma niɛbim angninɛgamb.’

⁶ Pen Jon gos nuk key niɛiy, biynimb gok kuyip ñiɛg pikñak angon, biynimb guniy, Gor angek apiy gek niɛbay rek, chinup kamb jiw pikayniɛgambay angyak.”

⁷ Kun angyi, Jiysis nup angyak, “Jon ap biynimb gok kuyip minim angniy, ñiɛg pikñiy gak ak, chin ma niɛbun. Gos nuk key niɛiy gak akan, Gor angek gak angyak.”

⁸ Kun angey, kuyip angak, “Nimb yip pen ma angnimbim rek, yand pen; an angek ap gispiyn ak, nimbip ma angninɛgambay angak.”

Jiwda Biyomb Gok Bi Gor Wonɛ Giɛniɛgipay Gok Timey Giyak Rek, Ñinuk Nup Kunep Giniɛgambay Angyi Paydon Ay Angak (Mat 21:33-46; Mak 12:1-12)

⁹ Pen Jiysis kuyip paydon ay angak, “Bi bap wayn wonɛ ak gi yimiy, biynimb wonɛ nup giniɛgambay gunap kuyip angay, nuk am miñmon paryomb okok mindeniɛgamb.

¹⁰ Pen wayn mangyi pik giniɛgamb ñin ak, binuk bap angyokiy angninɛgamb, ‘Am angey,

wayn mangiy yip gunap ñey, dand winimin angningamb.’ Angek amjakek, biynimb wayn wong gi mindeningambay gok, nup pik pik ay, yikop angyokey andkind winingamb.

¹¹ Kun gey, bi wayn wong nop nimb ak, bi bap pen angyokek amningamb. Pen nup kunep pik pik ay, yikop angyokey andkind winingamb.

¹² Kun gey, bi kisenimb bap angyokek amjakek, nup tapin yimb pikiy, liping dam mis akyan yokningambay.

¹³ “Kun geningambay, bi wongday nop nimb ak, Ñi mapin yand ak yoken, minim angeningamb ninningambay angyi, yokningamb.

¹⁴ Yokek amjakek, biynimb wayn wong gi mindeningambay kun gok angningambay, ‘Ñi wip biy, nop wayn wong ak, nuk dinimun rek ayip. Nup pisnep pikay, chin dun angningambay.’

¹⁵ Kun angyi, nup liping dand mis okok amiy, pisnep pikayey kunningamb. Pen kun geningambay, bi wongday nop nimb ak kuyip yerginingamb?

¹⁶ Nuk apiy, biynimb kun gok kuyip pikay, wongday kun ak biynimb gunap kuyip pen angek, kond mindeningambay angak.”

Jiysis kun angek, biynimb ninmindeyak gok angyak, “Mer! Chinup Jiwda biynimb kun ma ginimun. Biynimb kisenimb gok angek, ma kond mindeningiy angyak.”

¹⁷ Angeyak, kuyip ninjukuskiy angak, “Baybol buk ak, minim kun ak rek tikiy angyak:

‘Bi korip gep gok, kamb bap tep ma gek kirgiyak ak pen, miñiy korip sap namb yomb biyan

ak pinjiyñiy mindip angyi' tikyak.

¹⁸ “Biynimb kamb ar kun ak apyap pikningambay gok, tapin nep pikningamb. Pen kamb kun ak punjjiw apyapiy, biynimb aybirikningamb gok, pisnep piksimbjakningamb angyak.”

¹⁹ Jiysis kun angek, “Chinup nep asap angyi,” bi low tiysa gok sek, bi Gor nup tap simbongep yomb gok sek nup kor gun angyi niñyak ak pen; biynimb kunaynep niñmindeyak niñiy, pirikiy kirgiyak.

Rom Biyomb Siysa Nup Takes Pikjun Akan Mer Angyak

(Mat 22:15-22; Mak 12:13-17)

²⁰ Pen minim angak gok niñiy, nup yergiy dand kor amjun angyi, am biynimb gunap kuyip mimunḡ giy angyak, “Nimb biynimb tep rek silok ay, am tom giy, nup minim gunap anḡem, pen yerip anḡonimun niñiy, nup dand gapman kor yomb ak amningambun angyak.”

²¹ Kun anḡey, nup am anḡniñiy angyak, “Tiysa. Chin niñbun; yip yerip gos niñningambay angyi minim key gunap ma apan; biynimb gok kuyip Gor minim anḡñiniñḡ akan, yerip anḡniñḡ, yipund giy nep apan.

²² Kun ak yerginjun. Rom gapman biyomb Siysa nup, takes pikjun akan, mer?”

²³ Kiyk yesek tom giyak kun ak, Jiysis key niñiy, kuyip angak,

²⁴ “Maniy takes pikpay kun ak bap yip diñem niñiyñ angak.” Anḡek, diñey niñiy angak, “Maniy bak ak, kawnan an ker mindiy, yimb tikyak kun ak, an yimb ak mindiy gip?”

Angek angyak, “Siysa kawnan ak mindiy, yimb nuk ak mindiy gip angyak.”

²⁵ Angey, kuyip angak, “Kun ak Siysa yip ginimimb anqip gok, nup ginimimb; Gor yip ginimimb angyi ninimb gok, nup ginimimb angak.”

²⁶ Pen minim angak kun ak, kiyk niney, miker nup bap, dinimuᅇ rek ma ayek, wal angyak. Bi gos tipangiy niniy anqip angyi, pen minim gunap ma angyi, minim gomb pisnep kurgak.

*Biynimb Kumiy Tip Tikjakpay Akan Angyak
(Mat 22:23-33; Mak 12:18-27)*

²⁷ Biynimb gunap, biynimb kumiy ma tikjakpay angyi, gos ak ninyingipay. Biynimb kun gok kuyip, “Sanjiwsiy biynimb” angyingipay.

²⁸ Kiyk gos kun ak ninyingipay rek, ap Jiysis nup nembnemb giying angyak, “Tiysa. Bi Gor minim anqep Mosis; minim bap chinup tikiy angak: ‘Bi bap biyn diy, ñapan tikiy mer yikop kumningamb, numam nuk bap pen, biyn kun ak diy, ñapan nup ak angyi tikningamb angak.’

²⁹ Kun ak, bi kiñiᅇ sek onep ar ak mindeningambay; numam nind ak biyn diy, ñapan tikiy mer; yikop kumningamb.

³⁰ Kumek, numam namb pen, biyn kun ak diy, kunep ñapan tikiy mer; yikop kumningamb. Kun gek, numam namb ak pen diningamb.

³¹ Ak kunep ñapan tikiy mer; yikop kumningamb. Kun gi dam dam, numam onep ar ak mangyisek ñapan tikiy mer; yikop kumningambay.

³² Kisen biyn kun ak kunep kumningamb.

33 Pen kumiy tikjakningambay apan ak, biyn nokom binuk di onep ar ak ayningamb kun ak, kisen an ker mindeningamb angyak.”

34 Angey, Jiysis kuyip angak, “Miñiy mindpun ñin biy, biyn gok bi dipay; bi gok biyn dipay.

35 Pen Gor biynimb nuk gok kumiy tikjakiy, biyn gok bi ma diningambay; bi gok biyn ma diningambay.

36 Pen tip ak ma kunningambay; Gor ñi pañ nuk gok mindiy, enjol nuk gok per mindpay rek mindeningambay.

37 Biynimb kumiy tikjakpay minim ak, Mosis kunep angyi tikak ak niñbun. Gor mon bind manlan gek namb ak mindiy, basind nind kumyak gok yimb angyi, Mosis nup angak, ‘Yand Gor yesek bap mer; Ebrahim, Aysek, Jepok Gor kiyk yand mindpiyn angak.’

38 Biynimb nind kumyak gok, ‘Gor kiyk mindpiyn’ angak rek chin niñbun; biynimb kim mindpay akan, kumbay gok Gor niñimb, mangiysek kim mindpay.”

39 Jiysis kun angek, bi low tiysa gunap angyak, “Tiysa. Minim yipund giy nep aspan angyak.”

40 Minim ang tep gak kun ak pirikiy, kisen minim gunap nup ma angniyak.

Yip Yenen Kiyñ Yomb Key Yimb Ak Ma Apay Angak

(Mat 22:41-46; Mak 12:35-37)

41 Pen Jiysis kuyip angak, “Biynimb gok, Kiyñ yomb key yimb ak nup, Depiyt Biyomb nuk angningiy ak pen; yenen nup Depiyt tik dand amiy apiy gek, tikpay ñi ak nep apay.

⁴² Depiyt nuk key, Kiyŋ yomb key yimb ak nup minim angyi, Baybol buk day ‘Sam’ apay ak tikiy angak:

‘Biyomb Gor, Biyomb yip ak nup angyip, “Nand ñin yipund kind yip okok mindiy,

⁴³ mind dand amiy, biynimb nip alemb alemb ñimbay gok kuyip, tomb beŋ nand okok ayen, tawbirikningamban angyip” angyi’ tikak.

⁴⁴ Pen Depiyt Kiyŋ yomb key yimb ak nup, Biyomb yand angak kun ak, yenen nup Depiyt ñinuk ak nep apay angak.”

*Bi Low Tiysa Gok Mind Tep Ma Gipay Angak
(Mat 23:1-36; Mak 12:38-40; Luk 11:37-54)*

⁴⁵ Pen biynimb gok niŋmindyakniŋ, Jiysis binuk gok kuyip angak,

⁴⁶ “Nimb bi low tiysa gok gipay rek ginimimb rek ayip ak, niŋrep yimb ginimimb. Kiyk gipay ar ak, okok tanŋon yimb chinup anep angyan angyi, chech paryomb gok yimiy, nan-gep korip ak amiy, biyomb bispay ar ak bisgiy, tap yomb ñimbay ñin ak, am biyomb bisginiŋgiy tip ak dipay.

⁴⁷ Pen biyn yandiw gok korip tap kuyip okok, chinup nimb tikan angyi lip lip giyiŋ, Gor nup angnisipun angyi, minim paryomb yesek yesek ar gok apay. Kun gipay ak, kisen yiwur yomb key yimb ak, diniŋgambay angak.”

21

*Biyn Kaŋil Ak Opriyŋ Ñak
(Mak 12:41-44)*

¹ Jiysis Gor aṅgniṅep korip miṅgan ak, am mindiy niṅak: biynimb maniy sek gok, maniy gunap dap kes opriyṅ ayiṅgipay miṅgan ak yokeyak.

² Pen biyn yandiw simbgeprek bap, maniy likaṅsek sikoy omiṅal ak dap yokak.

³ Yokek, Jiysis niṅiy aṅgak, “Nimbip niṅind aspiyn. Biynimb gunap maniy siskoy yokpay; biyn yandiw simbgeprek biy, maniy nuk yomb yimb ak yokip.

⁴ Pen biynimb gunap, maniy kiyk kuṅaynep mindakniṅ opriyṅ ṅimbay; biyn yandiw simbgeprek biy, maniy nuk mindip rek maṅgiysek yokip. Tap taw ṅiṅnimuṅ bap ma mindip aṅgak.”

Gor Nup Aṅgniṅep Korip Ak Timey Giniṅgambay Aṅgak

(Mat 24:1-2; Mak 13:1-2)

⁵ Pen binuk gunap aṅgyak, “Gor aṅgniṅep korip biy, kamb tep tep tap okok dand apiy giyak ak, tep yimb mindip aṅgyak.” Kun aṅgey, Jiysis kuyip aṅgak,

⁶ “Kun apim ak pen, kisen tap tep niṅsipim kun gok ma mindeniṅgamb. Amiybi miṅmon okok nimb gok apiy, maṅgiysek tuṅgwaniṅ diyokey, kamb bap, kamb bap ar ak ma mindeniṅgamb aṅgak.”

Kisen Miker Giniṅgamb

(Mat 24:3-14; Mak 13:3-13)

⁷ Aṅgek, nup aṅgniṅiy aṅgyak, “Tiysa. Tap kun ak ṅin akay rek kun giniṅgamb. Pen tap yerip rek ak gek niṅiy, miṅiy giniṅg gisap aṅgniṅgambun aṅgyak.”

⁸ Angey, Jiysis kuyip angak, “Niņrep ginimimb! Biynimb kuņaynep ap tom giy, yimb yip ak diy anņningambay, ‘Yand nep aswiyn. Ñin yomb ak wip anņningambay.’ Kun angey, niņind apay anņgiy ma niņnimimb.

⁹ “Pen miñmon wikan gunap tikjakiy, miñmon wikan gunap yip penpen giniņgambay; miñmon wikan gunap kiyk keynep penpen gey niņiy, ñin kisen apay ak winiņg gakniņ gispay anņiy, ma piriknimimb. Ñin kun ak kisen winiņgamb angak.”

¹⁰ Kun anņgiy, kuyip angak, “Miñmon gunap, miñmon gunap yip penpen giniņgambay. Biyomb gunap layn nuk gok tikjakiy, biyomb gunap layn nuk gok yip penpen giniņgambay.

¹¹ Miñmon okok kuņaynep monmon yomb diy, yiwan yomb giy, miñak yomb giy giniņgamb. Tap semb ar biyoņ gok key kindik nimb ayek, pirikep rek ayniņgamb.

¹² “Pen tap kun gok kisen kun giniņgamb; nind yip ker mindpim rek, nimbip timey giniņgambay. Nimbip kor giniņg, dand Jiwda nan-gep korip ak amiy, kor giy, kalambis ay, dand gapman biyomb kor ak amniņgambay.

¹³ Nimbip giniņgambay kun ak, minim tep yip ak misen anņñinimimb rek ayniņgamb.

¹⁴ Pen minim yerip rek anņjun anņiy, nind ma piyow niņnimimb.

¹⁵ Yand key nimbip gos tep ñen, anņñimbikniņ, kiyk niņey diyokep rek ma ayniņgamb.

¹⁶ “Pen nap, nanim, namam, buņgiy nimb, biynimb nimb key gok mimuņg giy; nimbip gunap

pisnep pikayningambay.

¹⁷ Yip dipim rek, biynimb mangiysek nimbip miluk niñningambay.

¹⁸ Pen jun kas nimbip bap ma kurginingamb.

¹⁹ Yip chingiy nep mindiy mey; perper mindeningambim.

Dawin Yomb Jerusalem Biy Gi Timey Giningambay Angak

(Mat 24:15-21; Mak 13:14-19)

²⁰ “Pen amiybi gok ap, Jerusalem kus kus giyakniñ; mañ mindip Jerusalem timey giningambay angiy,

²¹ biynimb Jiwdiya mindeningiy gok, pirik miñmon yirik okok amningiy. Biynimb Jerusalem mindeningiy gok, pirik mis amningiy. Pen biynimb mis okok mindeningiy gok, dawin yomb miñgan biyan ma amningiy.

²² Yenen: Gor nup kirpay rek, ñin kun ak, Baybol buk tikiy angyak angyak rek nep giningamb.

²³ Pen biyn ñapan koñgiy mindeningambay gok sek, biyn ñapan tiy ñeningambay gok sek kuyip, miker yomb giningamb. Gor Yisrel biynimb gok kuyip, miker yomb ñinim angiy, miñmon biy gi timey yimb giningamb.

²⁴ Biynimb gunap kuyip, baynat diy piñiy ayingambay; biynimb gunap kuyip miñ ay, dand miñmon gunap amningambay. Pen biynimb Jiwda mer gok, dawin yomb Jerusalem timey gi mindey mindey, Gor kuyip ñin angyak ak pandikek nep, kirginingambay.

Bi Bap Ñinuk Melik Sek Winingamb
(*Mat 24:29-31; Mak 13:24-27*)

²⁵ “Pen pumb ak key yimb ay, takin ak key yimb ay, gap gok key yimb ay giningamb. Ñing siy pañg apiy giw yomb angek, biynimb miñmon kind kind mañgiysek gospar aying, gos kunaynep niñningambay.

²⁶ Tap semb ar biyoñ mindip gok, okok nimb okok nimb gek, miñmon biy yergining gisap angyi, jel pirikiy, gos tikek apek, kumemb rek ayingamb.

²⁷ Nind kun geningamb, kisen Bi bap Ñinuk semb biyoñ nimb Nop kilis ak diy, melik tep nuk ak sek winingamb.

²⁸ Tap aspiyn biy kisen gakniñ, Biyomb chinup tungasik diningamb ak, mañ mindip winingamb angyi, niñmindenimimb angak.”

Mon Kiyaw

(*Mat 24:32-35; Mak 13:28-31*)

²⁹ Jiysis kun angyi, minim bap tikdam ay angak, “Mon kiyaw ak sek, mon yikop gunap sek silup ayek niñiy,

³⁰ miñiy pumb aying gisap angyi niñbim.

³¹ Kun ak rek, tap apiyn gok gakniñ angingambim, ‘Gor biynimb diy kond mindeningamb ñin ak, mañ asaw angingambim.’

³² Biynimb mindeningambay ñin kun ak, ma kumningambay; kim mindyakniñ, tap aspiyn gok mañgiysek gek niñningambay. Niñind yimb apiyn.

³³ Semb ar biyoñ sek, mankumb biy sek kurginingamb; pen minim yand ak ma kurginingamb.

Jiysis Angak “Niņrep Giy Mindenimimb Angak”

³⁴ “Pen niņrep ginimimb. Niņg kilis tap gok kuņay ñimbiy, sikyim, simiy ying chendbil, tap man ar biy nep gos niņmindeniņgambim; ñin kun ak apiy, nimbip yakir tap gok gon ayey dip rek ak diniņgamb.

³⁵ Akniy nep ma giniņgamb; biynimb miñmon kiñiņ waņgin omiņal ak mindpay rek maņgiysek giniņgamb.

³⁶ Kun ak niņrep ginimimb. Gor nup aņgniņyিং nep mindem mey; tap kun gok gakiņ, nimbip kond mindek, kim amiy, am Bi bap Niņuk windin yirik ar ak mindeniņgambim aņgak.”

³⁷⁻³⁸ Jiysis ñin kaw kun ak, am Gor aņgniņep korip miņgan ak mindiy, biynimb gok kuyip minim aņgñiyiņgip. Kiyk minim nup niņun aņgiy, maynamb yimb tikjakiy, Gor aņgniņep korip ak amyiņgipay. Pen kisyim wakniņ, Jiysis nuk am miñmon Oliyp dum kinyiņgip.

22

*Jiwdas Jiysis Nup Niņgyaņ Aņgiy Mimunġ Gak
(Mat 26:1-5; Mak 14:1-2, 10-11; Jon 11:45-53)*

¹ Jiwda ñin yomb biret yiys sek ma ñimbay ñin ak, maņ maņ wak. Niņ yomb kun ak, enjol bap, Yijip biynimb kuyip pikayiņg, Yisrel biynimb kuyip niņiy kirgak ak mey, “Pasopa” apay.

² Pasopa ñin yomb kun ak maņ gakiņ, Gor nup simboņgep biyomb gok sek, bi low tiysa gok sek Jiysis nup niņgun aņgyak ak pen, biynimb gok kuyip pirikiy, yergiy niņgun aņgiy, aņgniņmindeyak.

³ Anğniņ mindyakniņ, Seytan, Jiysis binuk Jiwdas, Yiskariyot nup molik sikak.

⁴ Sikek, nuk am Gor nup simbonğep biyomb gok sek, Gor anğniņep korip kond mindyngipay poliys biyomb gok sek mindeyak ak amiy anğak, “Jiysis nup kayn gi dand amen, nup pikayniņgambim anğiy minim ak kuyip anğñak.

⁵ Anğñek, kuyip tep gakniņ, nup anğyak, “Nip maniy ñiniņgambun anğyak.”

⁶ Anğeyak mey; nuk Jiysis biynimb gok yip ma mindonimuj won ak, nup kayn gi dand amiy, biyomb gok kuyip ñinim anğiy, kond mindek.

Pasopa Tap Ak Ñiņniņg Gayrep Giyak

(Mat 26:17-25; Mak 14:12-21; Jon 13:21-30)

⁷ Pen biret yiys sek ma ñimbay ñin kun ak apek, siypsiyp ñiluk pik Gor nup simbonğ ñinjun anğiy,

⁸ Jiysis nuk Piyta yip, Jon yip kuyip anğyokiy anğak, “Nirminay am Pasopa tap ñiņniņgambun gok gayrep genimiy anğak.”

⁹ Anğek anğrik, “Akay kun ginjur?”

¹⁰ Anğer anğak, “Nirminay dawin yomb ak amiy niņniņgayr; bi bap ñiņg mal dand apeniņgamb. Nup namb pikiy, amnimuj miņgan okok amiy,

¹¹ bi korip nop nimb kun ak nup anğnimiyr, ‘Tiysa nip anğip, Korip miņgan akay, bi yand gok yip, Pasopa tap ñiņniņgambun anğip anğnimiyr.’

¹² Anğer, niripmiņay dam korip miņgan yomb cheya tap gok sek mindeniņgamb ar biyoņ ak anğek, Pasopa tap ñiņniņgambun gok, miņgan kun ak gayrep genimiy anğak.”

13 Angek amiy niņrik: angak angak rek nep mindek, Pasopa tap ñiņning giyak gok gayrep gerik.

Jiysis Binuk Gok Kuyip Biret Wayn Ñak

(Mat 26:26-30; Mak 14:22-26; 1 Kor 11:23-25)

14 Pen dungek wakniņ, tap ñiņning, bi minim nup dand amemb gok yip ap bisiņg kus kus giy,

15 kuyip angak, “Per gosimb yip wip ak, nimb yip Pasopa tap ñiņning gispun biy ñimbiy mey, kisen yiwur yomb diniņgayn.

16 Yenen: nimbip aspiyn, kisen tip ak ma ñiņningayn; yikop nep minden minden, siypsiyp ñiluk per ñimbun junj ak misen gek, Gor biynimb nuk diy kond mindeniņgamb ñin ak nep, tap yomb ak ñiņningambun angak.”

17 Jiysis kun angiy, ñiņg wayn kap ak diy, Gor nup tep angiy, binuk gok kuyip ñiyiņg angak, “Ñiņg ñispiyn biy diy ñiņnimimb.

18 Pen nimbip aspiyn: miñiy ñin biy tikiy, ñiņg wayn ak ma ñimben, Gor biynimb nuk gok kuyip diy kond mindeniņgamb ñin ak winiņgamb angak.”

19 Kun angiy, biret ak kunep diy, Gor nup tep angiy, tipaņg kuyip ñiyiņg angak, “Mumbwak yip yiwur yomb giniņgamb rek, nimbip aspiyn. Ar kun ak biret biy diy, gos yip niņyiņg ñiņnimimb angak.”

20 Pen tap ñimbdiy, wayn ñiņg ak diy, kap miņgan ak soņgiy, kuyip ñiyiņg angak, “Likañ yip yapek kumen nep, Gor nimbip biynimb yand angiy, diniņgayn angak minim ar ak wos aniņgamb ak mey; nimbip ñiņg wayn biy ñispiyn.

21 “Pen niñim! Bi yip kayn gi dand amningamb ak yip bising mindpun.

22 Bi bap Ninuk, Gor angak kinjen ar ak kindik giy kumningamb ak pen; bi nup kayn gi dand amningamb anup, simb niñsiyyn angak.”

23 Jiysis kun angek, binuk gok kiykaw nep “An rek kun giningamb angyi,” pen angek pen angek gi mindeyak.

Binuk Gok Yand Biyomb Minden Angyi Penpen Angyak

24 Jiysis binuk gok “Nimb mer! Yand biyomb minden angyi,” kiykaw nep, key penpen angy mindeyak.

25 Jiysis kuyip angak, “Gapman biyomb Gor ker ma mindpay gok, biynimb gok kilis giy kond mindyng apay, ‘Kuyip direp yimb gipun apay.’

26 Pen nimb kun ak rek ma ginimimb. Biyomb nimb gok, ñi paranj rek mindeningiy; biyomb sikerek gok, bi woñg giñemb rek mindeningiy.

27 Mankumb biy gipay miñ ar ak, biyomb am bisgey, bi woñg giñimbay gok, keñmangyi tap kuyip gok marik gipay. Pen yand nimbip yikop, bi woñg giñimbay rek ak gipiyn. Nimb kun ak rek ginimimb.

28 “Yip miker yimb gip ñin biy ma kirpim; kond nep mindpim.

29 Kun gipim ak Gor yip angyi, ‘Biynimb gok kuyip diy kond mindeningamban,’ angyi rek, yand pen nimbip aspiyn ak mey;

30 ñin kun ak tomb angin yip ak mindiy, Jiwda kiñiñ yomb keykey onep wimingan ak kuyip, kond mindeningambim angak.”

*Jiysis Piyta Nup Bi Kun Ak Ma Niñbiyn
Anḡningamban Anḡak*

(Mat 26:31-35; Mak 14:27-31; Jon 13:36-38)

³¹ Jiysis Piyta nup anḡak, “Saymon, Saymon. Niḡan! Gor Seytan nup ‘Yaw’ anḡek, nimbip wiyt maḡiy soḡgey soḡgey, maḡiy yimb ak key ay, day day ak key ay gipay rek ak giniḡgamb.

³² Pen Gor nup anḡniḡbiyn rek, yip pisnep ma kirginiḡgamban. Pen tap siy tap timey giniḡgamban ak, ‘Yenen kun gipiyn anḡiy,’ tip ak andkind yip ker winiḡgamban. Apiy, namiy namam gunap kuyip anḡ tep gey, mind tep giniḡgiy anḡak.”

³³ Jiysis kun anḡek, Piyta anḡak, “Biyomb. Nip ma kirginiḡgayn. Omiḡal giy nep giranḡor, nip kalambis ay, yip kunep ayniḡgiy. Pen nip pikay, yip kunep pikayniḡgiy anḡak.”

³⁴ Anḡek, Jiysis anḡak, “Piyta. Nip aspiyn: miḡiy kisyimken biyan kakaruk ma suk anḡniḡgamb won ak, Jiysis nup ma niḡbiyn anḡiy, yinj omiḡal nokom anḡniḡgamban anḡak.”

Anpawis, Wand, Baynat

³⁵ Kun anḡiy, kuyip anḡak, “Nind nimbip anḡyokiy anḡnik, ‘Anpawis, wand, tomb tirup gok dand ma amnimimb: yikop amnimimb anḡnik.’ Anḡen ambik ñin kun ak, nimbip tap gunap mindek akan, tikdak?”

Anḡek anḡyak, “Mer! Tap chinup gunap ma tikdak. Mindek anḡyak.”

³⁶ Anḡeyak, Jiysis anḡak, “Pen miḡiy nimb anpawis, wand, tap gok mindonimun, dand sesek amnimimb. Bi an ñayip baynat ma mindonimun

ak, kolsiyor nuk ak bi gunap kuyip yokiy maniy diy, baynat ak tawnimuj.

³⁷ Pen ninim! Yip nind, Baybol buk ak tikiy angyak, 'Nup bi timey monmon gip bap angninḡambay angyak.' Minim angyiy tikayak kun ak, miñiy giniḡ gisap angak."

³⁸ Kun angek, angyak, "Biyomb. Baynat chin ominjal mindip angyak."

Angey, "Mey ak angak."

Jiysis Nup Ñanḡayning Geyak Ninjiy, Nop Nup Anḡniḡak

(Mat 26:36-46; Mak 14:32-42)

³⁹ Kun angyiy, mis amiy, Gor nup anḡniḡning, per miñmon Oliyp dum amyinḡipay ak amnakniḡ, binuk gok kisen giyak.

⁴⁰ Dum kun ak amjakiy kuyip angak, "Gos timey apek timey ginimimb rek ayip ak, lotiw giyiḡ mindenimimb angak."

⁴¹ Kun angyiy, kuyip kirgiy, nuk keykey sinḡbindoḡ amiy, koḡim yimiy, Nop nup anḡniḡiy angak,

⁴² "Bapiy. Gos yand ninḡbiyn ak, ñiḡ silik kap yip ñiniḡ gispan ak ma ñinimin. Pen yand ninḡbiyn ar ak ma ginimin; gos nand key ninḡban ar ak nep ginimin angak."

⁴³⁻⁴⁴ Kun angyiy, nup miker yimb gek, Nop nup anḡniḡ mindakniḡ, wisimb ak likañ rek puḡgrik yowak. Kun gakniḡ, enjol bap semb biyoḡ nimb apiy, nup kilis ñak.

⁴⁵ Nop nup anḡniḡjiwiyy, amiy ninḡak: binuk gok miker gakniḡ wisin kineyak.

⁴⁶ Niñiy, kuyip angak, “Yenen wisin kinjipim? Gos timey apek, timey ginimimb rek ayip ak, tikjakiy, Bapiy nup angñinying mindenimimb angak.”

Jiysis Nup Chichiy Diyak

(Mat 26:47-56; Mak 14:43-50; Jon 18:3-12)

⁴⁷ Jiysis minim kun ak ang mindakñiñ, binuk Jiwdas bi tiwin yomb bap poñind apchakiy, Jiysis nup kaykol giyn angak,

⁴⁸ Jiysis angak, “Jiwdas. Mey bi biy ñangim angiy, yip kaykol gining gispan?”

⁴⁹ Kun angakñiñ, binuk gok gining geyak kun ak niñiy angyak, “Biyomb. Kuyip baynat diy piñiyjun akan?”

⁵⁰ Kun angying, binuk bap baynat ak diy, bi Gor nup simboñgep yomb yimb woñg giñemb anup, timund yipund kind ak, pisnep timbrik yokak.

⁵¹ Kun gek, Jiysis niñiy angak, “Kun ma ginimimb! Mey tep angak.” Kun angiy, timund ak tip gek yimñak.

⁵² Pen biyomb Gor nup simboñgep gok, Gor angñiñep korip poliys gok, bi minim tungasikep gok nup ap, dining gey, kuyip angak, “Nimb baynat diy, kur diy dand opim ak: yip bi penpen ñangep bap rek ayek niñiy, chichiy dining opim?”

⁵³ Nimb yip minek minek, Gor angñiñep korip ak minden, yip ma dipik! Pen miñiy Seytan, bi kisyim kind okok ken mindip ak, ñin nuk ak mey; kun gispim angak.”

Piyta Jiysis Nup Ma Niñbiyn Angak
(Mat 26:57-58, 69-75; Mak 14:53-54, 66-72; Jon
18:12-18, 25-27)

⁵⁴ Nuk kun angakniñ, nup chichiy diy, dand bi Gor nup simbonjep yomb yimb korip ak amniyak.

Piyta pen kikisen amiy,

⁵⁵ mon dangiy mindeyak korip namb ak amiy, biynimb gunap yip jimñiy bising mindek.

⁵⁶ Bising mindakniñ, pañ korip kun ak wong giyngip bap, nup niñdand aran apyan giyng angak, “Bi biy kunep, Jiysis yip mindek angak.”

⁵⁷ Angek, Piyta angak, “Pañ. Bi kun ak yand ma niñbiyn angak!”

⁵⁸ Pen yep sikoy won bap mindiy, bi bap pen, ap nup niñiy angak, “Nand kunep Jiysis binuk bap angak.”

Angek Piyta, “Yand mer angak.”

⁵⁹ Pen kisen tapin won bap mindiy, bi bap pen apiy, kilis giy angak, “Bi biy Jiysis yip mindamb. Nuk kunep miñmon Galiyliy nimb angak.”

⁶⁰ Angek, Piyta angak, “Minim aspan ak yand ma niñbiyn angak.” Kun ang mindakniñ, day kakaruk angak.

⁶¹ Angek, Jiysis andikiy Piyta nup niñyinjek ayek, Piyta pen, Jiysis kun kun giningamban angak minim ak niñiy,

⁶² kunam kinjik gek, mis amiy siy angak.

Jiysis Nup Angjiwying Pikying Giyak
(Mat 26:67-68; Mak 14:65)

⁶³⁻⁶⁴ Bi Jiysis nup di mindeyak gok, chech band ak di windin nup ak pik yiwgiy, nup angjiwying,

pikyng angyak, “Nand bi key niñban ak, nip an piksap ak chinup angñan angyak.”

⁶⁵ Pen minim timey kun ak rek, nup tapin kunaynep angyak.

*Nand Kiyng Yomb Key Yimb Ak Akan Angyak
(Mat 26:59-66; Mak 14:55-64; Jon 18:19-24)*

⁶⁶ Miñmon yowakniñ, miytiyng gun angyi, Jiwda bi minim tungasikep gok, biyomb Gor nup simbongep gok, bi low tiysa gok ap nan-giy, Jiysis nup dand Jiwda kanjsol miytiyng kun ak amiy angyak,

⁶⁷ “Nand Jiwda Kiyng yomb key yimb per kond mindpun ak akan angyak.”

Angey, kuyip angak, “Yaw angen, niñind angyip angyi, ma niñningambim.

⁶⁸ Pen angninep yand mindip gok nimbip angninen, yip pen ma angningambim.

⁶⁹ Pen miñiy, Bi bap Ñinuk am, Nop Biyomb tap yerip giyn angyi giningamb ak nup, ñin yipund kind ak mindeningamb angak.”

⁷⁰ Kun angek, bi kanjsol kun gok mangyisek nup angyak, “Nak key Gor Ñinuk?”

Angey angak, “Mey nimb key apim ak angak.”

⁷¹ Angek angyak, “Yenen, kor nup ak tapin angmindenjun? Nuk key tom giy, Gor Ñinuk mindpiyn angek niñbun angyak.”

23

*Biyomb Paylat Jiysis Kor Nup Ak Niñak
(Mat 27:1-2, 11-14; Mak 15:1-5; Jon 18:28-38)*

¹ Kun angyi, mangyisek tikjakiy, Jiysis nup dand gapman biyomb Paylat mindek ak amniyak.

² Dand amiy, nup kor gining, minim okok nimb okok nimb dand apiy angyak, “Chin piyow niñiy niñbun; bi biy biynimb chinup gok anqip, ‘Biyomb yimb Siysa nup takes ma pikiy, gapman kay minim ak kunep ma niñnimimb anqip.’ Pen minim bap anqip, ‘Yand Krays, bi kiyn bap anqip’ angyak.”

³ Angeyak, Paylat Jiysis nup angninijy angak, “Nand Jiwda kay kiyn kiyk ak mindpan akan?”

“Angek angak, “Mey apan ak, angak.”

⁴ Angek, Paylat pen, bi Gor nup simbongep yomb gok sek, biynimb yikop ap mindeyak gok sek kuyip angak, “Yand niñbiyn; bi biy nup kor gep junj bap ma mindip angak.”

⁵ Kun angak ak pen, kiyk menj mingan dand araniy angyak, “Nuk gapman minim ma niñnimimb anqiy, biynimb miñmon Jiwdiya okok manqiysek anqñimb. Miñmon Galiyliy tikiy, anqñi dap dap, miñiy Jerusalem biy wip angyak.”

Jiysis Nup Dand Herot Mindek Amniyak

⁶ Angeyak, Paylat kuyip angninijy angak, “Bi kun biy Galiyliy nimb?”

⁷ Angek, yaw angey, biyomb Herot Galiyliy propens kond mindip ak, ap Jerusalem biy mindip rek, nup ker yoken kor biy niñnimun anqiy, kuyip angek, dand mindek ak amniyak.

⁸ Herot, Jiysis tap giyinqip ak per minim anep niñiy, minek akay rek, tap mageprek bap gek niñningayn anqiy, gos ak niñmindyinqip ak mey, ñin kun ak Jiysis nup dand apchakey niñiy, nuk miñmiñ yimb gak.

⁹ Pen Herot Jiysis nup minim kuñaynep yinggin wingin gek, Jiysis pen minim bap ma angak.

¹⁰ Pen bi Gor nup tap simbonjep yomb gok sek, bi low tiysa gok sek kilis giy, minim kuñaynep angyak.

¹¹ Herot, amiybi nuk gok yip, Jiysis nup gi timey giying, ñiñlon ayiing, gapman biyomb ay-pay chech tep bap yimñiy, tip ak Paylat mindek ak dand amniyak.

¹² Nind Herot yip, Paylat yip penpen angmindyngipiyr ak pen; ñin kun ak minim ang jimñirik.

*Paylat Jiysis Nup Ñangnimimb Angak
(Mat 27:15-26; Mak 15:6-15; Jon 18:39-19:16)*

¹³ Pen Paylat, biyomb Gor nup tap simbonjep gok sek, bi minim tungasikep gok sek, biynimb yikop gok sek angak, ap nan-gey angak,

¹⁴ “Yip apim, ‘Bi biy, biynimb gok kuyip kun kun angip apim’ ak pen, miñiy windin yirik ar nimbip biy kor gipiyn ak, minim kor ginimbik junj bap mindek, ma niñbiyn.

¹⁵ Herot kunep minim junj bap ma piyow niñiy mey; chinup ker tip ak angyokamb dand opay. Bi kun biy, tap timey bap gek rek, minim nimbip ak diy nup ñangnim.

¹⁶ Kun ak yikop pikiy, angyoken amnan angak.”

[

¹⁷ Jiwda ñin yomb kiyk “Pasopa” angyingipay ak apek, Paylat per kalambis bi kiyk bap yikop angyokyingip ak mey;]

18 ñin kun ak, kiyk mangyisek menng mingan dand araniy angyak, “Bi kun ak ñangay, Barabas nup angyokem chinup ker owan angyak!”

19 Bi Barabas kun ak, dawin yomb namb ak, biynimb gunap diy penpen giy, bi bap pisnep pikayak rek nup kor giy kalambis ayak.

20 Pen Paylat tip ak, menng mingan dand araniy kuyip angak, “Jiysis nup yikop angyoken amnan angak.”

21 Angek, kiyk menng mingan dand araniy angyak, “Nup mon kiros bak biyon ñangbirik ayim angyak!” “Nup mon kiros bak biyon ñangbirik ayim angyak.”

22 Angeyak, Paylat tip ak kuyip angak, “Yenen? Bi kun biy, tap yerip timey gip? Nup niñen tap timey bap ma gip ak, ñangjun rek ma ayip. Kun ak nup yikop pikiy, angyoken amnan angak.”

23 Angek, kiyk kilis yimb giying, Jiysis nup ñangbirik aynimimb angyi, an gey gey,

24 Paylat minim kuyip ak diy,

25 bi timey biynimb kunay diy, penpen giy, bi bap nup pikayak anup kirgek amnakniñ angak, “Jiysis nup ñang aynimimb angak.”

*Jiysis Nup Mon Bak Biyon Ñangbirik Ayak
(Mat 27:32-44; Mak 15:21-32; Jon 19:17-27)*

26-27 Jiysis nup ñangning dand san diyakniñ, biynimb kunaynep kisen giy amniyak. Namb okok amying niñyak; bi Saymon, miñmon Sayriyniy nimb ak, Jerusalem apek. Nup niñiy, mon kiros di wanjrem ar nup ak ayñiying angyak, “Jiysis amjap ak kisen amnon angey,” dand kisen gak.

Pen biynimb kuñaynep ameyak namb kun ak, biyn gunap Jiysis nup simb niñiy siy aņgey,

²⁸ nuk tuņgandikiy kuyip aņgak, “Nimb Jerusalem biyn! Yip giniņg gisap ak siy ma aņgnimimb. Nimbip timey giy, ñapan nimbip gok timey giy giniņgamb ak, siy aņgnimimb!

²⁹ Kisen miker yomb asaw ak apek, aņgniņgambay, ‘Biyn ñapan ma tikpay gok sek, biyn ñapan tiy ma ñimbay gok sek tep, aņgniņgambay.’

³⁰ “Ñin kun ak, yenen mindiy kumjun aņgiy aņgniņgambay, ‘Miñmon yirik gok paņg apiy, chinup pikaypikop akaņ, konjiy diy chinup yiw gipkop ak, tep aņgniņgambay.’

³¹ “Yip mon kim tep, timey ma giniņgiy rek ak pen, timey giniņg gispay. Nimb mon milip rek wiņind amiy mindpim ak, nimbip niņind giniņgambay aņgak.”

³² Pen bi gapman low minim timbrikrik omiņal ak, mon kiros bak biyoņ ñaņgbirik ayiņg, dand sesek amniyak.

³³ Dand miñmon Chip jun won apay ak amjakiy, bi gapman low timbrikrik omiņal ak pis pis ñaņgbirikiy, Jiysis nup namb biyaņ ñaņgbirikiyak.

³⁴ Nup kun giy, ñaņgbirik ayey, nuk Nop nup aņgak, “Bapiy. Yip gispay ak yerip gispun aņgiy, niņrep giy ma gispay. Kun ak kuyip niñiy kirginimin aņgak.”

Pen amiybi gok, Jiysis nup mon kiros bak biyoņ ñaņgbirik ay, chech nup tuņgjiw ayey mindek gok, kiyk key sandiw gipay rek ak giyiņg diyak.

35 Biynimb kunaynep niñmindyakniñ, Jiwda biyomb gok, Jiysis nup panj angyiy angyak, “Nuk ‘Yand Jiwda Kiyñ yomb key yimb ak; Gor yip damb nuk yip mindpiyn angyiy,’ biynimb gunap kumey gamb tikjakpay. Gip kun ak rek, nuk key kunep giy, kim amek niñun angyak.”

36 Pen amiybi gok kunep nup panj angyiñg, mañ siñak apiy, ñiñg silik ak ñiyiñg angyak,

37 “Nand Jiwda bi kiyñ yomb kiyk mindpiyn apan ak, nand key giy kim amnoñ akañ angyak!”

38 Pen mon boñg band bap, Jiysis nup ñañgrimbikyak mon kiros bak biyoñ, yimb tikay angyak, “Jiwda biynimb kiyñ yomb kiyk ak angyak.”

39 Bi low minim timbriker, mon kiros bak biyoñ ñañgbirikyak ominal ak, bap Jiysis nup angak, “Nand Jiwda Kiyñ yomb key yimb mindpan ak, nand key giy kim amiy, chirup kunep gey, kim amnur angak.”

40 Angek, bi bap nup pen anğ giy angak, “Chir miker dipur rek, nuk kunep dip ak, nand Gor nup ma pirikpan?”

41 Chirminay timey gipur rek yiwur dispur, pen Jiysis tap bap ma giy, yikop nep yiwur disap angak.”

42 Kun angyiy, Jiysis nup angak, “Kisen nand Biyomb Kiyñ mindiy winiñgamban ñin ak, yip gosimb niñnimin angak.”

43 Kun angek, Jiysis angak, “Nip niñind yimb aspiyn. Miñiy ñin biy, yand yip am tip tep ak mindeniñgambur angak.”

*Jiysis Kumak**(Mat 27:45-56; Mak 15:33-41; Jon 19:28-30)*

⁴⁴ Ñin kun ak, pumbnamb yomb yoŋ won ak kisyim apiy, mind dand amiy pumb kuyim gak won ak, tip ak pen melik gak.

⁴⁵⁻⁴⁶ Pen Jiysis kumning angak, “Bapiy. Kawnan yand ak ñin ar nip ak aysipiyn angiy,” kumakniŋ, Gor angniŋep korip ñiluk miŋgan sunrep yimb biyaŋ, laplap di kinjenrumb pil giyak ak, pungrik biyoŋ biyaŋ ay, miŋgan yikiy mindek.

⁴⁷ Pen amiybi kond mindep kiyk ak, Jiysis minim angiy kumak kun ak niŋiy, Gor nup yimb ak dand aranying angak, “Niŋind apay; bi tep yimb ak angak.”

⁴⁸ Biynimb ap mindeyak gok, tap gak kun ak niŋiy, simb yimb gakniŋ, andkind korip kiyk amniyak.

⁴⁹ Pen Jiysis bunŋiy nuk gok sek, biyn Galiyliy nimb wiyak gok sek kiyk keykey sinbindon mindiy, tap gak kun ak niŋmindeyak.

*Jiysis Nup Komyak**(Mat 27:57-61; Mak 15:42-47; Jon 19:38-42)*

⁵⁰⁻⁵¹ Pen bi Jiwda minim tunŋasikep, Gor minim di tep yimb giyingip bap, miñmon Armatiya mindyingip. Yimb nuk ak Josep. Nuk bi minim tunŋasikep gunap, Jiysis nup ñang ayun angiy, gos niŋyak rek ma niŋak. Nuk Gor biynimb diy kond mindeningamb ñin ak, maŋ mindip angiy, kond mindyingip.

⁵² Nuk Jiysis nup dam komning, Paylat mindek ak am angniŋek, yaw angek,

⁵³ bi gunap yip am Jiysis nup tungasik dand apyapiy, chech tund teprep yimb ak di kom kom giy, dam kamb miŋgan kisen nep kilukiy chip ma komyak miŋgan ak komyak.

⁵⁴ Pen Jiwda lotiw ñin ak, maŋ gip aŋgiy, Praydey dungep won ak, Jiysis nup kun giy dam komyak.

⁵⁵ Pen biyn tiwin, Jiysis yip Galiyliy nimb wiyak gok, Josep amnakniŋ kisen amiy, Jiysis nup komyak tip ak niŋrep giy, andkind korip amniyak.

⁵⁶ Amiy, wel kuy tep wak gunap, Jiysis mumbwak nup ak ayñinjun aŋgiy, gay tep giyak. Minek kun anep dand ambiyap ak pen, Sarirey ñin ak, ñin yomb kiyk yikop mindep ak niŋiy mey, yikop mind mind kinyak.

24

Jiysis Tikjakak

(Mat 28:1-10; Mak 16:1-8; Jon 20:1-10)

¹ Minek Sandey miñmon kisen tikak won ak, biyn tiwin kun ak, wel kuy tep wak ak diy, Jiysis mumbwak nup ayñinjun aŋgiy, dand Jiysis nup komyak ak amniyak.

² Amiy niŋyak: kamb kolim yomb chip kaw pil giyak won ak, milok am gol okok mindek.

³ Pen kiyk miŋgan kun ak amiy niŋyak: Jiysis ma mindek.

⁴ Yergip aŋgiy, aŋg mindyakniŋ, bi chech tund ñiñakol yimrik omiŋal ak, gol kun siŋak jakiy minderik.

⁵ Kiyk niŋiy, jel pirikiy, kongim yimiy kuyangaŋgiyakniŋ, bi omiŋal kun ak aŋgrik, “Yenen

bi kim mindip anup, chip kombay namb akniy piyow niņsipim?

⁶ Nuk biy ma mindip. Mindarik tikjakip. Pen nimb gos niņnimimb; Galiyliy mindiy, nimbip minim angak ar ak.

⁷ Nimbip angak, ‘Bi bab Ñinuk ak nup, di biynimb tap siy tap timey gipay ñin ar ak ayey, mon kiros bak biyoņ ñangrimbik ayey kumiy, minek omiņal nokom mindiy, tip tikjakniņgamb angak’ angrik.”

⁸ Kun angrikniņ, gosimb kuyip ak paņgyikek, Jiysis nind Galiyliy mindiy, minim angak kun ak niņyak.

⁹ Niņiy, tip ak andkind amiy, tap gek niņyak kun ak, Jiysis binuk onep angip ak sek, biynimb nuk yikop gok sek kuyip angñiyak.

¹⁰ Biyn tiwin, minim angñiyak kun ak, Mariya miñmon Makdala nimb ak, Jowana ak, Jemis nonim Mariya ak, biyn yikop gunap sek.

¹¹ Pen kiyk kun giy angñeyak, minim kun ak niņind apay angiy ma niņyak; ñiñloņ ay aspay angiy niņyak.

¹² Pen Piyta minim kun ak niņiy, puņgrikind yimb angiy bindoņ amiy, komyak kamb miņgan ak sipsip niņak: Jiysis nup chech kom kom giyak band gok nep mindek. Niņiy, yergip angiy, gospar yimb ayiņg, tip ak andkind amnak.

*Bi Omiņal Miñmon Emeyas Amnirik Minim
(Mak 16:12-13)*

¹³ Ñin kun anep, bi omiņal miñmon sikoy Emeyas, yep Jerusalem maņ kun okok amnur angiy amyiņg;

14 tap yerip yerip gek niñrik minim ak kapkap angyiñg amerik.

15 Annirikniñ, Jiysis kund okok ken apiy, kiy yip yingonj giy amnak.

16 Pen bi omiñal kun ak, Jiysis nup niñbirip ak pen, Gor gosimb kuyipmiñay ak gek sakiy ayek, Jiysis nup niñer, bi ak key rek ayak.

17 Nuk kuyipmiñay angniniy angak, “Minim gok yerip angyiñg, anger asaw?” Kun angek, yimgeprek jak mindyiñg,

18 numam Kiliyowpas angak, “Nand nep mey, miñiy ñin kaw biy, tap Jerusalem biy gisap ak ma niñban?”

19 Angek angak, “Tap kun ak yergek aspiyr angak.”

Angek angrik, “Bi Gor minim angep Jiysis Nasaret nimb ak, minim anj tep giyiñg, tap mageprek gok giyiñg gek; Gor nup tep giy, biynimb gok kuyip tep giy gak.

20-21 Kun gek, gosimb chin niñiy angnuk; nuk bi chinup Yisrel biynimb diy, kond mind-tep giniñgamb angyi niñnuk ak pen; biyomb Gor nup tap simbonjep gok sek, bi minim tungasikep gok sek minim anj nan-giy, di Rom gapman biyomb anup ñeyak, nuk amiybi nuk gok kuyip ñek, dam mon kiros bak biyon ñangrimbi ayey kumak. Tap gak kun ak, ñin omiñal pandikak.

22 Miñiy sekemb won ak, biyn tiwin chin bap, am nup komyak kawrumb bindon niñiy, ap chinup tap yerip yerip gip ak angney, niñiy jiw dipun.

23 Kiyk apay, chip par ak ma mindamb. Enjol

omiñal ak apiy apiyr, ‘Nuk tikjakiy, kim mindip apiyr’ apay.

²⁴ Kun anğey, bi chin gunap kawrumb bindon amiy niñbay; biyn gok apay rek nep, mindamb anğrik.”

²⁵ Kiliyowpas kun anğek, Jiysis anğak, “Nir-minay gos tep ma niñbiyr. Bi Gor minim anğep gok minim anğyak ak, yenen niñind anğyak anğiy kasek ma niñbiyr.

²⁶ Pen Gor anğak rek, Kiyñ yomb key yimb ak yiwur yomb diy kumiy, tikjakiy mey, biynimb kuñaynep diy kond mindeniñgamb anğak.”

²⁷ Kun anğiy, kuyipminay Mosis; bi kiyñ yomb key yimb ak nup, minim tikak ak sek, bi Gor minim anğep gunap, minim nup tikiyak ak sek mañgiysek anğñirep gak.

²⁸ Pen bi omiñal kun ak, miñmon amerik mañ kun siñak amjakiy, Jiysis kuyipminay tawsak ay, amniñg rek gek,

²⁹ kiykminay nup kilis giy anğrik, “Dunğep day biy aswun. Kisyim winiñg gisap nen, apey chirminay yip amnun anğrik.” Anğer, kiyminiñg yip amnak.

³⁰ Korip am mindiy, tap ñiñniñg, nuk biret ak diy, Gor nup tep anğiy, tipañg kuyipminay ñakniñ,

³¹ gosimb kuyipminay ak pañgyikek, ak Jiysis nep anğiy, anğrikniñ, kapkap kurgak.

³² Kun gek, niñiy anğrik, “Kinjeñnamb okok apyiñg, minim gunap anğñiyiñg, Baybol buk tikiyak minim kiñiñ ak anğñiyiñg gamb, mind-mañgiy chirup ak niñind yimb limgamb anğrik.”

³³ Kun angyiy, won kun ak nep, tip andkind Jerusalem amiy niñrik: Jiysis binuk onep angip ak sek, bungyiy kiyk gunap sek ap nan-giy mindeyak.

³⁴ Amjakrikniñ, kuyipmiñay angyak, “Niñind yimb apun. Jiysis kumimb ak pen; tip ak tikjakiy, ap Saymon mindamb siñak misen gamb, niñimb angyak.”

³⁵ Angey, kiy pen angrik, “Chirmiñay kunep kinjenamb okok amambur, Jiysis chirup namb pikamb, dand korip chirmiñay ak amiy, tap ñiñning giy, nuk biret ak di Gor nup tep angamb, ak Jiysis nep angyiy niñbur angrik.”

Jiysis Binuk Gok Nup Misen Niñyak
(*Mat 28:16-20; Mak 16:14-18; Jon 20:19-23*)

³⁶ Minim kun ak angrikniñ, Jiysis mindeyak namb ak misen giy angak, “Nimb mindpim?”

³⁷ Angek, kiyk chip kawnan angyiy

³⁸ pirikenyak, kuyip angak, “Yenen, yip Jiysis angyiy ma niñiy, gos kuñay niñsipim?”

³⁹ Ñin tomb yip gok niñim. Yand Jiysis nep. Chip kawnan rek, mumbwak tiñiy sek ma mindembinip; yand yipul sek, tiñiy sek mindpiyn ak, yip diniñim angak.”

⁴⁰ Kun angyiñg, ñin tomb nuk gok kuyip yomek niñiy,

⁴¹ kiyk miñmiñ giyiñg, pen gospar ayiñg, ak Jiysis nep akan angyiy, gos kuñay niñeyak; kuyip angak, “Tap ñiñemb nimb gunap mindip akan?”

⁴² Angek, nup piys dañgiy ayak ak ñiy,

⁴³ niñmindyakniñ ñiñak.

⁴⁴ Pen Jiysis kuyip angak, “Nimb yip mindiy, yip gip ar ak, giniñgamb angyiy nimbip angyiñgiyipiyn.

Mosis low minim angyi tikak rek, bi Gor minim angep angyi tikyak rek, pen Baybol buk Sam ak minim angyi tikyak rek, yip yerer giningamb angyi, mangyisek angñiyingipiyn angak.”

⁴⁵ Kun angyi, minim nind tikyak ak ninrep giyan angyi, gos tep yimb ak kuyip ñiy,

⁴⁶ angak, “Minim kun ak tikiy angyak, ‘Kiyn yomb key yimb ak yiwur yomb diy kumek, komey, minek omiñal nokom mindiy, tip ak tik-jakningamb.

⁴⁷ Tikjakiy mindeningamb rek, minim nup ak miñmon Jerusalem kiñiñ giy angyi, anğ dand amiy, biynimb miñmon okok mangyisek angñey amnakniñ, biynimb tap siy tap timey giningambay gok, yenen kun gipun angyi, nup chingyakniñ, gach kuyip ak wiykyokningamb angyak.’

⁴⁸ Pen yip gak kun ak, windin nimb key niñbim.

⁴⁹ Pen Bapiy minim anğayak rek, nimbip giningayn ak mey; dawin yomb Jerusalem biy mindiy, kond mindenimimb. Gor Kawnan ak, ap nimbip bak ayek, miñmon okok keykey amnimimb anğak.”

*Jiysis Semb Biyoñ Amnak
(Mak 16:19-20; Ap 1:9-12)*

⁵⁰ Kun angyi, kuyip ponind Beteniy amiy, Gor kuyip kond minden angyi, ñin dand araniy,

⁵¹ Gor nup anğniñakniñ, nup dand aranjak semb biyoñ amnak.

⁵² Kun gek, kuyip tep gakniñ, yimb nup ak dand aranyiñ, andkind Jerusalem amniyak.

⁵³ Amiy, minek minek, Gor aŋgniŋep ko-
rip miŋgan ak amiy, Gor nup yimb ak dand
aranyŋipay.

**Kalam Baybol Buk Gor minim nuk kisin
angayak
The New Testament in the Kalam Language of Papua
New Guinea
Nupela Testamen long tokples Kalam long Niugini**

copyright © 1992 Wycliffe Bible Translators, Inc.

Language: Kalam

Dialect: central

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-06

PDF generated using Haiola and XeLaTeX on 18 Apr 2025 from source files dated 31 Aug 2023

1491c109-3ee2-5565-9b83-06c480168547